

## Luka Deuxu Rybe Wihikỹ Tỹmyra, Luka Tyyritidỹỹdu

1-3 Wyla, Teòfilo. Adee heka watyyriti ariwahinykre timybo Kristu rotỹỹnyre. Tuu lobixidu mahãdu tuu relyymyhỹre-ribi, jiarỹ ire ariòbitinytyhykre. Kia heka jiarỹ adee reritinymyhỹre, waiòlò, iwese ibutumy reeryrenyre juhu bededỹỹna-ribi. Aõma inatyhymy kia rotỹỹnymy rare wahe. <sup>4</sup> Kia wese wahe. Iwese iny adee relyyre wese, jiarỹ adee arelyyre inatyhymy aõbo rotỹỹnyre. <sup>5</sup> Zacaria heka Deuxu xiwe wahidỹydu rare, Abia ijoiõ wahe. Iriòrese Isabeli tahe tule xiwe wahidỹỹdu riokore mahãduõ rare. Kiau heka Herodi judeu bedesỹ iòlòmy raremyhỹ, Araõ riokore mahãduõ wahe. <sup>6</sup> Wiwanale heka awirenyre Deuxuru-ò. Òbitihyy heka ratximyhỹrenyre ibutumy Deuxu bededỹỹnanako-ò. <sup>7</sup> Tiiboho iriòreõhyyre. Ihãwyy Isabeli heka rasenadunyre, uladu herina dori awiõre. Ihãbu tule ramatuarinyre.

<sup>8</sup> Aõutxumy tahe Zacaria raaõmysỹdỹỹnymyhỹre aõma templo-ki. Kiatxu heka iròtenatxumy bede rỹimyhỹre templo-ò. Tahe iwo-ki ratximyhỹre. <sup>9</sup> Hewydysi lỹnywi ritoonymyhỹ Deuxu kia deàlanamy, iwese riwinymyhỹrewesehyyle. <sup>10</sup> Iu ahana-ki tahe sõwemy iny rexitòenymyhỹ. <sup>11</sup> Iu Zacaria xiwena ruruwe-ribi loosòna-ò rỹireu, hewydysi lỹnywi ritoonymyhỹre. Tahe

aõwesele ýjuõ rexitýnyre Zacariako-ò. <sup>12</sup> Tii tuu robireu heka rexiraòmy ruberumy reare. <sup>13</sup> Ýju rarybere: –Brebuõmykre, Zacaria. Deuxu roholare aixitòedýýna-ò. Tai heka adee ijyymy rareri. Ahãwyy Isabeli rariòrenykre. Kai heka Joaõmy bininikre. <sup>14</sup> Tai kaiboho heka iura heka beysabenyke sõwemy; ijõ iny tule reysakre iòraru-ki. <sup>15</sup> Tii heka hãbutyhyhykýmy rarekre Deuxu dee tiu heka vñ riõõtyhy mona hàrihiký riõõtyhy. Deuxu Tyytybytyhy. Juaõtykymy ralokre tii reareu. <sup>16</sup> Sõwemy heka aõma Israeli mahãdu Deuxu rityhynykre iòraru-ki wahe. <sup>17</sup> Tii heka hãbutyhyhykýmy rarekre Deuxu rybedumy Elia wesemy. Tii heka aõma Deuxu deòdýýna juhUU rehemynymy reakre ikòlemy iny ywisidýýnakre rehemynykre juhUU, aõma Deuxu Tyytybytyhy dehemyynyna riijemy tuu rehemynymy rakre. Tii bede ywina riòbitinykre inyy-ki. Tyby tariòre-wana wii riwoxinykremy. Tii heka iny ribedeerynykre aõma òbitimy rýirakremy. Deuxu luumy rýirakre aõma ilahireny rýira wesemy juhUU.

<sup>18</sup> Zacaria rarybere ýju-ò: –Jiarý ramatuarinyre timykre heka? Hãwyy tule rasenadunyre ihãrele òsana tukre. <sup>19</sup> Ýju rarybere: –Jiarý Gabrieli watxireri, Deuxu deòdutyhy wahe. Tii heka diwateònyde kaò adee rybemy wahe. <sup>20</sup> Kai tetyhynyõhytyeri tai kai marybeõkre uladu reakre xiery tahe marybekre. Kaa adee rarybereri dori òbitimy rarybereri warybemynamy ibutumy rýikre. <sup>21</sup> Iny riraòmy rýimyhý Zacaria òlòna, tahe raroorehenymyhý. Iroorehena

rieryõhyymyhÿreny. Dòhònydeu ta, rybe-ki rexisiranymy rarybeõhyyre. <sup>22</sup> Tii rehemynyreu tamy rybeõhykyre rahòra. Idi tebò-di raramynyre urile rybe riwisÿnymy rarybeõhykymyhÿre aõma timybo aõhebo rotÿÿnyrá heka riòbitinykemy heka rarybeõhymyhe timyrabo. <sup>23</sup> Tahe taaõmysÿdÿÿna rihudi, taheto-ò ròsere ixyby.

<sup>24</sup> Idi tahe Isabeli rabòtònyre iruwyre ahãdumy bede riijere rexiwòmny. <sup>25</sup> Isabeli rarybere: — Deuxu awi heka rare, riwatare waixÿruna-ribi. Kuladu wadeke riwahinyreri.

<sup>26</sup> Ijõ ahãdu tahe Deuxu Gabrieli riteònyre Nazare hãwã-ò Kalileia bede-ò. <sup>27</sup> ÿjuõ heka rybe-di ijadòma-ò. Kia ijadòma heka wii ritobinymy rÿireri tybyboho iseboho Jyje-wana roikremy. Jyje heka iòlò Davi kia mahãduõ rare. Ijadòma tahe Marie inire. <sup>28</sup> ÿju heka kiamy rarybere: —Beysakre Marie! Inynyryÿ heka awana ratxireri. Bedeòbyhykÿ adee kidiwahinykre. Tii arãwowydynyneri. <sup>29</sup> Kia rybe-di tahe Marie rexiraykynyre. Tii rieryõmy aõmybo rare. <sup>30</sup> Tahe ÿju tamy rarybere: —Marie, Brebuõmy! Deuxu teteysanyte. Kai awi heka rare. Tii aõwihikÿbo adee kidiwahinykre. <sup>31</sup> Kai heka mariòrekre, uladu heka Jesusimy raninikre. <sup>32</sup> Tii heka hãbu nihikÿ rarekre. Tii Deuxu riòremy raninikre. Deuxu heka tii iòlòmny risÿnykre, iwese Davi alabiehekÿreny ronyre wese, tii ronykre. <sup>33</sup> Tii heka ibutu Ijaò mahãdu iòlòmny rarekre. Iòlòna heka tiu itueõtyhy. <sup>34</sup> Tai tahe Marie ÿju-ò rarybere: —Jikarÿ heka ijadòkòmattyhy watxireri. Timykibohe krabòtònykre. <sup>35</sup> Tahe

ÿju rirawyònyre: –Tyytybytyhy adee kanalokre. Deuxu ruru heka adee kanakre. Tai heka kia uladu Deuxu òbiti riòremy raninikre. <sup>36</sup> Nohòti lusaõmy anymy-ribi Isabeli riki bòtòkõmy rareke-ribi tahe bòtòmy ratxireri. Debò sohoji reurò ahādumy iahādu. <sup>37</sup> Deuxu dee heka tiu aõ isiraõre. <sup>38</sup> Marie rarybera: –Jikarÿ Wahĩ dekòdu rare. Anomybo tarybeteri ka ibutumy rekyrubunyreri. Wadeke awire. Anowaxina tuukre irybemynamy karotÿkÿnykre. Idi ÿju rikõmy reare.

<sup>39</sup> Idi ta tii heka Isabeli roramy rare. Zacaria sÿmy Judeia bedede hāwālò hāwā bedeki. <sup>40</sup> Iu Marie rehemynyreu tahe wii rirybenyrenyru: <sup>41</sup> Tiu kia aõbo uladu Isabeli kia-ki iule rexiwatxinymyhy Marie-ò. Isabeli heka tÿxiykÿle Deuxu Tyytybytyhy-di ratximyhy. <sup>42</sup> Riajuamy rare deysana-di sōwere: –Kai hāwyy ibutu-ribi deysana rarekre. Auladu tule deysana rarekre. <sup>43</sup> Anoherekibo Wahĩse waroramy naderi. Jikarÿ ano anokõ rare. <sup>44</sup> Adeke rahokujareku, kuladu wawoku-ki rexilòrelòrenymyhy tabedesa-di. Tai tahe Isabeli rÿÿraximy ratximyhyre Deuxu Tyytybytyhy-di. <sup>45</sup> Kai bekysabenyke kia tetyhynyteki. Deuxu rybe dokuri adeke nade. Iwese tiki raryberewesele ibutumy rāikre. <sup>46</sup> Marie rarybere: – Jikarÿ wawoku-ribi Wahĩ rewokuwydynyru. <sup>47</sup> Wawokuribityhy wadekysareri Wahĩ watarasadu dokuri rare. <sup>48</sup> Ihyky tahe tiki tekòdu-ribi walanokonakona-ribi tōhòti rosakre. Tahe iny ibutumy hāwyyky dekysanamy riwaninikre. <sup>49</sup> Deuxu dokuri anomydÿkÿnana

wiwihikỹ wadeke riwahinyre. Tii tahe ityhy rare.

<sup>50</sup> Tikiemy inydeke ruxetòena riwahinymyhỹre iny tamy wowydyndyna riwahinyreki.

<sup>51</sup> Ixityhy nohõtidu mahãdu tiki rehure. <sup>52</sup> Bede ikòlò sòwemy tiki rehure. Tule iny ianokõ mahãdu Deuxu riwikòhenanymyhỹre.

<sup>53</sup> Rama risamahãdu deke rỹsỹna tiki riwahinyre.

<sup>54</sup> Irybe tahe tiki rityhynyre anobo tiki inytybyreny deke tiki raryberemy. Tikiboho tahe Deuxu riwikòhenanyre. <sup>55</sup> Ruxetòena tahe Abraõ deke riwahinyre tule tikiemy iriokore deke riwahinymyhỹre.

<sup>56</sup> Marie tahe inataõ ahãdu Isabeli-wana riwyrã. Idi tahe tasỹ-ò ròðsera.

<sup>57</sup> Bededỹỹnana Isabeli-ò rehemynyre. Iriòre reakremy ratxireriu, Iriòre reare. <sup>58</sup> Isỹ mahãdu heka teysana-ò roholarenyre, iery mahãdu tule rabedesarenyre tamy Inynyrỹ raruxetòenyredi, Inynyrỹreny ruxetòena tamy riwahinyreki. <sup>59</sup> Tahe debò inataõ txu-di, uladu notyky resynamy bede rỹire. Zacaria raninykemyre. <sup>60</sup> Tai tahe ise rarybere: —Anokõre, Joaõmy rarekre. <sup>61</sup> Isỹ mahãdu rarybere: —Joaõmy ninadu taheka ijòkõhykyre inysỹreny-ki. Anoherekibo tuukre? tai tuu raninike wahe. <sup>62</sup> Tuu Zacaria-ò rỹỹraxireny: —Momybo raninykre? <sup>63</sup> Tahe Zacaria tababese riòreõ rimyre. Riritinyra kia: —Joaõ heka inikre. Tahe ijõ mahãdu ibutumy ribedeòtiidỹỹnyre. <sup>64</sup> Iu tahe Zacaria rarybere Deuxu riwowydyndynyre. Tahe ibutumy isỹ mahãdu heka ruberure. <sup>65</sup> Ibutumy heka tii relyymy raremyhỹ Judeia mahãdu hãwãlò

nihikỹmy. <sup>66</sup> Ibutumy tamy roholaré heka raryberenyre: –Timybo uladu rarekre? Inynyrỹ idi tarukimy iweribikre.

<sup>67</sup> Tahe Deuxu Tyytybytyhy heka Zacariatykymy ralore. Tahe Deuxu aõmydỹỹnanamyhe relyyre timybo rabededỹỹnananykremy. Tii rarybere:

<sup>68</sup> –Judeu mahãdu Deuxu awi rare. Tii dori taijoi roramy nade.

<sup>69</sup> Iwiõhedỹỹmy tulemy tarasadu tyhy Tii heka Iòlò Davi mahãduy rare. <sup>70</sup> Deuxu Rybedỹỹdu mahãdu kia wesemy tuu raryberenyre.

<sup>71</sup> Inydireny òludu mahãdureny-ribi riki iny ritarenykre. Iny-di heka raruxetòerenyra.

<sup>72</sup> Tahe iny-ribi tõhõtireny rosaõhykyra. Tahe rarybekre timybo raryberemy inytybyrenymy. <sup>73-75</sup> Tii heka iny ritarenykemy inydireny ratxireri inyòludureny-ribi. Kia-ò heka rarybere inylabiereny Abraõ-ò. Tai heka rikiwiõhenanyrenyke brebuõlemy. Òbitimy iko-ò rakatxirenyhyykre.

<sup>76</sup> Kai wariòre Deuxu rybedumy mabekre. Kai heka mabekre Deuxuhukỹ rybemy rybedumy. Kai heka bõhònykre

Inynyrỹ-kò iry biywinykremy.

<sup>77</sup> Asỹ mahãdu-ò marybekre biu-ò hena kanakremy ihỹre. Deuxu heka tõhõti rosakre iòrarunareny-ribi. <sup>78</sup> Iny Deuxureny dori inydeereny ruxetòedu rare. Tii heka biu-ò hena ibutu-ò kidiõkre, tarasana wahe.

<sup>79</sup> Kia bede lurumy rỹira mahãdu biuloosònamy robikre.

Zacaria rybe tahe rikonananyre. Loosòna ywinary-ò tahe ritỹnynykre.

<sup>80</sup> Ihewo-ribi tahe uladu ratybienyre taumy-di Deuxu tyhydỹna-ki tule. Tii heka bederahy-ki raremyhỹ. Tiutxumy rexitỹnynykremy judeu mahãdu-ò.

## 2

<sup>1</sup> Kia mahãdu iòlò Augusto inire. Kia heka ibutumy bede-ki inyni rityyritinykemy bede riywinyre. <sup>2</sup> Kurina heka Siria bede dinodu rare. <sup>3-4</sup> Jyje heka Nazare hãwã-ki rasỹnomy raremyhỹ. Tai tahe Kalileia bede-ribi tiiboho roirenykemy Judeia bede-ò. Iòlò Davi dori tai reare, Belẽ hãwã-ki. <sup>5</sup> Jyje tahe rare, tii dori Davi ijoimy rareki. Marie bõtòmmy tii ridyre tai ihãwyy. <sup>6</sup> Tahe Belẽ hãwã-ò rehemynyre. Tahe herina roxina heto ihoõre herina tamyreny. Taihe awaru roxina heto-ò roire. <sup>7</sup> Tai hãwyy ratohouãsenyre. Idi rihetynyre awaru roxina hynaro-ò ritidikemy.

<sup>8</sup> Iu tahe budoeni-di itxeredu mahãdu bedero-ki ratximyhỹreny. <sup>9</sup> Idi tahe ýjuõ tamy nade Deuxu-ribi. Deuxu loosòna tamy ritynyre. Ruberurenyre. <sup>10</sup> Ýju tamy rarybere: —Brebũmyrenyke. Rybe wihikỹ-di adee rehemynyre. Ibutumy iny reysakre ka rybe-di. <sup>11</sup> Atarasadu heka ratohouãnyra Davi hãwã-ki, abiu-ò hedu wahe. Tii heka Kristu rare, Inynyrỹreny wahe. <sup>12</sup> Kaiboho heka awaru roxinaõ-ò inihe bõike itxeremy. Tai heka tohouã roireri tyy-di rarahananymy. <sup>13</sup> Iule tahe sõwemy ýju widotyde Deuxu dee rawiunykremy, kiawese rawiunyre nyre riwowydynyrenymy:

14 –Biu-ki Deuxu loosona ratxihyymyhÿre.

15 Tahe ÿju ròðserenyre biu-ò. Budoeni-di itxeredu mahãdu widee raryberenyre. Wylemy Belê-ò ròkòirenykre itxeremy kia aõmydÿÿnanamy Deuxu inydee riteðsinyreriò. 16 Tahe roirenyre idi tahe Marie, Jyje-txi rekoarenyre. Tuu robirenyre. Tahe broreni dòròtòhòhyna-ki uladu roire. 17 Tai tahe budoeni-di itxeredu mahãdu timybo ÿju tamy raryberamy, rarybere. 18 Tai tahe ibutумы kia tamy roholaré ribedeòtiinymy rÿire. 19 Marie heka tòhòti itxi reare. Tahe sòwemy raraykywydyanany ronyre. 20 Budoeni-di itxeredu mahãdu ròðserenyre rawiunyrenymy Deuxu-ò Deuxумы reàlàre ibutu òraru-ki. Iwese ÿju raryberewesetyhyle heka ibutумы rÿire.

21 Iribi tahe txu rÿireu tahe rare Jesuisi notyky orokré. Debò inataõ reurotxu rÿireu Jesuisi notyky raorokremy raywire. Tahe rininirenyre Jesuisimy iwese ÿju rarybere myna.

22 Xiwena rÿikemy bede rÿire Moisesi bede ywidÿÿnamyna. Aõutxумы tahe dehemynde Marie Jyje-wana kia idi riwinyrenykemy. Tahe Jyje ridykemy Jerusalê-ò idi ratxireri. Tai uladu-di roirenyre Deuxu-ò riteðsinykemy. 23 Kiamy heka Inynyrÿ Ritidÿÿna-ki roire.

Weryrykeki, Deuxu dee rawahidÿÿkre. Tii uladudela weryrykreki.

24 Iwese tule bòtòe inatximy rawahidÿÿkre ada bòtòerurà inatxi heka xiwenamy reakre Moisesi bede ywidÿÿna myna.

25 Hãbuõ tai ratximyhÿre Simeaõ inire. Jerusalê hãwãdu wahe. Deuxu rityhynymyhÿre hãbuwi



rare. Tii Kristu riraðomyhÿre Deuxu deòdÿÿna wahe. Iijoi aõbina bina-ribi tarasadumy Deuxu Tyytybytyhy heka tai ratximyhÿre. <sup>26</sup> Deuxu Tyytyby ihetxiu tamy rarybere: –Kai buruõtyhy Deuxu deòdÿÿnamy bobiõdi. <sup>27</sup> Iu Jesusise tyby-wana rehemynyreu Deuxu Tyytybytyhy heka Simeaõ riteònyre kowa-ò. <sup>28</sup> Simeaõ uladu taãxiò-ki rimyreu. Tahe Deuxu riwowydnyre:

<sup>29-31</sup> –Kiamy heka Wanyrÿ Iòlò arybe retyhynyre timybo tarybete wahe. Ibutumy dorihe tewinyta. Tahe aõwaxinyhe arurukre. Abiuðhenamy heka rabira. Tii ibutu iny tarasadumy rarekre biu-ò hena wahidÿÿdu wahe.

<sup>32</sup> Kia heka ibutumy iny-ò loosòna tewahinyta judeukõdu mahãdu-ò. Tai judeu mahãdu tahe wowydnyre tii rarekre.

<sup>33</sup> Tai tahe Jyje Marie-wana bedede riòtiinyre aõmybo rarybereki. <sup>34</sup> Simeaõ tahe Deuxu deysanamy tamyreny rarybere: –Deuxu biu-ò henamy heka kia uladu rare. Sõwemy judeu mahãdu tarasadumy rarekre, tule sõwemy tasÿ ituekre. Kia heka Deuxu deòsina rare. Sõwemy heka Jesusimy rakyararybenynykre. <sup>35</sup> Ibutumy iny rayky-ribi heka ibutumy ritÿnynynykre. Bederyry sõwemy bieryke tai aõhõkÿmy botÿÿnykre.

<sup>36</sup> Tule Deuxu rybe erydÿÿnaõ rehemynyre. Ana inire. Hãwyy rare. Tii heka Fanueli riðre rare. Asere mahãdusÿõ rare. Tii heka rasenadunymy raremyhÿ. Ijadòmamy raremyhÿu heka roire hãbu-wana. Debò inatxi reurò beðralemy heka tii-wana raremyhÿ tahe tii rawytesenyre. <sup>37</sup> Tii 84 beðramy heka bedede idi rÿire wytesemy. Tii Deuxu

dohodÿÿna heto-ribi ròhònyòhÿmyhÿre. Tii heka rexitòdenÿmyhÿre rumy txumy tabyreò-di. <sup>38</sup> Tahe tii rehemÿnyre Deuxu dohodÿÿna heto-ò. Deuxumy reàlàre. Idi Jesusimÿ imahãdu-ò rarybere tii tarasadumy rarekremÿ.

<sup>39</sup> Iu Marie, Jÿje-wana ibutumÿ bede ywidÿÿnamÿ ituereu, riòòserenyre tahãwã-ò Nazare-ò. <sup>40</sup> Jesusi raumÿnymÿhÿre beòra beòramÿ. Iruru, ibede eryna sòwemÿ ijòdire Deuxu dori idi tarukimÿhÿre.

<sup>41</sup> Pascoa worana bedehesi riòlòdÿÿnyre Jerusalẽ hãwã-ki. Jesusi tyby heka iseboho roiÿmyhÿrenÿre tamÿ. <sup>42</sup> Tule Jesusi waòinatxi reurò beòra-di ridÿrenÿre tamÿ. <sup>43</sup> Worana bedehesi rexihureu kidiòkesedenÿkremÿ doide. Tahe Jesusi naride Jerusalẽkihikÿle. Tiiboho rieryrenÿòhÿre naridemÿ. <sup>44-46</sup> Taijoirenywanale ratxirerilemÿ idi ròhòtinyrenÿra. Txusohojimÿ heka bede idi rÿidi, rierenyre. Tai rahaòhÿyrenÿra iijesemÿ diòkesedenÿde Jerusalẽ-ò ixyby. Inataò txu-di tahe tai nahadenÿde, Deuxu dohodÿÿna hetowo-ki wahe. Tii heka bede erydÿÿdu mahãdu-wana ronyre. Roholamÿhÿrenÿre irÿbe-ò ronÿmyhÿrenÿ. Tule rÿÿraximÿhÿrenÿre. <sup>47</sup> Tii heka ibutumÿ rirawyònymÿhÿre. Tii dori bede ery nihikÿ rare. <sup>48</sup> Iseboho tahe bede riòtiinyrenÿre tai ronyreki wahe. Ise tamÿ rarybere: –Waritxòre, anoherekibo kai ikykyrenÿ-ki tanyte. Anoherekibo tuu wadekereny tewinyteri aijeserenÿ-di watxireri. <sup>49</sup> Tahe Jesusi rirawyònyre: –Waijeserenÿkòmyke. Waha heto-ki watxireri, Waha aòmÿsÿdÿÿnamÿ

reywinyhyy watzireri. Kia aõbo teeryõhyytenyte.  
<sup>50</sup> Tiiboho rieryrenyõhyyre aõmybo Jesuisi rarybereri. <sup>51</sup> Idi tahe dõõsedenyde Nazare-ò. Tahe Jesuisi tyby rybe rityhynyhyymy raremyhỹ. Tahe Jesuisise kia ibutumy riyrubunyhyymy raremyhỹ tarayky-ki.

<sup>52</sup> Jesuisi tahe raumynyre. Bede erytyhymy relere. Ibutumy he iny iluure. Deuxu wowy-dyna-di ihỹre.

### 3

<sup>1</sup> Tiberiò heka waiyre beòramy iòlòmý raremyhỹ. Poncio Pilato heka Judeia bede dinodu. Ijõ heka Herodi inire. Inataõ inymy heka bede dinodumy raremy. Herodi heka Kalileia bede dinodu. Iseriòre, Filipi tahe Itureia bede, Traconite bede-wana dinodu rare. Ijõ iny tahe Lisỹnia inire. Tii Abileni bede dinodu rare. <sup>2</sup> Anasi, Kaifa-wana heka inatxi hãbu roire. Tiiboho wiwana xiwena wahidỹỹdu wedu raremyhỹ. Kia bedeu heka Joaõ rehemynyre bedero-txi. Tii iny-ò Deuxu rybe tỹnydỹỹdu rare. Zacaria riòre rare. <sup>3</sup> Tii kia bede ibutumy rybe ritỹnynyre, Jordaõ beroweramy ibutumy wahe. Kia wesemy rarybere: —Aòraru-ribi bõhõnyke. Maratisebenyke. Tahe Deuxu aòraru rixãwididỹỹnykre. <sup>4</sup> Iwese Isaia ròritidỹỹre wesemy heka wiji rỹire.

Inyõ heka ryrymyhỹ bedero-ki.

Kia:

—Inynyrỹry bexiywinybenyke. Ryòbitihikỹ biwinybenyke. Hãloo bitỹxinybenyke wimyny biijaranybenyke. Iry iòweòwena ramyhỹre heka, biòbitinybenyke.

<sup>5</sup> Iratòratòkeki, wimyna biijaranybenyke.

<sup>6</sup> Ibutumy iny heka Deuxu biu-ò henamy ro-birenykre. <sup>7</sup> Sòwemy iny nade riratisebenykremy Joaō-ò. Tahe tii tamyreny rarybere:

—Kaiboho hemylalaweselemy toite. Deuxu ykarana-ribi bexitabenyke, aõwiwihikỹ.

<sup>8</sup> Uritere kawese ryberenyõmykre: —Abraõ dori iny labiereny rare. Tai tahe ibutumy aw-ityhy rare inydeereny.

Jiarỹ dori adeereny ararybekre: —Deuxudeewikeki, Tii kia manadile iny riwinyke. Abraõ dee ijõ riòreõmy kia manadile riwinyke.

<sup>9</sup> Woma heka òwòruraruti riòròmhyhre. Kia raratynyõkeki heka, raòròkre. Heòty-di wòmny ririradỹỹnmyhyhre. <sup>10</sup> Tai tahe iny rỹraxyre Joaō-ò:

—Timybohe rakatxirenykre. <sup>11</sup> Tai tahe rarybere:

—Inyõ tõre inatximy ijõdikeki, sohoji iny ijõ-ò riwahinyke. Irỹsỹnadikeki, tule ritxuatxuake ijõkõ mahãdu-ò. <sup>12</sup> Iny witxiraõ Joaō-ò rehemynyre.

Tiiboho nieru tarasadu mahãdu rare bede dinodu-ò. Tai rỹraxyrenyre: —Timybo aõhebo rokotỹỹnyrenykre. <sup>13</sup> Joaõ rirawyònyre: —

Uritere aõnihikỹmy itarasarenyõmykre. Bede ywidỹỹna tyyriti myna ta tuukre. <sup>14</sup> Tai tahe soldado tamy rỹraxyre: —Inyboho tahe aõhebo rokotỹỹnyrenykre.

Joaõ rirawyõnyre: —Inyõ biteranyõtyhy adee nieru kanakemy. Inieru dori ahõrõ aõkõ rare. Beysake, adinodu-ribi tiwesebo nieru tetamahãte-di. <sup>15</sup> Tahe kia iny mahãdu raraykynyre Joaõ-di. Kowa aõbo hãbu Kristu ihỹre. <sup>16</sup> Tai heka Joaõ rarybere: —Jiarỹ heka bedi araratisebenyreri. Ijõ wahewo-ribi kanakre tahe woratyre inihikỹ rarekre. Tii heka

awityhy rare. Jiarỹ heka raixỹruwãhãre iwataana aritake lau. Tii heka akanaratisebenykre Deuxu Tyytybytyhy-di. Heòty-di tule wahe. <sup>17</sup> Iti tebò-ki ratxireri. Maixõmo ruxity hitxina-di wahe. Tii heka ritakre. Maixõmo riyrubunykre ihyna-ò. Iruixityy tahe ritoonykre. Kia heòty heka tiu ruriòtyhy. <sup>18</sup> Aõ heka Joaõ rarybere. Sõwemy aõna aõnamy iwesele rarekemy. Dohodỹỹna wihikỹ-di tamyreny rarybera. <sup>19</sup> Bede dinodu Herodi heka taseriòre riòrese-wana roire. Aõbina binahakỹle riwinyre kia. Tai tahe Joaõ tamy rarybere: —Kia awi aõkõ rare. Ibina heka rare. Sõwemy aõna aõna bina tule tii riwinyre. <sup>20</sup> Tai Herodi heka Joaõ mynomy riteranyre ròtenawo-ki roikemy. <sup>21</sup> Joaõ ixiwesehyyle rexitỹmyranomy iny riratisebenyre. Tahe tule iny witxirahe-ki Jesuisi riratisebenyre, Jesuisi rexitòenyreu, biuwetyhy rarayre. <sup>22</sup> Biuwetyky-ribi tahe Deuxu Tyytybytyhyle dobehemy nade bòtòerurà wesemy. Biu-ribi rybeõ-ò iny roholare: — Kai heka Wariòre tate. Aluure heka jiarỹ wadeysatyhyre. <sup>23</sup> Jesuisi 30 beòramy raremy taaõmysỹdỹỹna tyhy ritelenyreu, iny heka Jyje riòrelemy rõhõtinyinmyhỹre. <sup>24</sup> Jyje heka Eli riòre rare. Matate, Levi, Maki, Janai, Jyje, ibutumy labiehekỹ Jyje rare. <sup>25</sup> Ijõ tahe Matatias, Amos, Naum, Esli, Nagai, <sup>26</sup> Maate, Matatias, Semei, Jyje, Joda, <sup>27</sup> Joana, Resa, Zorobabe, Salatieli, Neri, <sup>28</sup> Meki, Adi, Cosã, Elmadaõ, Er, <sup>29</sup> Josue, Eliézer, Jorim, Matate, Levi, <sup>30</sup> Simeaõ, Juda, Jyje, Jona, Eliaki, <sup>31</sup> Melea, Mena, Matata, Natã, Davi, <sup>32</sup> Ijese, Obede, Boasi, Sala, Nasaõ. <sup>33</sup> Aminadabe, Adimim,

Arini, Esraõ, Peresi, Juda. <sup>34</sup> Ijaò, Ijai, Abraõ, Tera, Nakò, <sup>35</sup> Serui, Raau, Faleki, Eber, Sala, <sup>36</sup> Aina, Arfaxade, Sem, Noe, Lamei, <sup>37</sup> Metusalē, Enoi, Jarete, Maleleel, Aina, <sup>38</sup> Enosi, Sete, Adaõ. Tii tahe Deuxu juhUU riwinyre iriõre wese.

## 4

<sup>1</sup> Bero Jordaõ-ribi Deuxu Tyytybytyhy heka Jesuisi diòòsedÿÿnyde Tai heka tule bederò-ò rexykynyra. <sup>2</sup> Tahe Satanasi Jesuisi riurihire, 40 txu-di wahe. Aõ heka rirÿsÿõhyre Jesuisi kia itxumy txu rÿireu wahe. Idi tahe sõwemy rama risare. <sup>3</sup> Satanasi tamy rarybere: –Kai Deuxu Riòretyhy tate-wana heka, mana bitxienykre hinamy. <sup>4</sup> Tai Jesuisi dirawyònyde: –Deuxu Rybe tule kiamy rarybere.

–Hãbu hewa byre sohojiribile aõkõ irumy rÿimyhÿre.

<sup>5</sup> Tai Satanasi heka Jesuisi ridyre heto ratyti tyre. Ibutumy hãwãhãkÿ riteòsinyre bede bede rÿirá.

<sup>6</sup> Tahe Jesuisi-ò rarybere: –Kai biwalàhànanykeki, ibutumy aõna aõna adee ariwahinykre, ibutumy hãwãhãkÿ dinodumy tule wahe. <sup>7</sup> Wahõrõ heka rare. Inyõ-ò aõtxile ariwahinykre. <sup>8</sup> Idi tahe

Jesuisi dirawyònyde: –Deuxu-ò sohojile walàhàna biwahinykre. Kiamy Deuxu Rybe rarybere. <sup>9</sup> Idi Satanasi Jesuisi ridyre Jerusalē hãwã-ò. Biu-txi tahe rÿire, Deuxu dohodÿÿna heto tyre-ki wahe. Tii narybede, kai Deuxu Riòre tyhy tate wana heka bexiwatxixinyke inihe karibi hetoratyti-ribi.

<sup>10</sup> ÿju riki arayrubunykre wa. Deuxu taÿjuõ bederiywinyre aramykemy. <sup>11</sup> Tule kia rarybemyhÿre Deuxu Rybe.

Awa riki manaõ riwotõmonyõtyhy.

<sup>12</sup> Tahe Jesuisi dirawyõnyde: —Tule Deuxu Rybe rarybere: —Inyõ heka Deuxu uri urihixiõtyhy.

<sup>13</sup> Rexihure tahe Jesuisi urihixina. Tahe Satanasi heka Jesuisi ririre. <sup>14</sup> Idi tahe Jesuisi ròsere

Kalileia bede-ó. Deuxu Tyytybytyhy ruru tahe tii-wana ratximyhÿre. Ibutumy heka kia hãwã-ki ibededÿÿnana rierumy hÿreny. <sup>15</sup> Jesuisi heka dohodÿÿna heto-ki ròbedeerydÿÿmyhÿre. Ibutumy tuu rarybere. Tuu reàlàmy rarybemy rÿimyhÿ.

<sup>16</sup> Iribi tahe Jesuisi ròsere tai raumynyréò, Nazare hãwã-ò. Sabado txuu tahe dohodÿÿna heto-ò reamy raremy iwesehyyle. Tii tahe lamamy rÿire tyyriti-di rariakremy. <sup>17</sup> Tahe tamy Isaia tyyriti riwahinyreò. Tahe Jesuisi riijemyhÿre rybeõ idi rariakemy. Tai idi rariare:

<sup>18</sup> —Wanyrÿ Tyytybytyhy waki ratxireri. Rybe Tÿmyra wihikÿ inyko arotohodÿÿkremy. Iny aõkõ mahãdu-ò rybe wihikÿ ararybekemy riwatare. Tule iny ròtena-ki rÿira mahãdu, jiarÿ ariòlòdÿÿnykemy. Kiamy heka tamyreny ararybekre. Tule ruetÿmyra ariwahinykre ruetà mahãdu-ò. Iny idi rarÿÿnymyhÿre mahãdu-ribi, aritakre idi risinymyhÿreki. (Aõna aõnamy risÿnyrenymyhÿreki wahe.)

<sup>19</sup> Tibedeubo Inynyrÿreny taijoi ritakremy ararybekre. <sup>20</sup> Idi tasÿ ixyby riwerasenyre. Tahe riwahinyre ixyby kia hãbu riyrubunymyhÿreò. Tii ronyre. Ibutumy kia dohodÿÿna mahãdu idi retehemy rÿimyhÿre. <sup>21</sup> Tahe Jesuisi ritelenymy rarybera: —Wiji idi rariará heka aõbo tamy ibed-

edÿÿnanamy roire. Kia aõbo ritidÿÿna-ki roireri ihetxiu. Kaimy tahe wiji rarybereri, jiarÿ heka tii rare. Tii adeereny tyriti rariará wahe. <sup>22</sup> Tai tahe bede riòtiinyrenyre. Kia tahe aõmybo raryberakí. Tahe widee raryberenyre. Kaa heka Jyje riòrele ratxireri. <sup>23</sup> Tahe Jesuisi ixityre tamyreny rarybere: —Aõu kaiboho wamy tarybetenyteri rybeõmy, myÿ manarybeke: Kai bexideytenyke, hàri, òhotibedu. Kiamy aõbohe wadee manarybebenykemy atxitenyteri:

Iwese Kafanaõ bede-ki tewinyte wese ariwinyrenykemy wadi atxitenyteri, ahãwã-ki.

<sup>24</sup> Adeereny inihe tuu ararybekre. Rybe tÿnydÿÿdu heka õmo rityhynyõtyhy ihãwãreny-ki. <sup>25-26</sup> Tahe iwitxiramy ararybekre. Ibedeu kia raremyhÿu, sõwemy heka rama reamy raremyhÿ judeu sÿ mahãdu. Sõwemy wytese mahãdu heka ramamy rurumyhÿre. Biu heka roaõhykyre tai inataõ beòra weeremyhÿ wahe Sareta hãwã heka Sidõ bede-ki tii rasÿnymyhÿre. Tahe Deuxu bede riywinyre Eliasi rakemy iny sohoji wytese-ò, rÿsÿna riwahinykelemy wahe. <sup>27</sup> Eliseu bedeu heka sõwemy tybybinadu rÿimyhÿ. Sohoji inyle riteytenyre. Naamy heka inire. Tii heka Siria bede luduõ rare. <sup>28</sup> Kia dohodÿÿna mahãdu heka ibutumy iu tamy rakyarananyre. <sup>29</sup> Rimyrenyre heka Jesuisi. Idi retÿhirenyre hãwãlò ratya-ò ridyrenyre. Idi rehurenykemy riwisÿnyrenyre. <sup>30</sup> Tahe Jesuisi inysõwehekÿy-txi ralore. Idi rahenyre. <sup>31</sup> Iribi tahe Jesuisi rare Kafanaõ-ò, Kalileia bede-ò. Sabado txuõ txuõlemy heka Jesuisi iny ribedeerynymyhÿre. <sup>32</sup> Sõwemy heka



iny ribedeernymyhyre mahādu tamy awimy r̄yira, irybe dori awireki wahe. <sup>33</sup> Hābuō raremyh̄y dohod̄ȳna hetowo-ki tyytybybinahak̄y-di tahe taumywo-ki ratximyh̄y. Tai tahe tii ryryre: <sup>34</sup> — Jesuisi, Nazareludu, aōhebohe ijoi bis̄nykremy atxiteri? Biwahubenykre aōbo? Jiar̄y heka araeryre mobo taté. Kai heka Deuxu deòdu atxiteri. <sup>35</sup> Tai tahe Jesuisi tamy rarybere tyytybybina iumywo-ki riyrykemy. Iribi riòlòd̄ȳnyre. Tahe idi rehure iutyde-ò idi iribi ròhònyre. Hābu aōhe ris̄nyōhyre. <sup>36</sup> Ibutumy heka iny ribedeòtiid̄ȳnyre. Iny sohoji sohoji widee rarybere: —Aōrybemy aōwe tii rarybereri? Timybo iny-ribi tyytybybina riteònyke. <sup>37</sup> Ibutumy timybo Jesuisi riwinyre, ijyynamy reare. <sup>38</sup> Tahe Jesuisi ròhònyre Simaō heto-ò idi rare. Simaō riòrelahi webinadumy roire rubuna-di. Tai Jesuisi-ko tuu relyyreny. <sup>39</sup> Tai Jesuisi ibireweribi-ò rare. Tahe irubuna iribi riòlòd̄ȳnyre. Tahe tii ritamad̄ȳnyre. R̄ys̄naō tamy riwahinyre. <sup>40</sup> Ibutumy iny tawebinadu mahādu didydenyde. Ibutumy Jesuisi riteytenyre tibò iratityre rilidimyh̄y. Sōwemy iny tyytybybina-di r̄yireri mahādu riòlòd̄ȳnyre. <sup>41</sup> Iu tahe ryrymy reamy r̄ymyh̄y: —Kai Deuxu Riòretyhy tate. Tii Jesuisi rierymyh̄y tii Deuxu deòdu raremy, tyytybybina wahe. Tai Jesuisi tamy rarybere rybeōkemy. <sup>42</sup> Txu ijiramy Jesuisi rare bedero-txi ixisohojile. Iny sōwemy riijemyh̄y. Itxi rearenyre, iatysy deramy rekoamyh̄y. <sup>43</sup> Tai Jesuisi rarybere tamyreny: —Jiar̄y heka Rybewihik̄y T̄myra arelyykre iwitxira hāwā Deuxu Òlòna T̄myramy

arelyykre. Tuu Deuxu diwateònyde. <sup>44</sup> Jesuisi ibutumy Judeia mahãdu bedede bedemy dohodỹna rỹiraki rotohodỹmyhỹre.

## 5

<sup>1</sup> Jesuisi tahe aho ijà-ki rỹire Kenesare aho ijà-ki. Iny heka sòwemy Deuxu rybe-ò roholakemy iu rỹimyhỹ. <sup>2</sup> Tii robire hãwòò inatximy roinyimyhỹre. Waxidumy mahãdu heka rirahure rià-di risuhòreri. <sup>3</sup> Idi tahe rimumy hãwòò. Simaõ hãwò heka rare. Tii tahe ixi-di ritaranyre beroro-ò. Tai tahe tii rexidelenymy relyyre. Kia iny rỹimyhỹ mahãdu heka ribedeerynymy relyymyhỹre. <sup>4</sup> Rexihure rybe-ribi. Idi tahe Simaõ-ò rarybere: —Make wa bera-txi. Rià bitidike. Bimykemy utura. <sup>5</sup> Tahe Simaõ rirawyònyre: —Wanyrỹ, ruu wa wadireny aòkòhykylemy bedewadireny rareri, uturamy ho aòkò. Tarybete urenana anakre. Aritidikre heka rià. <sup>6</sup> Tahe ritidireu tahe, rià utura sòwemy rimumy, kia rautxienyre. Tule riykamyhỹ rià. <sup>7</sup> Talawò biòwa mahãdu-ò rryyre: —Bòdòibedenyke bidiwawiòhenanybenykemy. Inatxi hãwò heka rỹxire. Ritỹxinyre utura-di. Ihyy berahatxi-ò ijiramy riwisỹnymyhỹ ilawòreny. <sup>8</sup> Simaõ tuu robire. Tii Jesuisi ratximyhỹre tahe tatiowomy resere Jesusiko-txi. Simaõ Pedro rarybere: —Wanyrỹ, aribi kỹny iòhòmy arỹiòtyhy. Jiarỹ heka waòrarudimy rare. <sup>9</sup> Simaõboho bedede riòtiinymy rabadewore aõma utura sòwemy tamyreny riwahinyraki wahe. Tii tuu iximy rarybere. <sup>10</sup> Ibutumy tiiboho mahãdu ribedeòtiidỹnyrenyre Zebedeu riòre kia

Txiau, Joaõ-wana. Jesuisi rarybere Simaõ-ò: — Brebuõmyke heka ikonana-ò heka utura bimyõkre. Wadee dori maaõmysÿdÿÿnykre hãbu wadee bimykre. Tamyreny biwatÿnynykre. Iwese utura temymyhÿte wese, wadee hãbu wiji bimykre waerydÿÿna mahãdumy rarekremy. <sup>11</sup> Tahe waxidumy mahãdu ibutumy kaa tawaxi tarià iu ririra Jesuisi riheludunykremy.

<sup>12</sup> Ròirenyre rirònyrenyre ibutumy hãwã-ò. Idi tahe hãbuõ rare ityyjyhykyle. Hãbu Jesuisi robireu tahe resere iko-txi, rexitòenyre: —Wanyrÿ, adeewikeki biwateytenykre. <sup>13</sup> Jesuisi tamy tebò ritetemy rarybere: —Kohe, arateytenykre. Tii reytemy reare. <sup>14</sup> Tai Jesuisi rarybere tamy: —Inyõ-ò tahe ijyõmykre. Xiwena wahidÿÿdu mahãdu-ò make. Tai maxiwekre tuu Moisesi bedede riywinyre myna. Xiwenaõ heka biwinymy biwahinykre. Moisesi rarybere wese wahe. Iny mahãdu-ò heka biteòsinykre. Kia riteòsinykre teytetamy. <sup>15</sup> Tahe ihãrele Jesuisi ibutumy rieryre. Sõwemy iny heka wirotyre raholakremy. Ijõ nade aõma iwebinaduna ibina-ribi riteyteuykemy. <sup>16</sup> Tahe Jesuisi iribireny aõma rexitòenykremy rexitare.

<sup>17</sup> Ijõ txuu ròbedeerydÿÿmyhÿu, fariseu mahãdu, bedede ywina rybe bedede erydÿÿduõ-wana rononymhÿreny. Ibutu hãwã hãwã-ribi dotydenyde wese tahe sõwerenyre, Kalileia bedede-ribi Judeia bedede-ribi, Jerusalẽ hãwã-ribi. Deuxu deytana Jesuisi-ki ratximyhÿ. Jesuisi hãwãlò-ribi dobehede tii-wana, taerydÿÿna mahãdu-wana wahe. Tahe sõwemy iny iube-ki ributunymy rononymhÿre. <sup>18</sup> Iny mahãduõ heka hãbu

iumymy manadu kididydenykemy ratxireri Jesusiko-ò ritidirenykemy. Idi tahe hãbu webinadu wahe Jesuisi-ò rakemy bede riywinyre. Inatyhyle riathyhnyre. <sup>19</sup> Inysõwereki tahe tamy rehemynyrenyõtyhy. Tai tahe hetoratyti-ò raòwònyre hãbu webinadu-di. Iribi tahe diberesedỹnyde reroti-di. <sup>20</sup> Jesuisi robire, rieryre aõma rityhynymy ratxirenyreri. Hãbu-ò Jesuisi rarybere: –Wy, aõraru heka raixãwidỹnyra. <sup>21</sup> Tahe fariseu mahãdu he widee raryberenyre: –Mobo kia hãbu ratxireri, timyhe tu kia irybeõna rybe-di. Deuxu-ò kia rybe ibinatyhy rare. Deuxu sohojile òraru-ribi iny riixãwididỹnymyhỹre. <sup>22</sup> Tahe Jesuisi rierymyhỹ timybo rexinohõtinyinmyhỹreny. Tai rarybere: –Aõherekibo kia wesemy texiraykynytenyteri. <sup>23</sup> Tibohe irutaõre webinadu-ò rybe: –Aõraruna reixãwididỹnyra ada myimy mariake aõbo. <sup>24</sup> Deuxu Riòre Hãbutyhyhykỹ jiarỹ rare. Tai waruruna wadee Deuxu Riòre òraruna ixãwididỹnyamy. Katahe bierybenykre inatyhymy aõbo rarybereri: –Myike, abyre biwymy asỹ-ò ta mahe. <sup>25</sup> Hãbu tabyre rimymy tahe aõwesele tasỹ-ò rare. Deuxu riwowydynymy rare. <sup>26</sup> Sõwemy iny ribedeòtiidỹnyreny. Riwowydynymy rỹimyhỹ. Tiiboho raryberenyre: –Aõwitxiramy wiji inyboho robirenyra. Tiu juhUU tukõre-ribi wahe robirenyra.

<sup>27</sup> Iribi tahe nieru bede dinodu nieru mynydumy robire, Levi heka inire. Tii heka raaõmysỹdỹnymyhỹ titxibo nieru tarasana-ki. Jesuisi tamy rarybere: –Manakehe wawana.

<sup>28</sup> Tahe taaõna ibutumy ririre, idi ihemy rare.

29 Levi tahe taheto-ki roxinaõ riòlòdỹnyre Jesuisi dee. Tamy rehemynyre nieru arisidu mahãdu, tule fariseu mahãdu. Ibutumy iny iarixina mahãdu. 30 Kia fariseu mahãdu kia bederydỹdumy mahãdu tyyritirybedỹdu mahãdu kie heka aõbina binahylemy rarybereri Jesuisimy. Jesuisi terydỹna mahãdu-wana kiamy rarybereny: –Aõherekibo kaiboho teroxitenyteri, nieru arixidu-wana, iòrarudu sõwe mahãdu-wana. 31 Jesuisi rirawyõnyre: –Iny awimy ratxireri-wana, òhotibedumy reaõmyhỹre. Webinadu mahãdule ta tuu reamyhỹre. 32 Òbiti mahãdu-ò aõkõ heka jiarỹ anade rybemy. Tiibohole heka ixi-txi tõhõti reakemy idi watzireri.

33 Tahe tiiboho Jesuisi-ò rarybere: –Joaõ heludu mahãdu roxiõmy txumy rỹire. Tule tiiboho rexitòenyrenyre. Sõwemy rexitòenymyhỹre fariseu mahãdu erydỹna tule. Tahe aijoi tahe riroximyhỹrenyre riõmyhỹrenyre. 34-35 Tahe Jesuisi tamy rarybere: –Hãwyyemy heridu tỹmyra ijoi ratxikeki heka tiu itobidỹnana mahãdu wahe. Kia heka riroximyhỹke. Kia tahe tỹmyra iribireny ratakreu, iijoi mahãdu renarehekre. 36 Tyky tỹmyraõ tiu tykytyby dòbõnamy iny ritidiõtyhy. Timyki dori wii wiòbydỹõna. 37 Vĩ tỹmyra heka tiu aõiròdu tyky watxiwe yla tyby-ò rarareõmyhỹre, tukeki ta kia raykacre idi vĩ urile rejujukre. 38 Vĩ tỹmyra heka hyna tỹmyra-ò rararemyhỹke. 39 Inyõ vĩ tybyhykỹ riõkeki, itỹmyra rexitòenyõtyhy. Kiamyky rybe. Vĩ tyby dori itỹmyra-ribi awi rare.

## 6

1 Judeu elehydỹnnyhỹreny txu kia idi rekoarenyre maixõmoho-di. Ierydỹna mahãdu rimyra maixõmo, maixõmo, debõ-di riroxityxiwimyhỹ riymy idi rare. 2 Fariseu mahãdu tuu robire. Tamy rỹraxyre: –Aõherekibo kia wese tewinyteri. Kiamy heka iwidỹõmyke bede ywina rybe rarybemyhỹre judeu elehydỹnnyhỹrenytxumy. 3-4 Jesuisi tamyreny rarybere: –Ihetxiu Davi tamahãdu-wany rama risareu, Deuxu dohodỹna hetowo-ò rirõnyre. Tai Davi xiwena rỹsõnale taijoi-wana rirõsõre. Xiwena wahidỹdule heka irõsõdure, inywitxira ta aõkõ. 5 Jesuisi ritỹnnyre tamy: –Hãbutyhyky jiarỹ rare, Deuxu Riõre wahe. Kiata sabado wedu jiarỹ rare, elehydỹnnyhỹrenytxu wedu wahe.

6 Ixityre ralore dohodỹna mahãdu heto-ò ròbedeerydỹkemy. Hãbuõ tai rare tebõ rabinamy. 7 Tahe fariseu mahãdu Jesuisi-ò retehere. Riteytenykemy kia hãbu webinadu judeu elehydỹnnyhỹrenytxu. Rexiwodohonanyre. Kiatxuu tii riwinyrekeki tahe ribinanyke judeu elehydỹnnyhỹrenytxu, riwinykeki wahe. 8 Jesuisi rierymyhỹre aõmybo tiiboho raraykynyrenyteri. Jesuisi tamy ryryre, –Aõma hãbu debõbina-ò: –Mynyike ini, ityareny-txi. 9 Tahe fariseu mahãdu-ò Jesuisi rarybere: –Arỹraxykre inihe adeereny, awire adee ka hãbu debõ ariteytenyke sabado txuu. Aõbo adeereny awire sabadotxu widỹ. Aõwihikywidỹmy aõbo ada aõbina widỹmy. Rubu-ò wahidỹ aõbo ada rubu-ribi itarasa aõbo. 10 Retehere! Ibutu-ò idi hãbu-ò rarybere: –Ebõ inihe

biditeòsinyke. Tiu hãbu tebò riteòsinyreu tahe, reytere. <sup>11</sup> Reburerenyre heka. Timybo Jesuisi risÿnyrenykemy rexinohõtinyrenyre.

<sup>12</sup> Idi tahe Jesuisi heka hãwãlòratyy-ò rare ixitòedÿÿmy Deuxu-ò. Rureherehemy heka tamy rexitòenymy bede idi rÿire. <sup>13</sup> Txuijaramy tahe ludu mahãdu-ribi waòinatxi reurò taheludutyhy mahãdu ritare. Tarybemy rybedumy rininirenyre. <sup>14</sup> Sohoji ijõ heka, Simaõ inire, Pedromy idi ranire, ijõ tahe Andre rare, iseriòre. Idi Txiau, Joaõ, Filipi, Bartolomeu. <sup>15</sup> Mateu, Tome, Tadeu Txiau, (Kia Txiau heka Afeu riòre rare.) Ijõ Simaõ Kana bedeluduõ rare, tasubedeluudure. <sup>16</sup> Juda Txiau riòre, ijõ Juda Isariò tahe Jesuisi tyhedÿÿdu rare. <sup>17-18</sup> Jesuisi dobehede bedero-ò hãwãlò-ribi. Tahe sòwemy iny iheludu mahãdu tii-wana rÿimyhÿ. Judeia bedede mahãdu Jerusalẽ hãwã mahãdu. Tule Kalileia bedede, Tiro hãwã, Sidõ hãwã mahãdu. Tiibohe wii ributunymy hãwã mahãdu Jesuisi-ò roholakemy idi reytekemy. Kia tai ròteytedÿÿmyhÿ. <sup>19</sup> Ibutumy Jesuisi tyky-ò tamy adereximy risÿnymyhÿre adeytena iribi ròhònymyhÿ.

<sup>20</sup> Tamyreny retehere tai ibutumy rierynanyrenyre: –Kaiboho aõkõrenyre-kì, beysebenyke. Deuxu Òlòna dori ahõrõreny rare. <sup>21</sup> Rama arasareri-wana beysabenyke. Bihydumy dori mabekre. Tule tahinyteri wana beysakre ihewo-ribi. <sup>22-23</sup> Beysamy butxuenykre, inyõ umy radònykeki tule. Kaiboho dori Deuxu Riòre tetyhynytenyete jiarÿ tiire, Hãbutyhyhykÿ Riòre wahe. Kia mahãdu eramy ijira Riòre

rỹikeki beysake. Beysa tyhyki tai. Biu-ki dori aõwiihikỹ bitakre. Deuxu rybemy rybedu mahãdu tule rotỹỹnyrenyire iòraru-ki. <sup>24</sup> Kobe làhàxe kaiboho ityhy mahãdu abedesanareny dorihe rexihura. <sup>25</sup> Kobe làhàxe ahàdyreny mahãdu, aramasanareny dori rehemynyre. Kobe làhàxe abedesareny, ahinanareny dori abrunareny rehemynyre. <sup>26</sup> Kobe làhàxe atyhydỹỹ sõwereny tule dori. Ilabiereny rybemy rybedutyhy aõkõ rityhynyrenyire.

<sup>27</sup> Warybe-ò taholatenyteriki inihe ararybekre. Aòludu luummy atxibenyke amykyaradureny-di, awimy idi mabeke. <sup>28</sup> Ibinamy aõma umy rarybekeki aõbinahakỹ riwinykeki, tamy bexitòenykre Deuxu-ò. <sup>29</sup> Aòsỹny-ribi anahatenykeki iyre-ribi iwyòdỹỹmy tamy bexirahòreke. Inyõ atyky riwykeki tule tamy arahana biwahinyke. <sup>30</sup> Iwese aõtxiu aõna inyõ adee rexitòenykeki, tamy biwahinyke ixyby iribi iwydykõkemy. <sup>31</sup> Aõbina inyõ adee riwinykõkemy atximahãte. Iwese tiu kia aõhõkỹmy inyõ isỹdỹỹõmykre. <sup>32</sup> Kai aluu mahãdu sohojile iluuõmyke; òrarudu mahãdu dori tuu rỹimyhỹre. <sup>33</sup> Kai aery mahãduòle tawotòemahãte, tímkyki Deuxu-ribi aõ atarasaõna. Iny itxỹte iehehe mahãdu dori widee rawotòemyhỹre. <sup>34-35</sup> Òrarudu mahãdu heka widee rihuòtemyhỹre. Iribi tahe iwesele ixiby kidiwykemy idi riwisỹnymyhỹ. Kai ta buhuòtemyhỹke idi tehuòtete ixyby iraròsòkõmyke. Tukõkeki ta Deuxu-ribi aõ atarasaõna. Aòludu luummy atximahãbenyke. Tai Deuxu-ribi aõwiihikỹ bitakre. Tai Deuxu wihikỹ riòremy mabekre.



Tii dori inywi-ò inybina-ò awire. <sup>36</sup> Awimy kaiboho boibeke, iwese boreny awimy biu-ki ratximyhÿre wese. <sup>37</sup> Inyõdee kyarakõmyke tai Deuxu adee rakyarananyheny. Inyõ taðraruna biixãwididÿÿnyõkeki, Deuxu tahe aðraruna riixãwididÿÿnyõkre. <sup>38</sup> Ainytyhyke inyõdee imyna Deuxu adee rainytyhynanyhykre. Deuxu ibutumy aõwi adee riwahinykre. Tiwesebo tõwahite wesemyna idi Deuxu adee ròwahikre.

<sup>39</sup> Aõmybo ribedeerynyre ijyyõmy relyyre: —Inyõ ruetà heka riwiòhenanyõtyhy iwitxira iny ruetà. Tukeki heka hãloo-txi wiwana resekre. <sup>40</sup> Ierysÿdÿÿ iòrysydÿÿdu, kia ratyre aõkõ ratximyhÿ. Kia uladu ratyyritinyre nihikÿmy tahe erysydu tiu taerysydÿÿdu ratyre ratxiõmyhÿre. <sup>41-42</sup> Òwòrukre nihikÿ aruety-ki roire. Aõherekibo aseriòre ruety-ribi òwòru rÿnysiõ tarasamy tewisÿnyteri. Kia heka itxenadÿÿdu tate. Juhuu òwòrukre aruewo-ribi bitakre. Idi tahe betehemy iruewo-ribi aõsõmo bitakre. <sup>43-44</sup> Òwòru wihikÿ tiu bederaty binaõ riwahinyõhyymyhÿre. Tule òwòru binahakÿ bederatywimy raratynyõmyhÿre. Òwòru raerymyhÿre iraty-ò itxere rÿimyhÿreu, beraty-ò retehemy awire ada ibinare aõbo beraty-ò retehemy awire ada ibinare aõbo. Figoraty uvaraty tiu iwitxira òwòru-ribi raheõmyhÿre. <sup>45</sup> Hãbuwi heka aõwimy rotÿÿnymyhÿre iwo-ki tuu rÿimyhÿremyna. Tule hãbu bina aõbinamy rotÿÿnymyhÿre iwomy tuu rÿimyhÿremyna aõbina bina. Inyõ dori aõmy raraykymyhÿremyna rarybemyhÿre.

<sup>46</sup> Kai rarybere boholaõkeki aõbo bi-

winykeki. Uritere wanidỹỹõmy. Wanyrỹmy tiwaninimyhỹtenyete tahe warybemynamy atxõhyylemyhỹtenyete. <sup>47</sup> Tiwese hãbu warybe riywinyre wese adee ararybekre. Tiu heka ariteòsinykre. <sup>48-49</sup> Hãbuõmy akoreny arelyykre. Tii warybe-ò roholare idi imynany rotỹỹnyre. Tii kiata taheto riwinyre manadelemy ria-di. Beòra iheto reseõhyyre manatyre-ki relereki wahe. Ikõmyta warybe-ò roholakõre, kawese rotỹỹnyre. Taheto uritere sukile riwinyre. Beòrau ta, urile resere. Ikyhynakõreki wahe. Kiamyta rotỹỹnyre warybe tyhydỹỹdu-ò idi ityhydỹỹdukõ-ò.

## 7

<sup>1</sup> Jesuisi tarybe rahu-di tahe Kafanaõ hãwã-ò rare.

<sup>2</sup> Tai Roma soldado dinoduõ tai ihỹmyhỹ. Teòduõ tahe binamy irubu iòhòmy roimyhỹ. <sup>3</sup> Soldado dinodu Jesuisini-ò roholareu tahe, iòrysmy rarybere. Taita judeu mahãdu kia matuariõ rex-itòenyre aõma kididykremy riteytenykremy kia webinadumy roireri. <sup>4</sup> Tahe Jesuisi nade juhu be kiamy Jesuisi rarybere: –Ka hãbu heka awi biwiòhenanykre heka. <sup>5</sup> Ka hãbu heka waijoi luu nihikỹ rare ihyymy ta dohodỹỹna hetoõ riwinyre waijoi-ò. <sup>6-7</sup> Tai tahe Jesuisi rare tii-boho-wana. Tehemyny sỹ iòhòmy rare. Idi tahe ryrowetyakile Jesuisi-wana wii riòbinyre. Aõma soldado dinodu kia biòwa-ò wahe. Rarybere he aõma soldado dinodu kiamy rarybereri: –Noõmy heka. Ihãrele teka awimy rareòle heka bedehe mynyke. Awi tate timy heka anaixiranyõtyhy dori raixỹruwỹhỹre alau adee ixitòedỹỹ-ò aõma

dori adee rybe r̄yīkekile aōweseleke wadeòdu kia reytemy reake. <sup>8</sup> Jiar̄ȳ dori inydee rad̄ȳȳdu jiar̄ȳ rare. Aōbo riwinykemy. Kia riwinyre warybemynale kia heka jiar̄ȳ rare. Wadeòdu-ò rarybewāhāraki heka: –Kia biwinybenyke. Riwinymyh̄renyrene. Kai tule marybeke, beyteke. Tahe aōwese reytemy reake. Robedeòtiid̄ȳnyre, kia tuu rarybereki wahe. <sup>9</sup> Jesuisi ròkesereri kia rarybemyh̄ò wahe: –Jiar̄ȳ ka tiu judeu mahāduy-ki. Hābuōmy rabiō watyhyd̄ȳnyamy. Rabireri riwatyhnyreri rabireri. <sup>10</sup> Soldado dinodu deòdu ròkesereri. Ixyby reytereri idi ronyre.

<sup>11</sup> Jesuisi rare teryd̄ȳna mahādu-di ijō hāwā-ò. Naī hāwā-ò heka rare. Kiemy rahyymy heka rahyyre. Sōwemy iny iheki rare. <sup>12</sup> Hāwā ijò-ki rehemynyreu tahe kia ibutumyle rehemynyre. Sōwemy iny rubudu rareò wabede-ò. Weryrybòò rurure. Ise, wytese, heka iriòre sohojihyylere. Iny sōwemy heka riheludunyre tahi-di taibru-di. <sup>13</sup> Tai Jesuisi tuu robireu, idi rexiwòtenymy kamy rarybere: –Ibrukōmyke! <sup>14</sup> Jesuisi debò ritidire caixaō-ò. Iu idi itxyydu ruhurennyre. Idi tahe rarybere: –Weryrybò, bexixake wahe. <sup>15</sup> Weryrybò rexixamy reamy ronyre. Idi rarybere. Tai tahe Jesuisi ise-ò riwahynyre. <sup>16</sup> Ibutumy tas̄y mahādu ribedeòtiid̄ȳdunyre. Tai tahe Deuxu riwowydynymyh̄reny: –Ebe, aōherewe, Rybedu nihik̄y k̄nyhe wixijumy inydeereny rehemynyre. <sup>17</sup> Kia taheka bede bede hāwāmy Jesuisini reare.

<sup>18</sup> Joaō heludu mahādu ibutumy tuu relyyre iko. <sup>19</sup> Inatxinarenny Joaō riteònyre Jesuisi d̄ȳȳraximyy kamy wahe: –Kaiwe nodu aōbo tate, ada txiò

aõbo ini nodutyhy ariraðrenykre? <sup>20</sup> Idi Jesuisi-ò ròrenyrene tuu itỹỹraxidỹỹmy; –Kai we nodutyhy tate? Ta txio aõbo ini ijõ ariraðrenykre? <sup>21</sup> (Iu ta Jesuisi yla aõkõ webinadu, binanamy binana mahãdu riteytenyra, tyytybybinamy ykydu mahãdu, iruetà mahãdu sõwemy tule.) <sup>22</sup> Irahudi ta Jesuisi rarybere Joaõ ijoi-ò: –Bòðsebenyke. Ibutumy kamy tabitenyta taholatenyta Joaõko-ò tuu belyybenyke: –Iny ruetà bina mahãdu retehererimy, Iny rutiàre mahãdu rariarerimy, tyybinamy binana mahãdu reytererimy, iny nohõtity mahãdu roholarerimy. Iny rubu mahãdu heka rubu-ribi rexixarerimy, urimynodu mahãdu heka Rybewihikỹ Tỹmyra-ò roholarerimy. <sup>23</sup> Iny bedesa heka rare, warybe tyhydỹỹdu mahãdu.

<sup>24</sup> Joaõ heludu mahãdu iribi ròhònyreu tahe Jesuisi rarybere Joaõ bededỹỹnanamy: –Aõmybo wahe Joaõ-di tõhõtinytenyete aõmy tubedi nohõtinyrenyre tamy itxerena bederahy tòitenyteki wahe. Otxirarade wese yhy-ki idi tahõtinytenyete. <sup>25</sup> Aõma hãbu urimynodutyhy aõbo tahõtinytenyeteri. Hãbu tyywihikỹdiremy tahe tahõtinytenyete. Iwese iòlò taheto wihikỹ-ki ratximyhỹre wesemy aõbo tahõtinytenyeteri. <sup>26</sup> Wadee manarybeke aõbo betehékemy tahõtinytenyeteri. Deuxu rybeduõmy aõbo tahõtinytenyete. Inatyhy tii rare. Kia ratyre heka tii rare. <sup>27</sup> Aõma dori tyyriti-ki rarybemyhỹre:

–Tii heka wakoki kadehemynykemy ratximyhỹre, tamy relyykemy, ryõ riywinymyhỹre.

<sup>28</sup> Inatyhy kaa rare. Tie heka ibutu hãbu ratyre ratximyhỹre. Ihãrele tahe inyõ Deuxu Iòlòna-ki

ratxikeki heka iratyre ratximyhÿre. <sup>29</sup> Tahe nieru butudÿÿdu mahãdu kia-ò roholare. Tule sõwemy iny kia-ò roholare. Tiiboho Deuxu bedede ywina tyhydÿÿdu mahãdu roire. Tule Joaõ Sebedÿÿna mahãdu roire. <sup>30</sup> Fariseu mahãdu tahe, bedede ywina erydÿÿdu mahãdu tahe Deuxudeewina dera rare. Tai Joaõ-ò ratisebemy roiõtyhy. <sup>31</sup> –Mowesebo heka wijinabòdu mahãdu wesemy ratxireri. <sup>32</sup> Uladu mahãdu wesemy tiiboho ratxireri. Tiiboho ijõ uladu mahãdu-ò ryrymyhÿre: –Inyboho rawiunyre, tahe kaiboho teseõtyhy. Wobina wiu rawiunyre tahe kaiboho tahinyõtyhy. <sup>33</sup> Joaõ Sebedÿÿdu renareherenyõmy rÿire, vÿi riõõre. Ihãre tahe kaiboho tarybete: –Tii tyytybybina-di ihÿre. <sup>34</sup> Hãbutyhyhykÿ jiarÿ rare, Deuxu Riõre wahe. Jiarÿ reroximyhÿre tule reõmyhÿre. Tai tahe tarybemahãte jiarÿ wabyre nihikÿlemy wamomohõkÿremy. Jiarÿ riki õrarudu liinatyhy heka jiarÿ rare, nieru tarasadu liina wahe. <sup>35</sup> Ihãre tahe aõikõkõlemy heka taraykynymyhÿtenyete ihãre taheka õbitilemy ixi-di tahõtinymahãtenyete.

<sup>36</sup> Fariseu mahãduõ heka Jesuisi ritobinyre taheto-õ roximy. Jesuisi tahe rare idi ronyre roximy. <sup>37</sup> Kia hãwã-ki tahe hãwyyõ rasÿnyre, wydena wahe. Tii heka Fariseu heto-ki riroxirerimy roholareu, tii tule rare. Tahe hyna õwyhykÿ rimyre. Alabastro aderõnahynani rare. <sup>38</sup> Hãwyy tahe Jesuisi hewomy ronyre, iõhõmy. Tahe aderõna ritxiwire iwatyre. Tule iwa-ki ruworuwòmÿ ratximyhÿ irube-di iwa risuhõra idi irade-di rabunyre. <sup>39</sup> Fariseu kiamy robireu,

ixideele rarybera: –Kia hābu Deuxu rybeduō aōkō rare. Tuukeki tii hāwyy rieryke aōhāwyybo tii ratxireri. <sup>40</sup> Jesuisi tahe fariseu-ò rarybere: –Simaō, adee ararybekemy watzireri. Simaō tahe rarybere: –Manarybeke Waerydỹỹdu! <sup>41</sup> Tahe Jesuisi rarybere: –Nieru huòteduō heka inatxi hābu-ò nieru riwahinyre. Ijō 500 rihuòtera, ijō tahe 50my rihuòtera. <sup>42</sup> Idi tahe hābu inatxi nieruōhyymy rỹire òðsemy tanieru tamy. Tai tahe nieru huòtedu riwotòenyrenyre tahe ritusanyre, wiwana iòwy riixāwididỹỹnyre. Tibo huòtedu ilàhànadỹỹdu tyhyre. <sup>43</sup> Simaō dirawyònyde: –Kia òsana 500my rihuòtere. Tahe Jesuisi rarybere: –Inatyhy rare. <sup>44</sup> Jesuisi tahe hāwyy, riijemy, tahe Simaō-ò rarybere: –Kahāwyy ini bidiijeke. Jiarỹ nadehemynydeu, tii tarube-di wawa risuhòra. Kai beeō tadiwyòte. Tii tarube-di riwawasuhòra. Iu tarade-di riwawarabunya. <sup>45</sup> Kai tiwawehityhynanyòte rehemynyrau, tii tahe riwaatyōhyymy ratxireri. <sup>46</sup> Kai warade-ki òlỹre tetxiwiòta tii tahe aderòna wawatyre-ki ritxiwire. <sup>47</sup> Tai tahe adee ararybekre. Tii inatyhymy waluure. Taòraruna ixāwidỹỹna-ki. Inyō iòraruna ibutemy raixāwidỹỹnymyhỹreki, tii inatyhymy aōkō taòraruna ixāwidỹỹdu luure. Ijō tahe inatyhyhykỹlemy taòraruna ixāwididỹỹdumy reamyhỹre. <sup>48</sup> Tai Jesuisi hāwyy-ò rarybere: –Aòraruna reixāwididỹỹnyre. <sup>49</sup> Tai roxidu mahādu widee raryberenyre: –Mohābubo kia rare? Tii òraruna riixāwididỹỹnyrerimy. <sup>50</sup> Tahe Jesuisi hāwyy-ò rarybere: –Atyhydỹỹnamy textarasadỹỹnyte aòraruna sòwe-ribi biu-ò hena

tetateri. Mata hỹny.

## 8

<sup>1</sup> Rexideleny raremyhỹ ralòralòmý hãwã hãwã ikòkòmý reamy rare kia aõma Deuxu Rybewihikỹ Tỹmyra relymy rare. Tai ierdỹỹna mahãdu waòinatxi reuròmý idi ròirenyre. <sup>2</sup> Tule hãwyyõ tiiboho wana ròirenyre Ijõta Marie Madalena heka rare. Juhuu tahe tyytybybinahakỹ-di raremyhỹ. Idi debò inatxi reuròmý tyytybybina iribi riòlòdỹỹnyre. <sup>3</sup> Ijõta Joana Kusa hãwyy rare. Tii iòlò Herodi heka aõmysỹdỹỹdu heka rare. Tule ijõ hãwyyõ Susana inire. Idi tule ihona hona Jesuisi taijoi-wana ibutumy tanierureny-di riwiòhenyrenymyhỹre.

<sup>4</sup> Idi iny sõwemy titxiribibo dirahude kia-ò. Kia mahãdu-ò heka Jesuisi ribedeerynyre ijyyõmy. <sup>5</sup> Alòbòròna-di dehuu heka ròhònnyre taoworu-ò. Alòbòròna-di imahãdu ijõ ryro-txi resere. Tai heka iny rariamyhỹre alòbòròna tyre-ki. Nawii tule tuu riroximyhỹ. <sup>6</sup> Mana rotysu-txi ijõ rejuxunyreri mana rotysu-txi suu dori ibututere tai tahe iraruxiõlemy raumynyre. <sup>7</sup> Ijõ tahe edey-txi resere. Raumynyreu tahe edemy riòhỹtỹnyre. <sup>8</sup> Ijõ resere suwi-txi. Tai ta raumynyre idi sohoji alòbòrònaty-ribi 100my raratynyre. Jesuisi tamy rarybere: —Kaiboho òhõtirenydikeki heka inatyhymy warybe-ò boholabenyke.

<sup>9</sup> Tai tahe Jesuisi-ò rỹỹraxinyrenyrene: —Aõwe kaa tekewesenanyteri? <sup>10</sup> Jesuisi rirawyonnyre: —Kaiboho heka teerytenyte aõbohe wasimy ijyy rare Deuxu dori adeereny ritỹnynynyre. Kia tahe rare,

Deuxu Iòlòna aõmydỹñnana wahe. Ijõ iny-ò tahe rarybere ijyy-di relyyre.

Tai robikre tahe, rieryõtyhyke. Roholarenykre tahe rieryõtyhyke, timybo juhoo Deuxu rybemy rybedu mahãdu rarybere wese.

<sup>11</sup> Aõmybo kia aõijyybo kia rare wahe. Alòbòròna heka Deuxu Rybewihikỹ wese rare. <sup>12</sup> Ryro-txi resere heka ijohonadu wesemy rare. Deuxu ijyy heka resera ede sõwey-ki. Tii heka Deuxu Rybe-ò roholamyhỹre mahãdu wese rare. Idi tahe Satanasi heka ritamyhỹre iworeny-ribi. Tai rityhynyrenykõmy idi biu-ò rahenyõkremy.

<sup>13</sup> Ijõ tahe manasuõ-txi resere heka, kia Deuxu Rybe-ò roholamyhỹre mahãdu wese rare. Rybe-ò juhoo roholamyhỹre deysana-di rityhynymyhỹre. Kia manatyre resera heka irarutiõhykre. Iny mahãdu wese heka rare. Idi ikyhynakõreki, iwodelòlòtõmoreki urile tatyhydỹñna riatymyhỹre.

<sup>14</sup> Ijõ tahe edesuyky-txi resere heka, kia Deuxu rybe-ò roholamyhỹre, idi iworekena sõwemy, iaõdelòlòtõmomy, idi ityhyna wahe urile riòhòtỹnymyhỹre. Tai ròwiòhenadỹñõhyymyhỹre Deuxu tyhydỹñna-ki. (Kia tahe alòbòrònaõ ede yky-txi resera tahe iny umy witxira wesemy heka rare. Iny umy tyhyna idi ratxireri heka kia wesemy kia ede-txi iny reseremy. Aõma kia inytyhyna ratxireri. Tiu heka ityhydỹñna riòlòdỹñõtyhy. Kia alòbòròna tahe tai heka rokuõtyhy.) <sup>15</sup> Kia ijõ alòbòròna suu witxi-txi reserá tasỹ iwitxira inywesemy rare. Kia ijohonadu aõma rierymyhỹre. Irayky-ò ralòmyhỹre. Kia iwotyhywo-ò òbitimy ratxirerí tahe, òbitilemy



aõ riwinymyhÿre. Iwese kia alòbòròna sòwemy ratyy rawahinyre wese tahe tii rare. <sup>16</sup> Ijõ ijyy tahe kiamy roire. Uritere inyõ loosònaõ rideõmykre butxi rawo-txi ada herina rawoõ-txi aõbo. Loosòna bidekre bedewiõ-ò. Tai tahe ibutumy bedede ritoosònanykre. <sup>17</sup> Aõ heka tai wasimy ratxiõhyymyhÿre. Aõutxumy dori ibutumy erynamy rarekre. <sup>18</sup> Tahe bexijebenykre ijohona-ò. Kia sòwemy idi rÿirerimy ihÿre heka sòwemy rimykre. Kia urihimyo iwo-ki rÿireri heka iribi ritakre. Idi ibutumy rÿireri heka iribi ritakre. Urihimyo iribi iny ritakre. Urihimyo iwo-ki rÿireri heka hulemy iribi ratakre.

<sup>19</sup> Jesuisise, tariòreboho tamy doide. Tii ròbedeerydÿÿmyhÿki isirare tamy dehemysÿ iny sòwe òraru-ki. <sup>20</sup> Tai inyõ Jesuisi-ò rarybere: —Adihe wa aseriòre boho hewa ahanakile ratxireri umy robikemy ratxirenyreri. Adee rarybekemy. <sup>21</sup> Tai Jesuisi rarybere: —Waseriòre wa kia Deuxu rybe erydÿÿnaõ rare. Kia tamy roholamynyrele heka rityhynymyhÿrele heka nadi wesele rare. Tii-wana iwese waseriòre wesele rare.

<sup>22</sup> Iribi tahe hãworo rorukurenyreu Jesuisi rarybere: —Ròkòireny kanawe-ribi ijà-ò. Idi tahe roirenyre. <sup>23</sup> Jesuisi ròròmy tòru-ki. Idi tahe yhynihikÿ òbònihikÿ-wana tamyreny reare. Ruberurenyre tiiboho rÿmyrenyke lau. <sup>24</sup> Tai tahe wylemy riixixanyreny: —Erydÿÿdu, Erydÿÿdu rekekoarenykre berahatxi-ò. Idi Jesuisi donymy deademy tahe yhy dee rarybere: —Biyryke, Biyrykewa. Yhy ruhumy resere. Òbò tule ruhumy ibutumy riyyre, iny rurukre. <sup>25</sup> —Kaiboho tiwexe ainatyhynareny? Tiiboho rabedeòtidÿÿmy

ruberumy widee raryberenyre: —Aõhãbuwe kaa rare. Yhyhykỹ dori òbò dori irybemy reòbyreri.

<sup>26</sup> Kanawe-ribi ijà-ò rehemynyrenyire Kerase bedè-ò kalileia aho weribi-ò. <sup>27</sup> Hãbuõ heka tamyreny dobehede hãwãhãkỹ-ribi tamyreny dobehede. Tiiboho riòtyròny hãwãro-ribi iu ta tyytybybina-di ratximyhỹre hãbu tiu rexytyynyõhyymyhỹre tatyy-di hyymyhỹre. Kiamy wabedekihyyle ratximyhỹre. <sup>28</sup> Jesuisimy robireu tahe bedetxile resere tairy-di ryryre: —Aõhebo biwasỹnykre Jesuisi. Kai Deuxutyhy Riòre atxiteri. Uritere aõhõkỹmy wasỹdỹõmykre. <sup>29</sup> Tahe Jesuisi heka tyytybybina iribi riòlòdỹnyre. Sõwemy dori riuwinyre hãbu rimymyta. Riuwinyre idi rihure. Tai heka tii uritiere womati reroti-di ritaataamy riijemyhỹre. Ihãre tahe ixi-ribi riòròmehỹre. Tai bedero-txi reamyhỹre tyytybybinamy rawonymy. <sup>30</sup> Idi tahe Jesuisi rỹrãxire tamy: —Mobo anire? —Sõwemy wanire. Tyytybybina sõwemy dori tuu rexykynyreki. <sup>31</sup> Tiiboho raryberenyre: — Uritere bedebinahakỹ-ò wateòdỹnyõmykre. Uritere sỹu-ò noõma rarekremy hãlòtxi-ò. <sup>32</sup> Iu tahe ixỹni juramy riroximyhỹ hãwãlò-ki. Tai tyytybybina mahãdu Jesuisi-ò rarybere: — Biwateònyõke. Kowa ixỹnijura-ò biwateònybenyke aralorenkykremy. Tai Jesuisi riròtenyrenyire. <sup>33</sup> Iu kia hãbu-ribi tyytybybina ròhònyrenyireu tahe ixỹniwo-ò ralòreki wahe. Raòlònyra ijò-di rejuxunyire taraò wahe. Ibutumy ahoro-txi rejuxunyire. Ibutumy rururenyire berahatximy. <sup>34</sup> Ixỹni-di itxeredu mahãdu ibutumy raijiranyra hãwã-ò tule relyyrenyire tuu iny rasỹnymyhỹre

mahādu-ò. <sup>35</sup> Tai iny dirahude tamy itxeremy. Idi tahe rare Jesuisi-ò. Hābu robimyhỹrenyre tatyky-di ronymyhỹ ibutumy rexiywinymy Jesuisi-ribi iòhòmy ronyre. Kia iny mahādu heka sōwemy ruberure rabedeòtiidỹnyymyhỹre. <sup>36</sup> Ibutumy relyyre. Kia tyytybybina timybo aõhebo rotỹnyremy. <sup>37</sup> Kia Kadara bedeludu kia mahādu tahe rexitòenyre Jesuisi-ò iribi ròhònykremy, ilau ruberurenreki wahe. Idi tahe Jesuisi ròkòsere ixybyle reare hāworo-ò. <sup>38</sup> Hābu tahe rexitòenyre Jesuisi-wana rakremy, kia tyytybybina-di iwo-ki ratximyhỹ wahe. Tamy rarybere: <sup>39</sup> —Aõkõre bøkese aheto-ò. Ibutumy belyyke aõbo adee Deuxu riwinyremy. Tai ta ibutumy hāwā hāwā-ò relyyre aõhebo Jesuisi risỹnyremy.

<sup>40</sup> Kia iny sōwehekỹ mahādu heka teysa-di rimyre ridyremyhỹre riraòhyymy ratximyhỹreny. <sup>41</sup> Kia hābu dohodỹdu hetowo erydỹdu tahe nade Jesuisi-ò. Tii heka dohodỹnana dinoduõ rare. Ijairu inire Jesuisi-ò sutxi resere: —Mynake wasỹ Jesuisi <sup>42</sup> Jiarỹ wa wariòre sohojile rare waòinatxi reuròm ywya. Tii ka rurukremy roireri. Idi ta Jesuisi rare isỹ-ò. Sōwemy iny Jesuisi riheludunyre.

<sup>43</sup> Hāwyyõ raremyhỹ heka hāwyy webinadu rare iòhò Jesuisi rexisỹny waòinatxi beòramy heka idi ròhònyre hykyky hālubu ratxireri. Tiu heka inyõ retytenyòhyymyhỹre luahidỹdu, òhotibedu mahādu he risiranyre. <sup>44</sup> Tai tahe Jesuisi tykysi-ò reare. Tai ta aõwesele reytemy reare. <sup>45</sup> Jesuisi rarybere: —Mowe watxi reare? Ijõ rarybereri: —

Erydÿÿ mahãdu aõkõre, jiarÿboho aõkõre. Pedro rarybere: —Aõheta sõwe iny kaki rÿireri. Timyk-ibo tuu tÿÿrayiteri. <sup>46</sup> —Jiarÿ dori reeryre. Mobo watxi rearaule reytera. <sup>47</sup> Tiihe hãwyy ratxire-myhÿ ramytatamy. Tamy ramytatamy heka tamy rehemynyre. Iòraò rexibedenyre. Ibutumy iko tuu relyyre. Aõherekibo itxi reriramy. <sup>48</sup> Tai tahe Jesuisi tamy rarybere: —Lerÿ, atyhydÿÿna myna teyteta. Ta bexiywinymytahÿny maa!

<sup>49</sup> Kie raryberemyhÿwanale tasÿ iny wixiraõle dehemynyde. Kia aõma dohodÿÿna wedu heto-ribi dehemynyde. Ijairu-ò rarybere: —Ariòre wa rura. Uritere ta òhotibedu-ò ijiraõma ixinamy tii rakre. <sup>50</sup> Jesuisi kia-ò roholareu tahe Ijairu-ò rarybere: —Urile bityhybenykre. Breburenyõma tii reytekre. <sup>51</sup> Tii rehemynyre heto-ò. Jesuisi ralòre iny deramy reare. Tii wana rake lau. Kia uladuse, uladutyby, Pedro, Txiau, Joaõ wana kiale ralòre tamy tiiboho wana. <sup>52</sup> Ibutumy rasÿbinamyhÿ Jesuisi rarybere: —Ibryrenyõmyke hewa rurumy aõbo roire, urile rõrõmy roireri. <sup>53</sup> Ibutumy riryrenyneri tiiboho urile tai idi risinyrenyre rurumy roimyhÿki. <sup>54</sup> Jesuisi ihãre ta hirari debò-ki rimyre. Tai tahe idi rarybere: —Hirari, bexixamy, bodonyke. <sup>55</sup> Ityytyby aõwesele ixityre tamy ralore. Dexixade, donyde. Rÿsÿna hirari-ò riwahinykemy Jesuisi rarybere. <sup>56</sup> Tai tahe tybyboho sõwemy rabedeòtidÿÿrenyre rabedesarenyre. Jesuisi rarybereri: —Urile wamy ijyyrenykõmykre. Aõbo adeereny rewinyramy.

## 9

<sup>1</sup> Jesuisi tahe tawaòinatxi reurò taerydÿÿna

mahādu ributunyre. Taruru tamy riwahinyre tyytybybina iny-ribi ritakremy. Tule iny webinadu mahādu riteytenykremy. <sup>2</sup> Tule rarybere tamyreny: —Kaiboho belyybenykre Deuxu kia Iòlònamy tule webinadu biteytenybenykre. <sup>3</sup> Aō awanareny wydyrenyōmykre debòna aōkō, aōna hyna tule aōkōre. Tule rysŷnake aōkō, nieruke aōkō. Ainatxityyke aōkōkre. <sup>4</sup> Hāwā-ki hetoō-txi malòkeki taile bonykre. Hāwāribihyyle bòhònykreu, kia heto-ribi bexitakre. <sup>5</sup> Ibinamy aramyrenykreki, urile bixitakre. Idi òlòna-ki, awa bitòtynykre ibinamy tai tahatenytaki. <sup>6</sup> Tiiboho ròirenyre hāwā sōmo sōmo-di Rybewihikŷ Tŷmyramy relyyrenykemy ròirenyre. Tule iny webinadu ibutumy iteyteynyrenyre hāwā hāwā-di.

<sup>7</sup> Idi tahe iòlò Herodi ibutumy heka aōna aōna rierymy ratximyhŷ. Tai tii bede ryy rieryōhyymy ratximyhŷ aōbo riwinykre. Roholamyhŷre heka iny rybe rybe-ò. Joaō heka rexixamy ratxireri. <sup>8</sup> Ijō tahe kiamy rarybereri: —Eliasile ratxireri. Ijō rarybere Deuxu rybemy rybeduō ratxireri. <sup>9</sup> Tai tahe Herodi kiamy rarybereri: —Jiarŷ heka Joaōra resymy rewahinyre. Mobo ratxireri iwese Joaō raremy wese he ratxireri. Moobo ta kiamy raholamy watxireri. Tai Herodi tuu robikemy riwisŷnymyhŷ.

<sup>10</sup> Jesuisi eryna iko relyymyhŷreny ibutumy aōbo aōhebo rotŷŷnyrenyremy tabededŷŷnana. Jesuisi riòlònyrenyre ijō hāwā witxira-ò, Besaida hāwā-ò wahe. <sup>11</sup> Tai iny sōwemy hekŷ rieryōlemy idi ta rieryreu tahe sōwemy ihemy rare roirehe. Jesuisi he ributumy ikole relyyre. Deuxu Iòlòm

relyymyhÿre. Tai ròteytedÿÿmyhÿ webinadu mahãdu. <sup>12</sup> Aõtxu tahe katxioromy Jesuisi erylina mahãdu, waòinatxi reurò mahãdu tamy raryberenyre: –Bede biywinyke ibutumy iny rÿireri hãwãõ-ò tarÿsÿna õbradÿÿmy. Inyboho dori bedero-ki ratxirenyreri. <sup>13</sup> Tahe Jesuisi rarybere: –Kaibohole rÿsÿna biwahinybenyke. Rirasÿnyrenykemy ierydu mahãdu diwyònydenyde: –Aõheretahaka, iruyre orotxu idi inatxi uturale heka roireri. Aroikemy aõbo wadireny atxiteri rÿsÿna õbradÿÿmy inysõwe-ò. <sup>14</sup> Txibo 5000 hãbu sõwemy heka rÿimyhÿ. Jesuisi rarybere: –Bihitxinybenyke 50 iny heka iny bisÿnybisÿnybenyke. <sup>15</sup> Tii myna ieryna mahãdu rotÿtÿnyrenyde. <sup>16</sup> Idi tahe Jesuisi utura inatxi, orotxu iruyre rimyde. Biu-txi reteheremy rexitòenyre. Deuxu reàlère tamy rexitòenyry riyreyrenymy riwahiny taerydÿÿna mahãdu-ò. Riwyrenyde tahe riwahiriwahinyrenymy idi roire. <sup>17</sup> Ibutumy riroxirenyde idi rihydyrenyde. Ihãre ta waòinatxi reuròmÿ hyna ixyby rÿximy rauhenyde. Idi ierydÿÿna mahãdu ixyby ributunyde.

<sup>18</sup> Jesuisi heka ixisohojile rare ixitòedÿÿmy. Ierydÿÿna mahãdu heka irarò-ki rÿimyhÿ riijemy rÿimyhÿ. Idi tahe tamy nade tÿÿraximy: –Moboho jiarÿ raremy wamy raryberenyre? <sup>19</sup> Tai narybedenyde: –Ijõ Joaõ Sebedÿÿnamy adireri. Ijõ ta Eliasimy adireri. Ijõ ta juhuu Deuxu rybedu mahãduòmÿ adireri. <sup>20</sup> Jesuisi tamy rarybere: –Adeereny tahe. Mobo jiarÿ watxireri. Idi Pedro rirawyònyde: –Kai Kristu tate, Deuxu deòdÿÿna

wahe. <sup>21</sup> Tahe Jesuisi tamy rarybereri: –Uritere tuu iny-ò ijyykõkremy. <sup>22</sup> Jiarỹ Hãbutyhyhykỹ, Deuxu Riòremy, aõhõkỹmy arotỹỹnykre. Judeu wedu mahãdu, xiwena wahidỹỹdu wedu mahãdu, bede ywina erydỹỹdu mahãdu waderamy reakre. Jiarỹ arurukre. Inataõna txu-di arexixakre. <sup>23</sup> Idi ibutu-ò rarybere: –Wahemy kanake mahãdu urile ixi dee rexiiõnykre. Txuõ txuõlemy taitxeò rimymy kidiwaheludunykre. <sup>24</sup> Waòrary-ki rubudu heka biu-ò hedukre. Tukõkeki urile ixinany inatyhymy rurukre. <sup>25</sup> Aõmydỹỹnanamy iny ritakeki, tahe taumy riõnonykeki, kia heka aõmy aõkõkre. <sup>26</sup> Inyõ raixỹrukeki warybe lau tule jiarỹ Hãbutyhyhykỹ, Deuxu Riòre wahe, tai ilau araixỹrukre. Deuxuko-ò ýjuko-ò iu adehemynysýu Deuxu Iòlõna-ki wahe. <sup>27</sup> Inatyhymy heka adeereny ararybekre. Ijõ kaki rare. Deuxu Iòlõnamy robikre tarubukõtyre

<sup>28</sup> Tahe debò inataõ txuu rỹidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire Deuxu-ò rexitðenykemy. <sup>29</sup> Jesuisi rexitðenyrieriu tii tamyreny rexiwixiranyre iu rexitðenyreu ityy heka urile rabòtòranyre. Iurahakỹmy relere. <sup>30-31</sup> Tahe tamyreny dexitỹnynde Eliasi, Moisesi-wana tahe rarybemyhỹre Jesuisi-wana. Jesuisi rubunamy Jerusalé hãwã-ki widee rarybemyhỹreny, kia Deuxu bedeywidỹỹnana myna. <sup>32</sup> Pedroboho rõrõrenyeri. Idi tahe rexixarenyre, tiiboho Jesuisi loosõnamy robirenyre. Eliasi, Moisesi-wana tiiboho tuu robirenyre. <sup>33</sup> Ròireriu, Pedro rarybere Jesuisi-ò:

—Wawedu, awityhymy inyhe inyboho kaki ratxirenyreri tahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò. Pedro rieryõlemyhỹre aõmybo rarybemyhỹ.  
<sup>34</sup> Tai rarybereu Nonoe dobehede iubòròna bedede ritòbònyre. Pedro, Txiau, Joaõ-wana ruberumyhyrenyremy. <sup>35</sup> Tahe ròhònymy reare rybeuni iuribi: —Kia heka Wariòre waluu rare. Kaiboho tamy bohohabenyke.  
<sup>36</sup> Tiiboho reteherenyre tahe inyõmy robiòlerenyre Jesusilemy ta robirenyre. Tahe rybeõmy rỹirenyre. Iu inyõ-ò aõmy raryberenyõre tuu.

<sup>37</sup> Tai tahe ijõ txu ratò-ribi dehemynydeu iny sõwehekỹmy Jesuisi-ò ròirenyre. <sup>38</sup> Inyõ rarybere: —Erydỹỹdu, wariòre adee redyreri. Beteheke wariòre sohoji-ò. <sup>39</sup> Tyytybybina rimymyhyre tahe riatyre bedede-ò. Idi tahe urile txuu riyiyidỹỹnymyhyre. <sup>40</sup> Aerydỹỹna-ò jiarỹ rarybera tyytybybina riteònykremy, tahe tiiboho riixãwidỹỹnyõhyrenyre. <sup>41</sup> Jesuisi tamyreny rarybere: —Tiwesebededỹỹnanabo wijinabòdu ityhyõlemy rỹira. Tiwesebededỹỹnanabo akyreny-ki ariijekemy. Wadee uladu bididyke.  
<sup>42</sup> Tahe didydenyde Jesuisi-ò. Tahe tyytybybina urile riitxỹteitxỹtenemy resere. Idi tahe urile bedede-ki rexiraòhòhòremy sutxi resere. Idi rarybexinymy. Rybexi irywomy ròhònymyhyỹ. Jesuisi tahe tyytybybina iribi riòlòdỹỹnyre uladu riteytereyre. Idi uladu tyby-ò riwahinyre.  
<sup>43</sup> Ibutumy iny Deuxu aõwidỹỹna-di bedede riòtiinyre.

Jesuisi taerydỹỹ mahãdu-ò rarybere:

<sup>44</sup> —Boholatyhyki warybe-ò, Deuxu Riòre



Hãbutyhyhykÿ heka rawahidÿÿkre hãbu mahãdubinaõ-ò. <sup>45</sup>Tiiboho rierykõlere. Kiamy dori ilaureny riwore. Tahe ruberurenyre tÿÿraxidÿÿki.

<sup>46</sup> Ryro-ki ierydÿÿna mahãdu widee rarybemyhÿre: —Mowexe wiratyre ityhykremy. <sup>47</sup> Jesuisireny rexiraykynymyhÿreny rieryre. Idi tahe uladuõ rimymy rarybere. Jesuisi uladuõ wana ronyrenyra. <sup>48</sup> Tahe taerydÿÿna-ò rarybere: —Moõ uladu ka wese wadee riwiòhenanykeki, riwawiòhenanyre. Moõ riwawiòhenanykeki, tule waha riwiòhenanyre. Mobo deòdumy reakre, tii ibutu ratyrekre.

<sup>49</sup> Joaõ tamy rarybere: —Erydÿÿdu, jiarÿboho riòlòdÿÿnyrerimy tuu rabirenyra inyõ tyytybybina-di animy rehureriò. Tahe iny mahãdureny aõkõ rare. Tahe jiarÿboho tamy reijõnyrenyre iny inyijoirenyre aõkõki. <sup>50</sup> Tahe Jesuisi rarybere: —Biijõnybenyõkre. Inyõ inymyrenydòdukõkeki, inyweribireny-ki tii rare.

<sup>51</sup> Tahe Jesuisi bededÿÿnana iixihidu iòhòmy idi biu-ò rakreu, tii Jerusalẽ hãwã-ò rakremy rexiywinyra. <sup>52</sup> Tahe takomy inybute bede riywinyre. Tai itÿhinamy rutòmy Samaria hãwã-ò. <sup>53</sup> Tai tahe Jesuisi deramy rekoarennyre Jerusalẽ-ò ramyhÿreki. <sup>54</sup> Txiau Joaõ-wana kia rierymy tahe narybedenyde: —Wanyrÿhÿkÿ, adee wikeki heòty biu-ribi ityreny kedesekey aritxuhorennykre risõrennykremy. <sup>55</sup> Tahe Jesuisi irybereny-ki ibinamy rahare tahe reburemy taò riòsere iribireny. <sup>56</sup> Idi ta iwitxira hãwã-ò roire.

<sup>57</sup> Tahe Jesuisi taerydÿÿna mahãdu-wana roirenyreu, hãbuõ tamy rarybere: —Ihyymy

awana arakre titxibo makreu, ahékile arakre. <sup>58</sup> Tahe Jesuisi tamy rarybere: —Ijòrò heka ihãloo dire. Nawii týtýt dire. Tahe jiarỹ, Deuxu Riòre wahetoõre, Hãbutyhyhykỹ rare hãrele. <sup>59</sup> Tahe ijõ hãbu-ò rarybere: —Biwaheludunyke. Tahe tii dirawyònyde: —Wanyrỹ, Waha heka rurura. Tai tahe juhoo arituunyke. <sup>60</sup> Jesuisi rarybere: —Txioinihe, rubu mahãdu wii rituunyke. Kai tahe makre Deuxu Iòlõnamy belyyke. <sup>61</sup> Ijõ rarybere: —Wanyrỹ, araheludunyke. Urile juhoo wasỹ mahãdu arawehityhynanyke. <sup>62</sup> Tai Jesuisi dirawyònyde: —Inyõ ritelenykeki, tahe ixyby òðsemy rexinohõtynykeki, tii waheludu mahãduõmy rareõtyhy.

## 10

<sup>1</sup> Jesuisi 72 hãbu heka ritare inatxi inatximy tako-ò tihãwãhãwãtxibo rakreò bedé riywinyre. Kiamy tamyreny rarybere: —Waijyymy rybemy boibenyke. <sup>2</sup> Kiamy heka tamyreny rarybere: —Waaõmysỹdỹỹna heka inihikỹ-di isirare. Iwese maixõmo iny riòròmhyhỹre wese heka waaõmysỹdỹỹna rare. Maixõmo oworu heka inihikỹre, idi aõmysỹdỹỹdu heka ibutere. Tai oworuwedu-ò aõmysỹdỹỹdumy bexitòenybenyke, Deuxu-ò wahe. <sup>3</sup> Kiaboho heka budoeni wesemy iyreny-ki boibeke. Kia-ribi nohõti losaõmykre. <sup>4-5</sup> Tai heka bexiijebenkyre anierureny wydyõmy. Aõna aõna renyhynykeõ aõkõ awareny wydyõmy iny-ò ryberenyõmy iny iny-ò ryberenyõmy, rywetyatyamy abededỹỹna nodỹỹmy. Inyheto-ò malokreu Deuxu deysanamy birybenybenyke. <sup>6</sup> Tii adee awirenykre wana heka teysakre

kahetoludu. Tai tahe ixibyle adee Deuxu deysana ròðekre adee awiõhyykeki wahe. <sup>7-9</sup> Aõma hãwãõ-ò malò-wana uritere deuròsò deòròsòõmy matximahãke. Tai tehemyyny atxiterikile bexiijemahã tetxilemy. Uritere rÿsÿna òta òtaõ aubeò ritidi wana uritere rybeòlòõmy. Birÿsÿmy rybeõlemy. Awiòhedÿÿmy ruruke wana bimymyhÿ aõbo adee riwahinymyhÿre. Iny raaõmysÿdÿÿmyhÿre heka rõtamyhÿre. Kia wese heka biwinymyhÿke. Birÿsÿmahãke aõbo adee riwahinymyhÿke. Binaõ roiwana biteytenymahãbenyke. Kia wesemy tamy marybeke: —Deuxu Iòlòna heka iòhòmy ihÿre. <sup>10-11</sup> Hãwãõ-ò birònykeki, inyõ aradyrenyòkeki, boibenyke hãwãky-di. Myÿ marybebenyke tamyreny: —Aõbo wawa-ki hãwã-ki rÿireri. Wawa aritòtynykre bryby iribi ròhònykre. Adeereny ariteòsinykre nohòti ijaranamy tamyreny. Nohòti losarenyõmy Deuxu Iòlòna adeereny iòhòmy dehemynyde. Tahe kaiboho teramy tekoatenyte. <sup>12</sup> Aõma ywisidÿÿnatxu heka tiiboho aõhòkÿmy rotÿÿnyrenykre. Jesuisi rarybere: —Tiro hãwã Sidõ hãwã heka awimy aribireny ròhònykre. <sup>13</sup> Kobe làhàxe kai Korasì hãwã, tule Besaida hãwã. Òhotibe ayreny-ki rÿire, kia heka Txiru hãwã, Sidõ hãwã tule kire-wana taõ òta òtareny-ribi rexiatyreny. Tiiboho tykysausuhukÿtyre rexisÿnyre bryby-di rexiereny. <sup>14-15</sup> Òhotibetxumy heka Deuxu raruxetòenykre Txiru hãwã mahãdu, Sidõ hãwã mahãdu! Kaiboho tahe aõkore. Deuxu araruxetòenyòkre. Kai Kafanaõ hãwã yludu mahãdu aõbo adeereny rotÿÿnykre. Biu-ò

aõbo bõibenykre. Aõkõ heka heòtybina bede-txi heka boibenyke. <sup>16</sup> Tahe Jesuisi taerydỹna mahãdu-ò icyby rarybere: –Inyõ aradyrenykre wana tasỹ-ò. Iwese riwadymyhỹre wesele, aradyrenykre. Moo adeereny roholamyhỹre iyrubu wadee roholamyhỹre. Wana tahe waderalemy reamyhỹre. Waderamy reamyhỹre tahe tule Waha deramy reamyhỹre. Deuxu wateòdỹdu wahe.

<sup>17</sup> Tanonanareny-ribi iribi tahe kia erydỹna mahãdu ibutumy dòòsedenyde. Tiiboho heka teysa nihikỹmy dòidenyde. Tybybinanahakỹ heka irybe-ki ròhònyhỹre irybereny-ki. Riòlòdỹnymyhỹreny wana Jesusini-di heka ròhònymyhỹre kiamy Jesusiko-ò tuu relyyrenyde.

<sup>18</sup> Tii rarybere tamyreny: –Bexijebenyke jiarỹ dori Satanasimy biu-ribi rabire, biudelaa wesemy reseremy tuu rabire. <sup>19</sup> Inatyhy rare waruruke nyderi rewahinyre. Tai hemylala tyre-ki mariabenykeki. Tiu inyõ ruruõtyhy itytibòrò nihikỹ arawerenykeki, tiu buruõtyhy. Tule kai aòludu rururatyre arurureny-di boibekre.

<sup>20</sup> Ihãrele tahe uritere deysarenkõmy atxibenyke ka ruru òraru-ki tyytybybina deòdỹna, ruru wahe. Kaiboho dori anireny raritinymy roimyhỹre biu-ki kia ta ateysanarenykre.

<sup>21</sup> Iule tahe Jesuisi reysare heka Deuxu Tyytybytyhy iwomy reareu. Kiamy rexitòenyre: –Waha, kai wa biuwedu tate ibutu bede wedu tate. Umy reàlãmy watzireri tamy retòenyre. Wadeksamy watzireri ka aõma dỹnana bederaremy nihikỹ iribi tewòmy atxiteriki wahe. Tamy hete iwese iny uladu

wesemy rityhynymyhÿre heka. Tai tahe tamy ritÿnynymyhÿre. Kia adeewimy tuu rare. <sup>22</sup> Jiarÿ heka ibutumy Waha wadee riwahinyre. Inyõ rieryõhyymyhÿre Waha wahe. Waõrarukile tahe iny rierymyhÿre. Mobo Waha rare wahe. Waõrarukile dori rierymyhÿre. Ijõ aritÿnynykemy watzireri. Tai tahe tiki tule riery iruru. Taile rierykre. <sup>23</sup> Rexitõenymy rahudi tahe wasimy iwõtemy heka rarybere taerydÿÿna mahãdu-ò: –Kaiboho heka sõwemy aõwihikÿmy tabimyhÿtenynte. Tai kaiboho beysabenyke. <sup>24</sup> Ihetxiu heka Deuxu rybedÿÿdu wana kia aõmysÿnanamy iòlò mahãdu wana. Kaireny aõmydÿÿnanamy robikemy risÿnyre, tahe aõkõhyre. Wijile heka tuu robireri aõrarureny-ki. Tule tabitenyteri kaiboho ratximyhÿ inatyhymy aõbo õbitimy Jesuisi ijyy-ò roholarenykemy tahe aõkõhyre.

<sup>25</sup> Moisesi bede ywina rybe-di rãire Jesuisi lÿÿraxidÿÿmy. Iwese kai ixiluure wese, iny witxira luuke! Tii tahe Jesuisi rihixidÿÿmy rarybere: –Aõhebo arotÿÿnyke biu-ò arahenykemy. <sup>26</sup> Jesuisi dirawyõnyde: –Timybo kÿnyhe Moisesi bede ywina tyyriti-ki roimyhÿre? Timybo tuu manarybekre. <sup>27</sup> Tii tahe diwyõnyde timybo tyyriti-ki roimyhÿre myna:

–Deuxu adinodureny, ibutumy awo-ribi iluuke, ibutumy arayky-ribi aruruna-ribi, ayky-ribi heka iluuke. Tule ibutumy iny ixiwesemy idi atximahãke.

<sup>28</sup> Tai tahe Jesuisi tamy rarybere:

–Kai inatyhymy tarybeteri tai inatyhymy mahenykre biu-ò.

29 Kia hābu heka rexiòbitinykemy idi ratxireri. Taita rarybere Jesuisi-ò: –Mobota waeryre?  
 30 Tahe Jesuisi ikò relyyre ijyymy. –Judeu mahādu hābu heka ratŷinamyhŷ Jerusalē hāwā-ribi, Ijeriò hāwā-ò. Iribi tahe kia wasidu mahādu rimyrenyre. Inieru ibutumy iribi ritarenyre. Ityy hŷre raòhòtere irubudŷŷle rasiranyre ririre. Tahe ruruòki rŷimyhŷ. 31 Aōma judeu xiwenawahidŷŷduò heka idi rare. Tahe hābumy robire. Idi hābu-ribi irehemy rexiemy reare. Tahe tŷtxi rerikòle rare raty resere. 32 Hābuò rehemynyre tiie-ki dohodŷŷna wiòhedŷŷduò rare, Levita wahe. Tule ratyresemy ririre. 33 Tahe ijò nade Samaria bedē hāwā luduò heka rare. Judeu mahādu heka Samaria mahādu luukòre. Idi tahe kia judeu mahādu roimyhŷ. Tahe Samaria mahādu hābu sōwemy riruxetòenyre. 34 Idi tahe tamy rexitŷmynymy tahe iwotōmona rituahinymy ritaataamy iwotōmona. Idi tahe ka hābu relyymy idi rare. Aōma ijumenta tyre-ò ritidimy. Idi rare rirarehu tahe heto-ò ritidikremy ririkremy ridymy heka idi rare. Rummy heka ritòenyre hykyky idi bedē nade awimy risŷnykemy. 35-37 Rudile heka heto òwy-di iwedu-ò heka nieru riwahinyre riòwynyre inatxi womati nieru. Tamy rarybere: –Biwiòhenanyre idi mabekre adòòsekre riròkre. Moma arŷnaderenykre Arŷnadebenykre heka adiòwynykre adòòsekreu wahe. Ka hābuhe rarybere: –Hābu bireludu ratxireri. Kia taruxetòenyreri tiòsinyre waha tieka idi hābubireludu ratxireri. Wimy raòludumyhŷre hārele taheka riwiòhenanyre. Jesuisi tamy

rarybereri. –Iwesele biwinykre iweseka hābu riwinyra weselemy biwinykre. Kai aōhebo botỹỹtyhy mahake. Iwesele wahe. Jesuisi rỹỹraxire: –Mobo hābu aōtxino biōwa rare? Mobo ibireludu wahe? Bede ywina erydu tai rirawydōnyre: –Iwiōhedỹỹdu wahe.

<sup>38</sup> Jesuisi, ijō mahādu-wana rōirenyre. Hāwā-ò rirōnyrenyre. Hāwyyō rare Marta inire. Tahe ridyre tasỹ-ò tai ratxirenykemy. <sup>39</sup> Tahe Marta heka iseriōre dire. Marie inire. Marie urile ibire-txi ronyra aōbo tarybeke roholakelemy. <sup>40</sup> Marta heka raelelemy ratxireri. Aōna aōnale rotỹỹnymyhỹle riwinymy taile rare ratximyhỹ. Tai tahe nade Jesuisi-ò rarybere: –Jikarỹ sohojile wa watxireri waseritxōre riwawikōhenanykōhykyreri. Kai anobohe kōbitimy tai tahateri. Tamy marybeke riwawikōhenykemy. <sup>41</sup> Tai tahe Jesuisi he tamy rarybereri: –Marta, Marta, aōherekibo kai taelelemy teamy atxiteri? <sup>42</sup> Sohoji aōmydỹỹnale heka awire. Marie awityhy aōmydỹỹnana ixidee rimyre. Kia moo iribi ritaōtyhy. Riwinymyhỹ awityhyreki wahe. Tamy rarybeōtyhyō wadee roholareri iribi ariòlòdỹỹnyke wahe.

## 11

<sup>1</sup> Tiutxubo Jesuisi rexitōenymyhỹre, iny rieryōlemyhỹre. Jesuisi rexihudi, ijoi rarybera: –Biwaerynanybenykre iwese texitōenyteri wese, Joaō tahe tajoi rierynanyre. <sup>2</sup> Tai rierynanyre. Kai bexitōenykeki, kawese marybekre: –Waha, ani ibutumy tamywimy. Wylemy mynake iny òlòdỹỹmy.

<sup>3</sup> Rỹsỹna txuō txuōlemy biwahinybenykre.

4 Inyòraruna biixãwidinykre, iny iwitxira-dori taòraruna ariixãwidinykre. Waatysyrenyõmy òraruna-txi.

5 Jesuisi heka taerydỹna mahãdu rierynanyre ijyy-di: –Kai arỹsỹnaõmy bonykeki, abiòwa-ò make ruetya rexitòedỹmy rỹsỹnaõ huòtemy bidiwykemy: –Wy, ahina inataõ wadee bidihuòteke.

6 Wabiòwa rehemynyreri bedetỹi-ribi. Aõ heka wawahisidỹkõnare.

7 Tii òsana myỹ adee rarybekre: –Wadee ixitòedỹõmyke ruetyahakỹmy. Arỹiòtyhy waherina-ribi rexiyrubunymy heka rãireri. Ibutumy iny heka rõrõmy rỹireri. Uladu, tule iumy rõrõmy rỹireri. Wadee ixitòedỹõmyke.

8 Rexitòenyhyhy tai hyyhy rỹikeki tai ihãrele rỹike. Abiòwatòenamy aõkõ kỹnyhe rỹike. Texitòenyterikile rỹike.

9 Tai heka adeereny rarybereri. Bexitòenykeki, biwyke. Biijeke aõbo teijeteri, tai tahe mahake. Ijòtòbòna bihetenyke tahe adee riraynomy tahe malòke. Tai tahe adeereny rarybera. Ibutumy rexitòenymahãke, tamy riwahinymahãke. Ibutumy iny riijemahãke, tai rahake. Iny rihetenymahãke riraynyke.

10 Tai adeereny rarybere: –Ixitòedỹki iny aõ rimymyhỹre. Aõitxe-ki aõtxi ijara rỹimyhỹ. Ijò-di ròtemy ijara-ki iny ralòmyhỹre. Ijò-di ròtemy ijara-ki, iny ralòmyhỹre.

11 Uladuõ tyby-ò uturamy rexitòenykeki aõbo, hemylalaõ tyby tamy riwahinyke irỹsỹnamy? Timyki tuukõna! Kaiboho kiamy aõbo botỹnybenykre? Timyki tuukõna!

12 Uladuõ tyby-ò hãniesimy rexitòenykeki aõbo, itytibòrò tamy riòkre. Timyki tuukõna! 13 Kaiboho aõbina binahakỹdile



tahõtinyinmahãtenyité, aõwihikỹ aõbohe ariòrereny-ò biwahinyke. Boreny aratyre heka bede rieryke, Deuxu wahe. Tamy bexitòenybenykeki, tii Deuxu Tyytybytyhy adeereny riwahinyke.

<sup>14</sup> Ixityre tasỹ hãbuõ raremyhỹ irybeõmy. Jesuisi taile ratximyhỹ tahe tyytybybina riòlòdỹnyre iribi. Iu tyytybybina iribi rohonyreu tahe, hãbu rarybere kia rybeõmy ratximyhỹré wahe. Tahe iny sõwehekỹ mahãdu sõwemy idi rabedeòtiimy rỹire. <sup>15</sup> Inyõ tahe, inysõwehekỹ yluduõ tahe kiamy rarybere: –Kia diabo ruru-di, Belisibu ruru-di heka iribi riòlòdyỹnyre. Tii tyytybybina mahãdu wedu rare. <sup>16</sup> Ijõ tamy rarybere: – Jesuisi, araeryrenykre inihe aõ biditeòsinykre wadeereny. Inatyhy aruru biuludu ratximyhỹre. Widỹnaõ inihe wadeereny bitỹnynyke kialemy heka rarybemyhỹre urile riurihimy tamy aõ itxerenamy riwinykelemy. <sup>17</sup> Jesuisi tahe rierymyhỹ aõmybo raraykynymyhỹreny. Tai heka tamy tuu rarybere: –Kia iny mahãdu wiribi hitximy raraykywydynykeki, tii tahe rexihuke itueke, sỹ mahãdu tule wahe. <sup>18</sup> Timybo Satanasiboho bede widee ribinanymyhỹrenyeki, awityhymy roirekre. Jiarỹ araeryrenyteri timybo taraykynytenyteri. Aõma Satanasi ruru-di tyytybybina ariòlòdỹnykemy tarybetenyteri heka reeryteri. <sup>19</sup> Kia riki ariwinykeki, kaiboho tule wawesele tewinytenyite. Timybo? Mobo awiòhedỹdurenny rare? Satanasi aõbo? Kaiboho boibenyke igitòedỹmy awiòhedỹdurenny-ò. <sup>20</sup> Jiarỹ Deuxu ruru-di ariòlòdỹnykeki, kaiboho bexiijebenyke, Deuxu Iòlòna tahe adeereny

iòhòra. <sup>21</sup> Hãbu deburehekỹ tadebòna-di taheto riyrubunyekeki, rexityhynomy ronyke. Iaõmydỹña ibutumy iyrubudỹñamy rỹike. <sup>22</sup> Tahe ijõ kedehemynyke iratyre teburetyhy, tahe iaõmydỹña ibutumy iribi riwyke. <sup>23</sup> Iny wawana aõkõ ratxirerimy ihỹre, tii heka waribi hitximy ratixmyhỹre. Iny wawana aõkõ ratxireri, tii tahe aõtxile ramyhỹre ixideòna. <sup>24</sup> Jesuisi ijõ ijyy relyyre: –Iny-ribi tyytybybina ròhònymyhỹreu, tii heka rake igitawo-di rake titxibo. Rubumy rarunomy rake. Bedeõ-ki rahakeki tahe, rõhõtynyke. Aròðekre, tikibo rarawãhãðle. <sup>25</sup> Ixyby kòdòðekeu tahe, isỹ ibutumy, tytymy roiike iruxeraõ. <sup>26</sup> Idi ixityre ijõ rimyke debò inatxi reurò tyytybybinaõ. Idi tahe tamy rasỹnyrenyke. Iratyre tyhy wahe ibina. Iu kia ixisohojimy tyytybybina-di aõmysỹdỹỹmy raremyhỹu tahe, ihewo-ribi rimyra tahe iroona-ribi tahe aõnityhymy releke. Ibinatyhymy tamy rare.

<sup>27</sup> Iribi tahe hãwyyõ ryryre ibutu ijohonamy: – Hãwky heka aratxurananyre, aratibienyre heka iny bedekòby rare. <sup>28</sup> Tahe Jesuisi rarybere: – Deuxu Rybe tyhydỹỹdumy iratyre wadee awire. Deuxu deysanamy tamy kanakemy idi watxireri.

<sup>29</sup> Idi tahe inysõwetyhymy dehemynyde Jesuisi-ò. Jesuisi kiamy rarybere: –Iny heka kia mahãdu ibinatyhymy rỹire aõwihikỹle heka riijemy rỹire. Itxerenaõmy robikre ratxireri tahe itxerena Jonasi-ribi nadelemy tahe robikre. <sup>30</sup> Jonasi heka Ninive hãwã mahãdu-ò itxerenaõ heka tii rare. Tule jiarỹ heka Deuxu Riòre Hãbutyhyhykỹ rare wijinabòdu mahãdu dee itxerenaõ jiarỹ rare. <sup>31</sup> Ibòò mahãdu bede konana-ribi iòlò

hãwyy Salomaõ bede eryhykỹ-ò ijõhonamy irehe-ribi nade. Wijinabòdu mahãdu taheka naõhyymahãde wadee ijohonamy. Salomaõ ratyre heka jiarỹ watzireri. Ikonana txu tahe ibòò iòlòhãwyy rỹikre rarybekremy. Tii rarybekre: —Anoherekibo Jesuisi deramy teakamahãtenyte wahe. Timykibohe irybe bedekeryna-kò ijohokuna rỹikõmyhỹreki wahe. <sup>32</sup> Ninive hãwã mahãdu tule rỹikre rarybekremy iwesele. Jonasi rybe tỹnydỹỹna-ki rexirãhĩrenyre. Kaki heka Jonasi ratyre hãbuõ ratximyhỹre, jiarỹ wahe. Wadee ijohonadu aõkõ heka toite.

<sup>33</sup> Moheka loosõnaõ rideõhyymyhỹre heri-narawo-txi toosò iwasihiikỹmy roosõmyhỹkemy. Tiiemy heka biuðhyy rademyhỹre ibutumy bede ratỹnymyhỹkemy. <sup>34</sup> Arue umy dori itỹnymy roimyhỹre. Arue awikeki heka ibutumy aumy awikre. Arue ibinakeki tasỹ aumy heka bedelorokile rỹimyhỹkre. <sup>35</sup> Awo toosõmy ratximyhỹre wana, bexiijemahãke. Aumy biemahãke bedeloro-ki rurunyhenny. <sup>36</sup> Bedelorohekỹ aumy-ki rỹiõmyhỹre wana, tai tahe boosokre ibutumy titxibo bede-txi mamahãkre wana.

<sup>37</sup> Jesuisi kiamy rarybereu tahe, fariseu mahãduõ tamy rarybere: —Manake wasỹ-ki rikiroxikremy. Tai tahe Jesuisi rare, ralore, ronyre roximy. <sup>38-39</sup> Jesuisi ronyreu, tebò risuhòõre. Tai tahe idi bede riòtiinyre. Jesuisi rarybere: —Kaiboho fariseu mahãdu, ibutumy heka texisuhòsuhòmahãtenyte. Ebò tesuhòmahãte, aumy ibutumy tesuhòmahãtenyte. Webòròsityyludu wahe. Kaiboho heka

isuhukỹlemy toimyhỹte ibutu aõikõkõ-di isumy roimyhỹre aworeny-ki. <sup>40</sup> Iu heka òbitimy taraykynytenyõhyymahãtenyete. Deuxu heka iwebro ludu riwinyre, inatyhy? Tule aworeny, araykyreny wana riwinyre. <sup>41</sup> Iny aõkõ mahãdu-ò maruxetòemyhỹbenyke. Tai tahe byranybenykre heka. Ibutumy awo-ki, ahana-ribi tule ryranykre.

<sup>42</sup> Kobe làhàxe kaiboho fariseu mahãdu. Kaiboho Deuxu dee tewahinymahãtenyke uriõno. Debòwiò aõ tetatenywana heka, sohoji tewahinymahãtenyete. Tule aõmydỹnareny aoworuroلودurenyõ tewyteny wana, tule tewahinymahãtenyete. Kia awire, biwahinymahãbenyke. Urile tahe teerytenyõhyymahãtenyete Deuxu luuna, Deuxu òbitina. Biwahinymahãbenyke heka Deuxu dee aõmydỹnaõ. Tii tahe awire. Tule nohõti losarenyõmyke, luuna, òbitina. <sup>43</sup> Kobe làhàxe kaiboho fariseu mahãdu. Dohodỹna heto luureny ikoòhòkỹle heka torokomahãtenyete. Kaiboho arybedỹnareny-ki awimy tahamyhỹtenyete. <sup>44</sup> Kaiboho kobe làhàxe. Wobrona wesemy toite. Iwese iny rubuhãloo tyremy iny rariamyhỹre wese ierykõnamy, kiawesele toite.

<sup>45</sup> Bede ywina bede erydỹduõ heka tai ratximyhỹ. Tii tahe Jesuisi-ò rarybere: – Erydỹdu, kai heka aõbinahakỹlemy wamyreny tarybeteri, kia wese rybe-ki. <sup>46</sup> Inatyhy rare. My tahe Jesuisi risỹnyre: –Inatyhy dori tule bironybenyke aõhòkỹmydỹnana. Iny dori adeereny rarybemyhỹre iny rybe bityhynymyhỹbenykemy tahe ihãrele tetyhynyõhyymahãtenyete. Bede ywina ritidỹna tewinymahãtenyete, ihãrele

tahe tiu heka tetyhynyõhyymahãtenyete. <sup>47</sup> Kobe lãhãxe kaiboho, alahireny, alabiereny wese toite. Iwese tiiboho Deuxu rybedu rirubunyre wese kaiboho toite. <sup>48</sup> Kaiboho rubudỹỹdumy toite. Òbitile tewinymahãtenyetelemy ixidee tahõtinyinmahãtenyete. <sup>49</sup> Deuxu tahe rarybere umyrenemy wahe: –Tahe jiarỹ aditeònykre heka Deuxu rybedỹỹduõ tule Deuxu deòdỹỹnaõ heka aditeònykre. Imahãduõ birubunybenykre ihona tahe biteònybenykre. <sup>50</sup> Kaiboho heka bede òrarumy boibekre kia rubudỹỹ òraru erydumy wahe. <sup>51</sup> Abeli hãlubu txiwina tahe xiwena hure rubuna. Idi tule Zacaria hãlubu txiwina wahidỹỹna bire-ki heka Deuxu hetobire-ki. Kohe, ihure rubureny òraru-ki aõhõkỹhỹkỹmy biòwinybenykre. <sup>52</sup> Kobe lãhãxe, kaiboho bede ywina erydỹỹdu mahãdu, bedeeryna ijò rayna dinoduboho wahe. Kaiboho tahe terònyõmy bede eryny heto-ò. Tule inywitxiraõ tetònytenyete iròte lau.

<sup>53</sup> Jesuisi ròhònyreu, teburemy tiiboho ritỹỹraxinymyhỹre aõna aõnamy. <sup>54</sup> Tuu ròtỹỹraxidỹỹmyhỹre timykibo rirutaõnyrenykemy.

## 12

<sup>1</sup> Sõwemy iny tahe ributunyre. Ube tahe rỹximy ratxireri. Tahe juhoo Jesuisi taerydỹỹdu mahãdu-ò rarybere: –Fariseu mahãdu, saduceu mahãdu urina biebentyke. Tiiboho dori ruidu mahãdu roire. <sup>2</sup> Wasimy wiji adeeremy relyyre. Tiu ta ibutumy ijyynamy rỹikre <sup>3</sup> Aõbo wasimy wiji taholate heka ibutumy biurasòmymy ratỹnykre. <sup>4</sup> Uritere iny lau brebuõmyke. Aumyle

tii rirubunykre. Ijõ ibinamy adee aõkõ tii rotỹnykre. <sup>5</sup> Iny lau sohojile breburenyõmykre. Deuxu lau ta buberukre. Tii dori atyytyby bede bina-ò rahuke ixideewikeki. <sup>6</sup> Nawiiõ kaiboho bidymyhỹbenyke iõwy riõre iny heka riwymyhỹrekre. Ibutumy heka Deuxu nawii rieryre sohoji sohojimy. <sup>7</sup> Deuxu ara erymy heka aõma arati-ki tiwesebo aradeti rỹimyhỹre rierymyhỹre. Brebuõmyke, aõma Deuxu heka anaerymyhỹre nawii sõmo ratyre heka rierymyhỹ. <sup>8</sup> Kai marybeke: –Jiarỹ Deuxu retyhynyre dori tahe umy arelyyke Deuxu ýjukomy rarybeke biu-ki wahe, jiarỹ Deuxu Riõre Hãbutyhyhykỹ wahe. <sup>9</sup> Iny sõwehekỹy-ki riwatxiõnykeki tule aritxiõnykre jiarỹ Deuxu ýjuko-ò. <sup>10</sup> Inyõ Deuxu Riõremy aõbina binamy rarybekeki, irybe-ribi nohõtilosa rỹikre. Deuxu Tyytybytyhymy tahe inyõ ibinabinamy rarybekreki tahe, aõhõkỹmy rotỹnykre irybe òraru-ki. <sup>11</sup> Aramykeu heka uritere nohõtiõmyke aõmobo marybekremy ywisidỹna-ki. Bede heka ariwahinykre rybedỹnanau. Rybeõmyke ikotyre. <sup>12</sup> Kai ixivanale aõkõre marybeke. Deuxu Tyytybytyhy arãwiõhenanymyhỹreny.

<sup>13</sup> Hãbuõ inysõwey-ki tahe Jesuisi-ò rarybere: –Wanyrỹ, Waha rurura. Waseriõre tahe ibutumy waha aõna aõna riwyrã ixidee sohojile. Tamy marybeke wadee ritxuranykemy. <sup>14</sup> Jesuisi tamy rarybere: –Hãbu, kia waaõmydỹna aõkõ rare. Timybo ayreny-ki araywisidỹnyke? <sup>15</sup> Tahe Jesuisi ibutumy iny-ò rarybere: –Warybe-ò bodoholabedenyke. Ixityhyõmy! Arutyhy heka aaõna aõna-ki aõkõ rare aõna aõna sõwerekãre. <sup>16</sup> Tahe Jesuisi ijyymy ròkewesenadỹyre: –

Hābutyhy riki ioworu nihikỹre. Tahe sōwemy rỹsỹna ributunyre. <sup>17-18</sup> Iheto tahe iyjare ibutumy ributunykemy. Tahe ixidee rarybere: —Aōhebo arotỹỹnykre? Waaōnaheto butumy aritxiwikre. Ijō iribi inihikỹmy ariwinykre. Tai ibutumy waaōwiwi. tamy aridekre. <sup>19</sup> Tai tahe ibutumy waōwiwi-di areysakre. Arexielehynykre, ariroxikre, ariōkre. Waruhyy areysakre. <sup>20</sup> Deuxu tahe kia hābu-ò rarybekre:

—Hābu itxỹtere. Kai wijirulemy burukre. Tai tahe mobo aōna rimykre.

<sup>21</sup> Jesuisi tajjyy rihure rexirybenymy. Kia heka aōhebo rotỹỹnyre iny ityhy mahādu. Tiiboho dori Deuxuòle ityhymy aōkō ihỹrenyre.

<sup>22</sup> Kia heka Jesuisi taerydỹỹna mahādu-ò rarybereri. Uritere nohōtiōlemy arỹsỹna tule atyymy, idi matykynykemy. <sup>23</sup> Aumy heka rỹsỹna ratyre aōnityhy ratximyhỹre. Aumy heka atyky ratyre aōnimy ratximyhỹre. <sup>24</sup> Nawii-di betehebenyke. Tiiboho heka ioworuōrenyre. Tarỹsỹna riyrubunyōhyymyhỹrenyre. Deuxu heka nawii riyrubunymyhỹre, irỹsỹna tamy riwahinymyhỹre. Kaiboho tahe nawii ratyretyhy toite Deuxu dee. <sup>25</sup> Sōwetyhymy maraykywydynanykeki aōbo arumy arirarehemy mariake? Aōkōre! <sup>26</sup> Kia aō iyjare tahe Deuxu-ò. Kia biwinybenyōkeki, aōherekibo ijō aōna aōna nihikỹ-di tahōtinymyhỹte? <sup>27</sup> Betehemy inihe noijasa-di. Aōma tiiboho raaōmysỹdỹỹōhyymyhỹrenyre. Ihāre tahe iruxerarenyre ityy wiwihikỹrenyre wese. Tyy ixidee riwinyōtyhy Deuxu rityyny wihikỹ

heka tyy wihikỹ tamy riwahinyreri. Salomaõ heka ityynihikỹ rare. Ihãre tahe ityy heka awityhymy aõkõ noiròsò wese. <sup>28</sup> Deuxu heka noijasa rityynymyhỹre kia wijilemy idi ihỹre. Biurasòmý tahe ixãwimý reamyhỹre. Tii heka tyy adee kidiwahinykre. Tai tii atyyreny. Tai ta ixinohõtiyredỹỹrenyõmy. Aõherekibo ainatyhyna ibutere? <sup>29</sup> Tahe raykyõmy nohõtíõmy titxiribibo arỹsỹna adee kanakredi. <sup>30</sup> Tyhydỹỹdukõdu mahãdu heka tuure. Inytybyreny heka rierymyhỹre aõmybo tarumahãte. Ibutumy heka arerymyhỹre aõmybo teamyhỹte. <sup>31</sup> Tii Deuxu aõmy dỹỹnana sohojidile maraykynykeki heka tii ibutumy adee riwahinykre. <sup>32</sup> Brebuõmy ahãbenyke wariòreboho. Deuxu Iòlòna adee kanakemy, Deuxudeewina wahe. <sup>33</sup> Aaõna aõna-di bohonybenyke. Iòwy tahe iaõkõdu mahãdu-ò biwahinyke. Anieruhyna wiwihikỹdile boibeke. Kaki ibutudỹỹlemy heka biu-ò bibutunyke. Tai heka judòera aõ riròõtyhy tule rararyõtyhy. Tule tai wasidu ralòõtyhy. <sup>34</sup> Tikibo aõwirený rỹikeki, tai heka araykyreny ratximyhỹre.

<sup>35</sup> Ijõ tahe Jesuisi rarybere: –Kaiboho bexiywinybenyke, ibutumy aõhebo rotỹỹnykremy bexiywinyke. Awereysanareny-di atyky beximýke. Aloosòna bitoonyke. <sup>36</sup> Deòdu mahãdu wesemy boibenyke. Bexiywinybenyke awedu dehemynyna-ò, tii worana bedehesi-ribi rehemynyremý wahe. Iu rehemynyreu, teòdu mahãdu heka ijò riraynyke. <sup>37</sup> Tiiboho riraòrenykeki, deysamy rỹikre. Iwedu dori reximýkre ityky wereysana-di tahe rỹsỹna



teòdu mahãdu-ò riwahinykre. <sup>38</sup> Tii ruwetyakile rehemynykeki, deòdu mahãdu reysakre. Tiiboho dori rexiraòmy rỹimyhỹrenyre. <sup>39</sup> Tai heka iny rexiwinymy rỹimyhỹkemy rybe roimyhỹre awedureny kanakreki. Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy. <sup>40</sup> Kaiboho tule bexiwinymbenyke wadehemynyna txu heka biijemy bonymyhỹbenyke.

<sup>41</sup> Tahe Pedro rarybere: –Wanyrỹ, kai wadeerenyle ijyymy telyyte ada ibutumy iny-ò aõbo telyyte? <sup>42-44</sup> Tahe Jesuisi riwyònyre: –Aõtxile inyõdee, tibo deòdu taaõmysỹdỹỹna riywinymyhỹre, kia idinodu tai awimy rahamyhỹre tii dori rỹsỹna òbitimy riõriõmyhỹre. Idi tamy aõwiwi riwahinykre taaõna aõna-di itxeredumy tule risỹnykre. <sup>45</sup> Tii iwitxiramy rexiraykynykeki tahe, ijõ teòdumy raòhòtemy urile idi risinymy kamy rexirybenymy: –Wawedu dori wiji aõkõ rarerikre. <sup>46</sup> Tai ierykõna-di iwedu kedehemynykre. Tuu rierymy iaõmysỹdỹỹna-ribi ritamy aõhõkỹmy risỹnykre ityhydỹỹdukõdu mahãdu wese. <sup>47</sup> Deòdu tawedudeewi rierymyhỹre. Tai heka tuu rotỹỹnyõkeki, tii tahe sõwemy aõhõkỹmy rotỹỹnykre, òhòtemy wahe, tamy riywinyõreki. <sup>48</sup> Ijõ deòdu tahe tii iwedudeewimy rieryõkeki, tii tahe aõbinamy riwinykeki, tamy tahe urihimyo òhòte tai rỹikre. Inyõ sõwemy ityhykeki, sõwemy ijõ iny tamy rexitòenykre.

<sup>49</sup> Jesuisi ijõ rarybere: –Heòty-di bedede ariworonykemy heka jiarỹ anade. Tii òte

raworonykremy idi watzireri. <sup>50</sup> Jiarỹ ratisebenaõwesemy aralokre. Arurukre dori. Ele elemy rỹikemy ixi-di watzireri. <sup>51</sup> Kaiboho tahõtinyte wadehemynyna-di. Ywina adiwydemy wadi tahõtinyte. Aõkõrehe, bede jei jeidỹỹmy anade iribi widee rahitxihitximy rỹikremy. <sup>52</sup> Iruyre inysỹ mahãdu heka widee rahitxihitximy rỹikre. Inataõ iny iuhe òludumy rỹikre. <sup>53</sup> Hãbu mahãdu heka tyby òludumy rarekre. Hãwyy tule tadi òludumy rarekre. Iriokorese heka tariòrelahi òludumy rarekre.

<sup>54</sup> Ijõmy Jesuisi rarybere: —Iu biuwetyky biura-ribi ròhõnyreu, Kaiboho kia rybemy tarybemahãtenynte biu kòdòakre. Inatyhymy biu ròamyhỹre. <sup>55</sup> Tule tarybemahãte. Yhy ibòò-ribi rebonyreu, bede ratòteekre. Inatyhymy tuu ratòteemyhỹre. <sup>56</sup> Itxenadỹỹdu mahãdu! Kaiboho kia terymahãtenynte bede, biu aõmydỹỹna tule iwitxira aõmydỹỹnana teerytenykhõlemahãtenynte, bededỹỹnana konana eryna wahe. <sup>57</sup> Ijõ Jesuisi rarybere: —Kaibohole teywinyõmyhỹtenynte, aõòbitinamy wahe. <sup>58</sup> Aõòrarumy heka aòludu umy rarybekeki, idi ywisidỹỹna ube-ò aradykemy ratxireri, tii-wana widee marybeke idi widi bede biòbitinykemy. Aõkõkeki, tii aradykre ywisidỹỹdu-ò idi ròtenawo-ò soldado mahãdu araròtenykre. <sup>59</sup> Tiu heka aòlòkõmy heka mabekre. Ibutumy iòwy biòwynyke xiery bòhõnyke.

## 13

<sup>1</sup> Tahe inyõ Jesuisi-ò relyyre: —Pilato rybemynamy Kalileia mahãdu rururenyre Deuxu-ò raxiwerenyleriò. <sup>2</sup> Kia ta Jesuisi

narybede: –Kaiboho timybo irubureny-di tex-inohõtinytenyteri. Ijõ wiratyre raðrarunanyrenyreki aõbo? <sup>3</sup> Ture aõkõ, kaiboho bexirãhĩõbenykeki tule burubenykre irubureny wese. <sup>4</sup> Iasÿse ijõ. Iu Silòe hãwã mahãdu tyre heka heto rarie resereu 18 iny sõwe rirubunyreny. Arãÿÿraxikre Jerusalẽ hãwã mahãdu ratyre raðrarunanyrenyreki aõbo? Aõbo tahõtinytenyteri? <sup>5</sup> Kaiboho bexirãhĩõbenykeki tule burubenykre irubureny wese.

<sup>6</sup> Tahe Jesuisi kaa ijyy-wana rikewesenanyre, Figoratyò wese heka. Tahe Jesuisi kaa ijyymy de-lyyde: –Hãbu oworu-ki figoòõ rÿimyhÿre. Tii iraty dilawijunyde tiubo. Tahe iraty-txi reakõre. <sup>7</sup> Tahe hãbu taoworu-di itxeredu-ò narybede: –Inataõ wyramy relawijunyre tahe aõkõhyra. Urile ta biòròkre. Iraty ihoõreki, awi aõkõ rare. <sup>8</sup> Tahe oworu-di itxeredu dirawyònyde: –Wawedu, tx-ioini kawyramy idi warukikre, isu ariywinykre. <sup>9</sup> Aõkõhykreki tahe urile raorokre ijõ wyrau.

<sup>10</sup> Judeu mahãdu elehyna txuu Jesuisi rotohodÿÿmyhÿ judeu mahãdu dohodÿÿna heto-ki. <sup>11</sup> Tai ta hãwyyõ ratximyhÿ. Tii 18 beòra webinadumy ratximyhÿ tyytybybina òraru-ki. Tii iumy rarabunymy rariamyhÿre. Ixitaradÿÿ risiranymyhÿre. <sup>12</sup> Jesuisi tuu robireu, tamy narybede: –Hãwyy, kai heka teytemy tate. <sup>13</sup> Tahe Jesuisi tebòmymy rimyre iuleta reytere. Tai tahe hãwyy heka Deuxu riwowydynyre. <sup>14</sup> Dohodÿÿna heto wedu tahe ibinamy Jesuisi-ki rahare, judeu mahãdu elehynatxureki wahe. Takamy inyreny-ò narybede: –Debò sohoji reurò txumy aõmysÿdÿÿnamy rÿimyhÿre iu heka adeytemy ixi-di

bòdòimyhỹke, judeu mahãdu elehynatxu ta aõkõre. <sup>15</sup> Tahe Jesuisi dirawyònyde: —Kai, itxenadyỹdu tate uriteremy iximy rybedu. Kaiboho judeu mahãdu elehynatxu dori abroreni, aawaru heto-ò toimahãte tuu teesenymahãtenyte, tedymahãtemy idi ibemomodỹỹmy bidybenykremy.

<sup>16</sup> Kaa heka Abraõ riore riòreõ heka Satanasi 18 beòramy rimyre. Aõherekibo ta iribi retaraki sabadotxu ibinamy tahateri. <sup>17</sup> Tahe Jesuisi òludu mahãdu raixỹrurenre Jesuisi rybe òraru-ki. Tahe ixỹ mahãdu awityhymy tai rahamyhỹ iòraru-ki. Ibutumy reysarenre.

<sup>18-19</sup> Tii rarybera: —Deuxu Iòlòna wexe aõwesere. Aõ-ò wexe rikiwesenanyrenykre. Tiwexe ijyy kawesere? Deuxu Iòlòna heka alòbòròna sòmo sòmo wesemy ratximyhỹre. Raumynyreu heka òwòru rariwesele relemyhỹre. Nawiile tuu rỹtỹnymyhỹre kia òwòru-ò.

<sup>20</sup> Ixityre tamy rarybere: —Aõ ijyy wese heka Deuxu Iòlòna rare. Aõwexe rikiwesenanyrenykre. <sup>21</sup> Paõ ixìòlòdỹỹna wese rare, iuri rare. Hãwyy paõ riwinymyhỹreu, inataõ urihixina-ki iuribemy riurinymyhỹre. Tai tahe raubỹtỹmyhỹre, rexiòlònymyhỹre.

<sup>22</sup> Jesuisi tahe Jerusalẽ hãwã-ò rareu, hãwã hãwãmy rotohodỹỹmy. <sup>23</sup> Iu inyõ ritỹỹraxinyre: —Wanyrỹ, Hedu mahãdu we sòwekre aõbo? <sup>24</sup> Jesuisi tamyreny narybede: —Bexityhynybenyke ijòyja-di birònybenykemy. Sòwemy iny tahe ròtemy reakre tahe ralòõhykre. <sup>25</sup> Hãbuõ kie taheto ijòtòbòna ritòbònyre. Iu kaiboho uritere bydyrydenykre: —Wanyrỹ, aralòrenyke ini. Kiata tii anawyònydenykre: —Tiludubo toite,

araeryrenyõre. <sup>26</sup> Kamy ta bidiwyònydenykre: —Inybohòle riroximy roiremyhỹ. Wahãwãreny-ki tòbedeerydỹmyhỹ. <sup>27</sup> Ixityre anawyònydenykre:

—Boibenyke aõbina bina widỹydu.

Tiludubo toite dori reerykõre. <sup>28</sup> Deuxu iòlò-ki Abraõmy, Ijaimy, Ijaòmy, tule ibutumy Deuxumy rybedu mahãdumy bobibenykreu, kaiboho malòbenyõtyhy. Tai hii, ibru, jumytata rỹikre. <sup>29</sup> Iny ibutu bede bede-ribi, Ibòò-ribi, Iraru-ribi, Biura-ribi, Beà-ribi Deuxu iòlò-ò hãwãmy. <sup>30</sup> Kiaremy ta, koludu mahãdu heka ibutuhewomy kedeakre. Ikõmyta, hewoludu mahãdu, koludumy kedeakre.

<sup>31</sup> Iu ta fariseu mahãdu Jesuisi-ò narybedenyde: —Mahenyke, Herodi dori arubudỹmy arajereri.

<sup>32</sup> Jesuisi dirawyònyde: —Bòòsebenyke kamy ijòrò-ò marybebenykre: —Jiarỹ tyytybybina iny-ribi retareri, tule ròteytedỹreri wiji biurasòmymy. Ijõ txumy ta waaõmysỹdỹna arihukre. <sup>33</sup> Kiaremy ta kia rewinyreri arihukre. Deuxumy rybedu dori Jerusalẽ hãwã-ki sohojile rurukre, iwitxira hãwã-ki ta aõkõre. <sup>34</sup> Jerusalẽ, Jerusalẽ hãwã, amahãdu heka rirubunyrenyde Deuxu rybedu mahãdu wahe. Iwese hãnie tariòre ributunymyhỹre wese terawo-ò, kia wesele arayrubunykeny rexinohõtynyre tahe kaiboho terarenyde. <sup>35</sup> Aheto-ribi heka Deuxu rexitakre. Kaheka ararybekre adeereny: —Wamy heka bobiõtyhy ixityre. Tiutxumy kamy bexirybenykre bede-ò, myỹ:

—Deuxunimy nodu awityhy heka rare. Kiaule wamy bobikre.

## 14

<sup>1</sup> Sabadoõu Jesuisi heka fariseu mahãdu wedu mahãduõ heto-ò ralore roximy. Tahe iny idi retehemyhÿreny. <sup>2</sup> Iu inyõ taruti, tadera-di taritari-di tamy dehemynyde. <sup>3</sup> Tahe Jesuisi narybede bede ywina erydÿÿdu-ò, fariseu mahãdu-ò: –Sabado txuu deyledÿÿwe awire aõbo, aõkõre aõbo. <sup>4</sup> Tiiboho rirawyõnyõhÿyre. Tahe Jesuisi hãbu riteytenymy bede riywinyre iribi tahe riòlòdÿÿnyre. <sup>5</sup> Ixyby narybede Jesuisi: –Txibo kaiboho ariòreõ ada abroreniõ hãloo-txi resekeki, bitabenyke Sabadotxu hãrele. Aõhe inatyhy. <sup>6</sup> Tiiboho rirawyonyõhÿyre.

<sup>7</sup> Tahe Jesuisi roxidu mahãdu-di retehemyhÿre. Tiiboho dori rynana wihikÿ-txi rononymhÿreny. Tai kamy tamyreny rarybere: <sup>8</sup> –Txibo inyõ bedesanaõ araarikeki. Uritere ryanawi-ò rÿõmykre. Txibo dori inyõ aratyre ityhy kanake lau. <sup>9</sup> Tukeki bedesa dinodu inyõ aratyre-ò arynana-txi ronykemy adee kanarybekre. Tai tahe maixÿrumy rynana bina-ò bonykre. <sup>10</sup> Kialemyta inyõ araarikeki, rynana bina-txi bonykre. Tahe bedesa dinodu adee kanarybekre: –Wy, katxi bodonyke ryanawihikÿ-ò. Tai tahe kai mabedesakre ibutuko-ò. <sup>11</sup> Tahe ixityhydÿÿdu mahãdu uritere reakre. Kõmyta uriixi dinodu mahãdu rawowydykre.

<sup>12</sup> Tahe Jesuisi bedesa dinodu-ò rarybere: –Txibo roxina biwahinykeki, uritere asÿ mahãdu, aery mahãdu, ityhy mahãdu aarixiõmykre. Urikõ-ribi iwese teariteri wese araariheny. <sup>13</sup> Tukõmyta roxi biwahinykeki, uriteremy rÿira mahãdu, iny tiere mahãdu, iny ruetà mahãdu

biarikre. <sup>14</sup> Tai adeysatyhymy mabekre. Tiiboho dori tiu ixiwesemy araariõtyhy. Deuxu tahe aòwydỹdukre iu bede awikreu.

<sup>15</sup> Ijõ roholare Jesuisi rybe tai tamy rarybere: — Deuxu Iòlòna-ki, òwòrubese rỹdu mahãdu reysamy rarekre. <sup>16</sup> Tahe Jesuisi rarybere: —Inyõ roxina nihikỹõ riwinykemy ratxireri. Sòwemy iny rito-binyre. <sup>17</sup> Rexihumy rỹireu, teòdu mahãdu bede riywinyre iny kididykremy. <sup>18</sup> Sohoji sohoji tahe tarybe tamy riwahinyre. Ijõ taoworu tỹmyra-ò reteheke. Ijõ kanaõtyhy heka. <sup>19</sup> Ijõ tahe broreni debòitue riõbranyre tai riurihikreki kanaõke. <sup>20</sup> Ijõ tahe hãwyy herinamy rexihumy rỹire tai kanaõke. <sup>21</sup> Teòdu tahe ròðsera tawedu-ò tamy relyyre. Tii reburere tahe rarybere: —Wylemy makre ibutury-di hãwã-ki. Ibutumy iny witxira witxira bididyke, iaõkõ mahãdu, itiere mahãdu, ruetà mahãdu wahe. <sup>22</sup> Iribi tahe teòdu ròðsera rarybere: —Ibutumy rewinyre wawedu, tahe heto rỹxiõmy rỹire. <sup>23</sup> Tahe iwedu ixybymy bede riywinyre hãwã-ribi ibryrany-ò iny kididykemy: — Aruru-di bididyke, waheto dori rỹximy rỹirakremy idi watxireri. <sup>24</sup> Juhuu watobidỹỹna mahãdu warỹsỹna riurihiõtyhy.

<sup>25</sup> Iu sòwemy iny Jesuisi heludumy roire. Tai Jesuisi tamyreny rarybere: <sup>26</sup> —Kaiboho aõbo inatyhymy waluu mahãdumy toite. Tuu tarybeta. Tahe boluu, adiluu, ahãwyyluu, ariòreluu, aseriòreluu, ixiluu ratyre waluuõkeki, wamahãdumy aõkõ boibeke. <sup>27</sup> Inyõ riwaheludunyky ratxireri, tii juhUU taitxeò riwykre. Kialemy tahe riwaheludunyke

inatyhymy. <sup>28</sup> Inyõ heto rareie riwinykemy ratxikeki, juhoo iõwy-di rõhõtynykre. Inieru rimykeki tahe riwinyke, aõkõkeki tahe riwinyõtyhy. <sup>29</sup> Tii tuu rõhõtynyõkeki, tii ibutelemy riwinykre tahe inieru ituereu, ibutumy iny idi risinykre: <sup>30</sup> –Tii taheto rarei ritelenyre tahe rexihuõtyhy. <sup>31</sup> Iòlòõ wou riwinykeki, juhoo taaõbinadu mahãdu-di rariamyhÿre. Idi rõhõtynyre. Ijõ iòlò wawio mil soldadomy ijõdikeki, tahe tii debòwiò mil ijõdikeki, tahe wou riwinyõtyhy. <sup>32</sup> Juhoo tahe teòdu riteònyre ijõ iòlò-ò ireheribile tii-wana wou ixãwidÿÿmy rarybekemy. <sup>33</sup> Akireny tule iweselere. Ibutumy aaõna aõna biriõbenykeki, waheludu mahãduõmy boibeõtyhy.

<sup>34</sup> Saa heka aõni awi rare. Tatxuberere rexi-hukeki tahe turibi ixãwike. <sup>35</sup> Tai tahe suurina-ki ahirana silÿna binakõki awiõhõtidiirenykeki boholabenyke warybe-ò. Suò awiõre, tule ahirana bitòbònykemy awiõre. Urile idi behuke. Kaiboho õhõtidiirenykeki, boholabenyke!

## 15

<sup>1</sup> Idi nieru tarasadu mahãdu sõwemy tamy roholamy doide. Tule ijõ iny òrarudu mahãdu rehemyre. <sup>2</sup> Fariseu mahãdu, tule bede ywina erydu mahãdu kawesemy rarybere: –Kahãbu ibinare. Tii òrarudu mahãdu-wana riroximyhÿre, iny iehehe-wana.

<sup>3</sup> Idi Jesuisi rierynanyre ijyy-di rawesenanyre. <sup>4</sup> Kaibohoõ òsana 100 budoeni ijõdire. Sohoji heka iy-rihi iõre. Kai aõbo makre ijesemy? Kohe, iuhe, 99, birike bedero-ki tahe biòryhyke. Aõhe inatyhy? <sup>5</sup> Mahakre wana tahe eysamy atxikre.



Tahe bidyke iuhe-ò. <sup>6</sup> Taheto-ò rehemynyreu, tasỹ mahãdu-ò tahe ritobinyre: –Wawana ini kỹny bedeysabedenyke. Wabudoeni-ki rahara, iõreõ wahe. <sup>7</sup> Iwesetyhylemy taheka adee reerymahãre iny òrarudu mahãdumy. Iu sohoji iny rexirahĩkeki, biu-ki deysana sõwemy rỹikre. Iny òbiti 99my tahe urihimyo biu-ki deysana rỹikre.

<sup>8</sup> Ijõ Jesuisi relyyre: –Hãwyyõ òsỹny womati ura nieru debõwiò dire. Sohoji iõre-wana, tii riijeke inatyhy? Loosõna ritoonyre, iube riwysynyre, sõwemy riijeke ihyymy tahe tai rahara. <sup>9</sup> Tii itxi reakreu, reysamy rỹira. Iu tasỹ mahãdu ritobinyre: –Wawana inihe bedeysabedenykre. Wanieru-txi dokuri rahara. <sup>10</sup> Jesuisi tahe ritỹnynyre: –Iwesetyhyle biu-ki rare. Deuxu yju mahãdu reysamy roirenyre, sohoji òrarudu rexirahĩreu.

<sup>11</sup> Ixyby tahe Jesuisi narybede: –Hãbuõ iriõre inatxire. <sup>12</sup> Tiutxumyta ihelỹỹna tyby-ò rarybere: –Waha, ibutumy aõna aõna burukreu wadee rawahikre, wijile bidiwahinykre. Tyby tahe iaõna aõna jura tamy riwahinyre. <sup>13</sup> Iriõre helỹỹna tahe ibutumy taaõna aõna-di rare irehe-ò, iwitxira bedehãwã-ò. Tai aõbina binale riwinymyhỹre. Ibutumy tanieru tai rahure. <sup>14</sup> Taaõwiwi rahu-di ta, tai rama ibede mahãdu rahumyhỹre. Tii uritere reamyhỹ wahe. <sup>15</sup> Tahe aõmysỹdỹỹnamy rarunyre. Hãwãduõ tahe taixỹniòwedỹỹdumy bede riwinyre taoworu-ò. <sup>16</sup> Tai rama risamy ta ixỹni rỹsỹna rỹsỹmy rexinohõtinyre. Tahe aõkõre. <sup>17</sup> Kia tahe tõhõtĩ deade. Kamy dexinohõtinyde: –Yla aõkõ waha aõmysỹdỹỹdu mahãdu irỹsỹnadireri iwana

jiarỹ kaki rama warubudỹỹmyreri. <sup>18</sup> Ixyby aròsekre. Kamy Waha-ò arexirybenymy: — Waha, Deuxuko-ò ako-ò rexiitxỹtenyre jiarỹ raòrarunyre wahe. <sup>19</sup> Ariòre wese aòkòmy wadi mabeke, waitxỹte òraru-ki. Aaòm̄sỹdỹỹdu mahãdu wese ta ararekre myỹ tii ròhòtiny. <sup>20</sup> Tii tahe tyby heto-ò rare. Irehemy nadeò, tyby tuu dobide. Idi rexiwobrunymy tamy rajaranyre iwehityhydỹỹmy. <sup>21</sup> Tahe tii narybede: —Waha, Deuxuko-ò, ako-ò rexiitxỹtenyre jiarỹ, raòrarunyre wahe. Ariòre wese aòkòmy wadi mabeke, waitxỹte òraru-ki. <sup>22</sup> Iule ta tyby teòdu mahãdu-ò rarybere: —Wylemy tyywihikỹ tymyra-di bityynybenyke. Debòò tebò-ò roikre. Waò-di rawanykre. <sup>23</sup> Tasỹse broreni riòre dedi birubunybenyke. Idi rikiroxirenykemy rekeysarenykre dori. <sup>24</sup> Wariòre dori rubu-ribi wese rexixara. Ikò-ribi itxi ijara rỹira. Tahe rawobedesarenyre. <sup>25</sup> Iwana ta iumydela tahetoreny-ò dehemynymy nade taaòm̄sỹdỹỹna-ribi. Tahe wobedesana-ò roholamy. <sup>26</sup> Tahe deòduò-ò narybede: — Aòhereriwe. <sup>27</sup> Dirawyònyde: —Ahelỹỹna kie ròòsereri aòhe rotỹỹnyòhyylemy. Tai boo broreni rirubunya. <sup>28</sup> Iumydela tai reburere ròte deramy reare. Idi tyby tamy nade riròtenykemy. <sup>29</sup> Tahe iriòre dirawyònyde: —Aòhe òhòkò adee raaòm̄sỹdỹỹnymyhỹre. Ibutumy arybe retyhynymy watximahãre. Ihãreta budoeni wadee tewahinyòhyymyhỹte, wajoi mahãdu-wana idi arexideysanykemy. <sup>30</sup> Katahe ariòre urile aònawiji rahura wedena mahãdu-wana. Ròòsemyta kai broreni riòrede tamy terubunya. <sup>31</sup> Tai tyby dirawyònyde: —

Wariòre iny ratximyhÿre kiaremyta ibutumy waaõwiwi heka ahõrõle rare. <sup>32</sup> Iny bedesarenymy heka kawese rewinyre, wadee awireki. Ahelÿÿna dori ruruwese-ribi rexixara. Ikõ-ribi itxi ijara rÿira. Tahe rawobedesarenyre.

## 16

<sup>1</sup> Jesuisi taerydÿÿna mahãdu-ò relyyre ijyyõ: –Hãbuõ inieru sõwere. Tamy deòduõ ibutumy inieru-di raaõmysÿdÿÿre ijõ nieru ributunykemy. Ijõtxu tahe inyõ rarybere: –Eòdu riki heka anieru-di òbitimy aõkõ raaõmysÿdÿÿmyhÿre. Anieru sõwemy rexihumyhÿre. <sup>2</sup> Tahe didyde ixidee taonta retehekemy. Tamy rarybere: –Inatyhymy aõbo umy iny rarybemyhÿre? Wanierumy tyriti aretehekemy watxireri. Òbitimy aõkõkeki, waribi arateònyke. Wanieru-di tiu maaõmysÿdÿÿnyõkre. <sup>3</sup> Tahe teòdu iximy rexiraykynyre: –Wadinodu riwateònyke. Aõhebo arotÿÿnyke? Warurukõre dori tahe aõmysÿdÿÿsira ariwinyõtyhy. Tule ijõ iny-ribi iixitòedÿÿna riwaixÿrure. <sup>4</sup> Reeryre tahe, aõhebo arotÿÿnykremy. Aõwiihikÿ wabiòwa dee ariwinykre. Riwateònykeki tahe wabiòwasÿ-ò arakre. <sup>5</sup> Ibutumy nieru huòtedu mahãdu-wana rarybere, tawedu-ribi huòtedu wahe. Tamyreny rarybere: –Tiwesebo tewyta wawedu-ribi? <sup>6</sup> Tahe diwyònyde: –Adÿÿ rehuòtera, 100 hynamy wahe. Tai tahe rarybere ijõ: –Iwekre tahe wylemy biritinyke, 50 wahe. <sup>7</sup> Ijõ-ò tahe rarybere: –Tiwesebo adeve? Diwyònyde: –Trigo rehuòtera, 1000 prato wahe. Tai tamy rarybere: –Kai 800my biritinyke. <sup>8</sup> Iribi tahe hãbu ityhy heka teòdumy

rarybere: –Tii inatyhy nieru erydu ratxireri. Tahe Jesuisi rarybere: –Kabede wijinabòdu mahādu heka aōmydỹnana erydutyhy rare, ityhydỹdu mahādu ratyre wahe. <sup>9</sup> Tai tahe adee ararybekre. Kabede mahādu biòwamy boibeke, anieru-di. Tahe anieru ituekeki, Deuxu taheto wiwihikỹ-ò aradykre, biu-ò heto wiwihikỹ wahe. <sup>10</sup> Aōmydỹnana aō aōkōmy kai òbitimy masỹnykeki, tule aō nihikỹmy kai iweselemy mabeke. Inyō heka ibutemy wasikeki, tii tule aō nihikỹmy rawasinykre. <sup>11</sup> Kaiboho heka kabede nieru-di òbitimy aōkō atxibenykeki, tule biu-ki araròsòna bitaōtyhy, aō wiwihikỹ inatyhy wahe. <sup>12</sup> Iny witxira nieru-di heka òbitimy boibebenyōkeki, timybo anieru tyhy-di òbitimy boibeke. <sup>13</sup> Inyō iny inatxi deòdumy aōkō rarekre. Inatxinaō dori iluukre, ijō ta iluukōkre. Deuxu dee maaōmysỹdỹōtyhy. Tiu nierurahi inatyhymy teamyhỹteki.

<sup>14</sup> Fariseu mahādu tamy roholareu, urile idi nierurahi risinyrenyrene, tiiboho ire nieru ributunymyhỹrenyrene bòdỹlũuurenyrene. <sup>15</sup> Tahe Jesuisi tamyreny rarybere: –Kaiboho heka òbitimy inyko-ò ixi-di atximahātenyete. Ihāre tahe Deuxu timybo toimahāte rierymyhỹre aōna aōnareny bina. Aōmy hābu rexinohōtinymyhỹre, aōtxi-ki Deuxu-ò awiōhyyre. <sup>16</sup> Moisesi bede ywina rybe tahe tule Deuxu Rybedu mahādu awi rare, Joaō Sebedỹdu rehemynyre tahe ixāwire. Iu tahe Deuxu Iòlòna Rybe wihikỹ tamyra ròhònyre. Kia tahe iny ritohodỹnyre. Ibutumy iny kia-ò ralokremy idi ratxireri. <sup>17</sup> Biu, bede rexihuke

tahe isiraõre. Deuxu rybe tahe rexihuõtyhy. Kia isiratyhy rare. Ityyriti rybe wedenaõ riõnonyõtyhy. <sup>18</sup> Hãbuõ tahãwyy-ribi ixãwikeki, idi iwitxira-wana roikeki, tii õtadu rare. Hãwyy ixedu-wana tii roikeki, õtadu rare.

<sup>19</sup> Ityhy mahãduõ riki tyy òwyhykỹwiwi-di rexi-tyynymyhỹre. Tii idi rexirabedesirananyimyhỹre. Awimyhỹre tuu ratximyhỹre. <sup>20</sup> Tahe urimynodu tyymy binadumy iijõ-ki ixyby ixyby ratximyhỹre. Lazaru inire. <sup>21</sup> Tii ityhy rỹsỹnauhe rirỹsỹkemy raòbirenymyhỹre. Ijòròsa dori itybyinatòmý dirahumyhỹde. <sup>22</sup> Lazaru rurureu, ýju mahãdu ridyrenyre biu-ò ilabiereny rora-ò, Abraõ wahe. Tule ityhy rurure idi rituunynrenyre. <sup>23</sup> Tahe rubu-ki rubu mahãdu bedebina-ribi aõhõkỹmy dỹynana ityhy Abraõmy robire irehe-ò Lazaru tule irora-ki. <sup>24</sup> Tahe ityhy dyryde: — Abraõ, walabie, wadi inihe bedexiwoboronyke. Lazaru ini wadee tebò-ki beruty-di kanake wadòròtò elehynamy. Jiarỹ dori raõhỹtỹhỹtỹreri kaheòtywo-ki. <sup>25</sup> Tukõleta, Abraõ narybede: — Dàa aõwiihikỹ-di tatemyhỹ-di bexinohõtinyinke. Tukõlemyta Lazaru aõbina binahakỹle rimiry. Tahe kaki aõwimy Lazaru ratxireri. Tukõmyta kai ibymy atxiteri. <sup>26</sup> Ihãre ta hãloohukỹ inyko-ki rỹire. Timyki kaludu kia-ò iòhòreseõna. Tule kia ludu kaò iòhòreseõna. <sup>27</sup> Hebose, Abraõ walabie, kamy ityhy narybede, Urile Lazaru wasỹ-ò biteònykekõ aõbo. Waseriòreboho deòwarisidỹmy. <sup>28</sup> Waseriòreny dori iruyrenenyre urikõ-ribi kabedebina-ò kòdòiheny. <sup>29</sup> Tahe Abraõ diwyònyde: —Tiiboho dori Moisesi tyyriti, Deuxu rybedu mahãdu tyyriti dire. Tii tahe tamy roholarenymy rityhynrenyke.

<sup>30</sup> Ityhy narybede: –Aõkõre Abraõ walabie. Kia inyõ tarubu-ribi rexixamy ròðsekeki xiery ta, taòrarunareny-ribi rexirahĩrenyke. <sup>31</sup> Tahe Abraõ dirawyònyde ixyby. –Moisesi tyyriti rybe-ò, Deuxumy rybedu mahãdu rybe-ò roholaõkeki, tii mobo rexixake tule ityhydỹõna.

## 17

<sup>1</sup> Tahe Jesuisi taerydỹõna mahãdu-ò rarybere: –Kiemy inyõ wodohonadỹõmy aradykre òraruna-ò besekemy. Kobe làhàxe tii kiawesemy rotỹõnykreki. <sup>2</sup> Tii dori ibinatyhy rare. Wade heka kabera-txi mana-di rataataamy sỹy-ò reakenawi rare. Tukõmy uri-ribi watyhydỹõdu tỹmyraõ riòrarudỹõnyheny. <sup>3</sup> Bexiijebeny ta. Aityhydỹõdu seriòre rexiòrarunanykeki, tamy marãhĩke. Tii rexirãhĩkeki, iaõna aõna bina-ribi bexinohõtilosanyke. <sup>4</sup> Txu sohojiõmy adee rexibinanykeki, kai tule ibinamy tai mahamy. Tii ixi-di rexiwotòenymy adee nakeki, tule idi bexiwobrunymy bexinohõtilosanyke iaõna aõna-di.

<sup>5</sup> Jesuisi erydỹõna mahãdu dexitòenydenyde: –Wanyrỹreny, wainatyhynareny ini bisõwedỹõnyke. <sup>6</sup> Jesuisi dirawyònyde: –Ainatyhynareny heka sunyisõmo wesekeki, kamy bederarade-ò marybebennyke: –Bexitake inihe idi bera-txi myike. Tahe tii aratyhynykre. <sup>7</sup> Titxibo kaibohoõ eòdudirenykeki aoworu-di itxeredu ada budoeni-di itxeredu wahe. Tii taaõmysỹdỹõna-ribi kanalokreu, kawesemy aõbo tamy manarybekre? Wy, wylemy rikiroxikre dori. <sup>8</sup> Timyki kawese tamy arybeõna. Tukõmyta tamy marybeke: –Warỹsõna biywinyke idi wadee, idi manakre.

Ariroxikre dori. Wabyre arihu-di ta bexiòenykre. <sup>9</sup> Teòdu deòdumy rearahu-di aõbo, txiòtòetuukemy tamy rarybere aõbo. Timyki tukõna. Kiemy dori taaõmysÿdÿÿnale riwinyre. <sup>10</sup> Iu aõmysÿdÿÿnareny bihudi, iwese heka atximahãbenyke kamy bexirybenymyhÿbenyke: Inyboho deòdule roire, aõtyhy aõkõ mynodu, iny aõmysÿdÿÿnarenyle heka inyboho riwinyreny.

<sup>11</sup> Jesuisi Jerusalẽ hãwã-ò ramyhÿreu, Samaria bedede, Kalileia bedede wotya-di rare. <sup>12</sup> Iu hãwãõ-txi raloreu, debo ituemy sõwereny tyymy binamy mahãdu iry-ò doide, tahe irehemy rexiereny. <sup>13</sup> Iribi tamy drydenyde: — Jesuisi, Erydÿÿdu, wadireny ini bexiwobrunyke. <sup>14</sup> Tureny robireu, narybede Jesuisi-ò: —Xiwenahãwãõ-txi mahãdu-ò ixi-di itxerenamy bõike. Kia-ò rariamy roirenireu, tahe reytereny. <sup>15-16</sup> Ijõreny Samaria ludu mahãduõ reytemy iximy robireu, Deuxu riwowydÿÿnymy tamy dòòsede, rawiunymy. Tatiowomy Jesuisiko-ò resere. Tahe rarybere: —Txiòtòetuuke. <sup>17</sup> Tahe Jesuisi ritÿÿraxinyre: —Debò itue wese, asõwereny? Titxibo ta debò inaubiòwaboho roire? <sup>18</sup> Aõherekiwe kaa iny witxira sohojile Deuxu wowydÿÿmy dòòsede, Samaria luduõ wahe? <sup>19</sup> Tahe Jesuisi tamy rarybere: —Mynyke, idi makre. Atyhydÿÿna òraru-ki dori teyteta. <sup>20</sup> Idi fariseu mahãdu Jesuisi-ò rÿÿraxirenyre: —Tiubo Deuxu Iòlõna kanakre? Tii diwyònyde: —Timyki Deuxu Iòlõna dehemy nysÿnamy inyõ robiõtyhy. <sup>21</sup> Tule inyõ kiau rarybeõtyhy: —Betehebeny inihe ka-ò: —Tukõmy aõbo: —Kowaki heka rare? Deuxu Iòlõna dori aworeny-ki rare.

22 Tahe taerydÿÿna mahãdu-ò rarybere: — Tiutxumy heka Deuxu Riòre Hãbutyhyhykÿ txumy bobibenykemy tahe bobibenyötyhy. 23 Tahe ijö adeereny kanarybekre: —Bedetehebenny inihe kaò ada kowa-ò. Tahe iitxerenyömykre. 24 Iwese tiribi tiò biu relaanymyhÿre wese heka Deuxu Riòre Hãbutyhyhykÿ txu kÿnykre. 25 Delemy tahe tii aõhõkÿmy rotÿÿnykre. Wijinabòdu mahãdu teramy reakre. 26 Noe bededÿÿnana wesemy heka rÿimyhÿkre. Iu beòra rariareu. Tahe Deuxu Riòre Hãbutyhyhykÿ kedehemynykre iu. 27 Ibutumy heka worana bedehesi rÿire. Lisisò tahe rÿire. Hãwyy herina lisina rÿire iu. Iu tahe beòra rariare. Ibutumy ituere. 28 Lòò bededÿÿnana tule iwesere. Tiiboho worana bedehesidile rÿire. Tiiboho rityhynyötyhy. Urile hetomy riwinymyhÿre, oworumy riwinymyhÿre, aõna-di rohonymyhÿre. 29 Iu tahe Lòò ihãwã-ribi ròhònyreu, Deuxu heòty ityre riteònyre. Biu-ribi heòty ityre resere enxofre-wana. 30 Iwesele txu tii heka rarekre heka, Wadehemynyna Deuxu Riòre Hãbutyhyhykÿ wahe. 31 Kiau tahe inyö ihetotyre heka rÿire. Malòkekõ heka ahetowo-ò aõnamynamy. Inyö tule oworu-ki rÿire, taheto-ò aõkõ ròòseke. 32 Lòò hãwyy-di mohõtinyke. 33 Inyö taumy riyrubunykeki, tii ruruke. Ijõ tahe wadewimy rurukeki, tii taumy rayrubukre. 34 Adeerarybere: —Bede rurureu heka inatxi hãbu ròròreri. Ijõ heka rakre dynamy reakre. Ijõ tahe rarikre. 35 Inatxi hãwyy heka rÿsÿna-di raaõmysÿdÿÿnyny heto-ki ratxikre. Ijõ heka dynamy reakre, ijõ heka rarikre. 36 Inatxi hãbu heka oworu-ki



raaõmysÿdÿÿkre. Ijõ heka rakre dynamy reakre, Ijõ tahe ririkre. <sup>37</sup> Ierydÿÿna mahãdu rÿÿraxire. Tixibo rÿikre, Wanyrÿ? Tii rirawyõnyre: —Tixibo iumy rubu roire-wana, rara tai wii ributunyre.

## 18

<sup>1</sup> Jesuisi heka ròkewesenanyre ribedeerynyreu. Kia wese heka tii ijyymy relyyre. Rex-itòenyhykemy tii ribedeerynyre tule ixitòedÿÿ-ò ixirarenyõmy. <sup>2</sup> Hãwãõ-ki tahe hãbu matuariõ rare, tii tahe ibinare. Juizimy heka ratximyhÿre ywisidÿÿdu wahe. Tii iny rityhynyõtyhy, Deuxu lau ruberuõmyhÿre. <sup>3</sup> Tule heka hãwy wyteseõ tai rasÿnymyhÿre. Kia tamy ramyhÿre sõwemy. Tamy rarybera: —Biwawikòhenakykre wahe. Wakòludu tahe riwahureri. Kywisidÿÿkÿdu kai atxiteri. Anoherekibo tiwawokutòenykõteri. <sup>4-5</sup> Aõðhòkõmy hãbu iaõna aõna òbitidÿÿ deramy reamyhÿre. Tahe Hãbu ixidee rarybehyyra. Inatyhymy jiarÿ inyõ retyhynyõtyhy. Tahe hãwy wytese sõwemy wadee raryberekì, jiarÿ ariòbitinykre iaõna aõna ibutumy iòludu-wana. Aõkõkeki tiiemy kidiwarulòlòenyke. <sup>6</sup> Tahe Jesuisi ritÿnynyre: —Juizi bina rybe-ò kaiboho bohòlabenyke. My wahe. <sup>7</sup> Deuxu heka taijoi mahãdu-ò roholake. Òbitimy iòludu-di riywisinykre. Taijoi mahãdu dori tamy rexitòenyre. Tii wymy riwiòhenanyke. <sup>8</sup> Tii inatyhymy taijoi mahãdu riwiòhenanykre. Jiarÿ, Deuxu Riòre Hãbutyhyhykÿ wymy adehemynykreu, watyhydÿÿdu-txi aõbo areakre.

<sup>9</sup> Tule Jesuisi kia ijyy relyyre, iny ixityhymy ixi-di ratxityhymy kia ijõ inymy kiale

radònymyhÿre. Kia tahe rikewesenanyre. <sup>10</sup> — Iny inatxi hãbumy heka templo-ò ròirenyre rexitòenykemy. Ijõ fariseu rare, ijõ tahe nieru arisidu rare. <sup>11</sup> Fariseu tahe rÿimy rexitòenykemy ixidee. My wahe: —Deuxu, jiarÿ aõhãbubina aõkõ rare. Tai tahe umy reàlàmy wahãre. Jiarÿ aõwasidu aõkõ, aõðrarudu aõkõ, aõðtadu aõkõ. Iwese kowa nieru arisidu wese aõkõ jiarÿ rare. Txiòòetuuke tai. <sup>12</sup> Semana sohoji heka wabyreõ-di inatxixumy rewymyhÿre. Tule waaõna aõna ibutumy ijura adee rewahinyre. Debòwìona-ribi sohoji rewahinymyhÿre wahe. <sup>13</sup> Nieru arisidu tahe irehemy rÿire. Biu-ò aõkõ retehere, tahe rexihetenyre rexitòenyrerimy Deuxu-ò. My wahe: —Deuxu, biwawotòenyke. Jiarÿ òrarudu rare. <sup>14</sup> Jesuisi ijyy ritÿnynyre: — Adee ararybekre. Mobo teysamy taheto-ò nade? Ixityhydÿÿdu aõbo ada ijõ aõbo. Kohe ijõ tuure, ixityhydÿÿdukõ wahe.

<sup>15</sup> Tiiboho heka uladu tamy didydenyde. Iu Jesuisi tebò iratityre ritidimy ritxuhore awimy roirekemy. Tahe ierydÿÿna mahãdu tamy idyrenyõkremy raryberenyre. <sup>16</sup> Jesuisi rarybere: —Txiò, kididyke uladu wadee. Uladu wese dori Deuxu Iòlòna rare. <sup>17</sup> Inatyhymy ararybekre: —Moõ heka uladu wesemy Deuxu Iòlòna rityhynyõkeki kia heka Deuxu Iòlòna-ò ralòõtyhy.

<sup>18</sup> Idi tahe iweduõ rarybere: —Erydÿÿdu wi-hikÿ, aõwexe ariwinykre idi biu-ò arahenykemy. <sup>19</sup> Jesuisi tamy rarybere: —Aõbo wa wihikÿmy wadee tarybeta. Hãbuõ tiu awiõre. Deuxu sohojile

tahe awira. <sup>20</sup> Bede ywina tyyriti kai teeryte:  
 —Rubudỹỹõmykemy, tule òta òtaõmykemy,  
 wasiõmykemy, tule ruiõmykemy, iny wii  
 itxenadỹỹõmykemy, adi biywinykemy, boo  
 tule.

<sup>21</sup> Hãbu tamy rarybere. —Kia bede ywina rybe  
 retyhynyhyllere, uladudihyyle wahe. <sup>22</sup> Jesuisi  
 rarybere: —Kai sohoji aõmydỹỹnale aki nasir-  
 anyde. Kai makre, ibutumy aõna aõna-di bo-  
 honykre, idi tahe kia nieru biwahinykre iny  
 aõkõdu mahãdu-ò. Kia tahe aõmydỹỹnadikre biu-ki.  
 Tahe manakre biwaheludunykre. <sup>23</sup> Kia rybe-ki  
 heka hãbu rabadewore. Rexitare ibedewomy  
 iaõna aõna sõwetyhyreki. <sup>24</sup> Jesuisi retehemy ibed-  
 eryry-di tahe rarybera taerydỹỹna-ò: —Kia iny  
 iaõna aõna sõwemy rỹireri, Deuxu Iòlòna-ò ralòke  
 isirare. <sup>25</sup> Kamelo tyyrorenawo-di ralòkemy isir-  
 akeki, kia-ribi isiratyhyre iny iaõna aõnadikeki  
 ralòke Deuxu Iòlòna-ò. <sup>26</sup> Ijohonadu tahe widee  
 rarybere: —Mobo tai biu-ò hedukre. <sup>27</sup> Jesuisi  
 rarybera: —Inatyhymy kõaõboka hãbu-ò isiraty-  
 hyre. Deuxu-ò tahe ibutumy aõna aõna isiraõre.  
<sup>28</sup> Pedro rarybere: —Boholake, jiarỹboho ibu-  
 tumy rerirenyra araheludunykremy. <sup>29</sup> Jesuisi  
 rarybere tamy: —Inatyhymy adeereny arary-  
 bekre. Moõ waluukeki, rybewihikỹ luukeki, kia  
 heka ririkre: heto, taseriòre, tyby tadi-wana,  
 tariòre, tabede, ibutumy waòraru-ki, Deuxu Iòlòna  
 òraru-ki, ririkre. <sup>30</sup> Ka bedekile ritakre sõwetyhymy  
 ibutumy aõna aõna. Ihãreta biu-ò rahenykre  
 Deuxu-wana rasỹnykemy.

<sup>31</sup> Jesuisi taerydỹỹna mahãdu ridyre  
 inysõwe-ribi tamyreny rarybekemy: —

Boholabenyke waijoi! Jerusalê-ò rokoirenykre. Tai iny riwarubunykre jiarỹ Hãbutyhy rarehãre, Deuxu Riòre rarehãre wahe. Iwese Deuxu Rybemy rybedu mahãdu rarybere wese. <sup>32</sup> Tiiboho riwawahinykre judeukõdu mahãdu-ò. Tiiboho riwabinabinadỹnykre, riwalahikre, watyre rarybexinykre. <sup>33</sup> Riwahetenykre òhòte-di, idi riwarubunykre. Ihãre tahe inataõ txu-di tahe adexixakre rubu-ribi. <sup>34</sup> Jesuisi erydỹna mahãdu urile bede riòtiinyrenyre. Aõmybo tii rarybere rierytyhyõrenyre. Irybe tamyreny dori ierynatyhykõreri.

<sup>35</sup> Iu Ijeriò hãwã-ribi iòhòmy roirenyreu, inatxi iny ruetãmy heka ronymyhỹ Jesuisi ibire-di rareu. Tiiboho nierумы rexitòenymyhỹrenyre. <sup>36</sup> Inysõwe-ò roholarenyre tahe, tii rỹraxyrenyre: —Aõhereriwe. <sup>37</sup> Tahe tamy rarybere: —Jesuisi wa rareri Nazare hãwã ludu wahe. <sup>38</sup> Tahe ruetãõ ryyre: —Jesuisi, Davi riokore! Biwatòenyke hewa! Wadi làhà inihe bexiruxetòenyke. <sup>39</sup> Iny sõwemy tamy rarybere: —Iryõmyke! Ihãre ta tii rryrymyhỹre: —Davi riokore, wadi mawotòeke! <sup>40</sup> Jesuisi ryyre tahe rarybere: —Tamy byryke wadee kanakemy. <sup>41</sup> Jesuisi tamy rarybere: —Aõmybo kai taruteri adee arutỹnykremy. Tahe hãbu ruetàhàkỹ tamy rarybere: —Wawedu, ixityre arobikremy. <sup>42</sup> Jesuisi tahe tamy rarybere: —Makre, atyhydỹna kai arateytenyra. Kialehe rare. <sup>43</sup> Aõwesele ixityrele tii robire. Tahe Jesuisihemy rare ryy-di. Taihe ibutumy iny heka Deuxu riwowydynymyhỹ.

## 19

<sup>1</sup> Ijeriò hãwã-ki Jesuisi rehemynyre. Idi rariareri. <sup>2</sup> Tahe hãbuõ tahe Jesuisi riere. Zaqueu inire. Inieru sõwere. Tii nieru tarasadu weduõ rare. Inieru sõwere. Tii heka iyjare tahe Jesusimy robiõtyhy. Raòwònyre tahe òwòru-txi. <sup>3</sup> Tii Jesusimy robikemy risỹnymyhỹ, tiu tuu robiõhyymyhỹreki. Iyjare-ki tahe rexisiranyre. Kiemy dori iny rare rare iko-ki rỹimyhỹ. <sup>4</sup> Tahe ijoiko-ò rexiraðre tai òwòruõ-ò raòwònyre Jesusimy robikemy iribi idi kanakreò. <sup>5</sup> Iu Jesuisi tamy rehemynyreu, biu-txi retehemy Zaqueu-ò. Narybede: –Wylemy bedeseke Zaqueu. Wiji dori aheto-ki bede wadi rỹike. <sup>6</sup> Tahe rabetesamy wymy resere. Awimy Jesuisi rybe-ki rahare. <sup>7</sup> Tahe inyõ mahãdu iòraru-ki kamy rexirybenyrenyre: –Aõhewe Jesuisi iheto-ò rara? Tii iny òbikõmy nodu hãrele wahe. <sup>8</sup> Zaqueu tahe Jesuisi rarybere: –Bodoholake ini, Wanyrỹ. Tahe waaõna aõna iwekre iaõkõdu mahãdu-ò ariwahinymy ararekre. Tule txibo inyõ-ribi rowasire inaubiòwa wawasi ratyre tamy ariwahinykre. <sup>9</sup> Tai Jesuisi narybede: –Wijityhyle kahãbu sỹmahãdu-ò henana rehemynyra. Kahãbu tule Abraõ riore riòrele rare. <sup>10</sup> Deuxu Riòre Hãbutyhyhykỹ dori iny òrarunamy resere mahãdu òrysmy itarasamy nade. Jiarỹ tiire.

<sup>11</sup> Jesuisi tamyreny rawesenanyre timybo Deuxu Iòlòna raremy. Jerusalẽ hãwã-ò iòhòmy ratximyhỹre. Tai tahe Deuxu Iòlòna iòhòmy ratximyhỹremy roholare. <sup>12</sup> Tahe Jesuisi rarybere iny ityhyõ heka: –Inyõ nihikỹ heka rakemy ratximyhỹre ijõ bedè-ò ratỹinykemy. Tai iòlòmý

ronykremy rare. Iribi tahe ròòsere. <sup>13</sup> Tii tahe taaõmydỹnana ririre teòdu mahãdu-ki. Teòdu mahãdu debòwiòmý heka womati tỹrỹrỹhỹkỹ nieruõ sohoji sohoji tamyreny riwahinyre. Tamyreny rarybere: –Nieru bitakre, idi bibutunybenykremy adireny watxireri adooskrey. <sup>14</sup> Tahe kia bede ludu mahãdu iòlò deramy ratximyhỹre tai tahe tamy rybemy iny mahãduõ riteònyre: –Kahãbu aõkõ iny iòlòreny ronykre. <sup>15</sup> Ihãre tahe iòlòmý ronyre. Idi tahe tanieru wedu mahãdu-ò rarariòwyre. Tiwesebo teòdu mahãdu nieru ritare rierykemy. <sup>16</sup> Juhuludu tahe rehemynyre: –Wawedu, betehe inihe ijõ debòwiò anieru ratyre rebutunyre. <sup>17</sup> Tahe iòlò sòwemy riwowydynyre: –Awityhymyhe taaõmysỹdỹta. Kai heka deòdu wihikỹ tate. Kai ibutedile sòwemy tewinyte tahe debòwiò hãwã adee ariwahinykre. <sup>18</sup> Ijõ tahe rehemynyre: –Wawedu, betehe iny iruyre anieru tyre rebutunyre. <sup>19</sup> Tahe iòlò tamy rarybere: – Kai sỹ iruyre hãwãmy dinodu mabekre. <sup>20</sup> Ijõ deòdu rehemynyre: –Wawedu, ahãxe anieru. Jiarỹ tyky-di reraserasenymy rerarenyre. <sup>21</sup> Jiarỹ alau raberure. Kai dori hãbu nieru tarasaery heka tate. Aõ taaõmysỹdỹteri-ribi aõkõ heka nieru tetamahãte. <sup>22</sup> –Kai heka deòdu awi aõkõ heka tate. Arybe xiery waribi arateònykre. Kai tiwaeryte jiarỹ nieru tarasaery heka watxireri. Aõ raaõmysỹdỹre-ribi aõkõ nieru retamahãre. <sup>23</sup> Aõherekibo. Kia nieru yrubuna heto-ki terikõte. Tai iximyna ratyre ini iribi ratate. <sup>24</sup> Iòlò teòdu inatxi-ò rarybere: –Wanieru iribi bitabenyke. Ijõ hãbu sòwemy

ròtareò rawahikre. <sup>25</sup> Ijõ raryberenyre: —Tii heka debòwiò nieru ijõdire. <sup>26</sup> Adee ararybekre: —Inyõ òbitimy raaõmysỹdỹykeki, tii sõwetyhymy ritakre. Tule inyõ òbitimy raaõmysỹdỹyõkeki, tii ibutumy ròõnodỹykre. <sup>27</sup> Iwedu rarybekre: —Waòludu mahãdu tahe wadee bididybedenyke. Wadera mahãdu wahe. Wako-ki birubunybenyke.

<sup>28</sup> Tarybe rahudi tahe Jesuisi rare Jerusalẽ hãwã-ò.

<sup>29</sup> Jerusalẽ iòhòmý ritehemynyrenyreu, tahe inatxi taerydỹna bede riywinyra hãwã-ò roikemy. Inatxi hãwã iòhòmý roire, Betabaji, Betỹnia-wana. Kia-ò Oliveira hãwãlò roire. <sup>30</sup> Jesuisi rarybere: —Kaiboho boikre kowa hãwã-ò. Kowa-ò birònykreu jumenta riòre mahabenykre. Moheka ityre rariaõlemy ratximyhỹre. Biesemy, wadee bididybedenyke. <sup>31</sup> Inyõ adeereny rarybekeki: —Aõhekremybo idi atxitenyteri. Tahe tamy marybebenykre: —Wanyrỹ tuu rurureri. Ixityre kaò kidiòkesedỹnykre. <sup>32</sup> Tahe hãbu roire. Iwese Jesuisi rarybere wese ibutumy rỹire. Jumenta riòre ryro hetoijø-ki ritisanymy rỹimyhỹ. <sup>33</sup> Tai riesereu, iwedu rarybere: —Aõherekibo teeseteri. <sup>34</sup> Tai tiiboho Jesuisi rybe myna tamy raryberenyre: —Inynyrỹ tuu rurureri. <sup>35</sup> Tahe ridyrenyre jumenta riòre Jesuisi-ò. Tiiboho tatyyreny ritidirenyre jumenta riòre tyremy. Tiiboho risỹnyrenyre Jesuisi ityre-ò. <sup>36</sup> Jesuisi rehemynyreu, ijõboho tahe tauwòhi ryromy ritidire ityre rariakemy. <sup>37</sup> Jerusalẽ iòhòmý rehemynyreu, Oliveira hãwãlò-ribi, ierydỹna

mahãdu rawyhyrarònyreri, tule ryryreri.

<sup>38</sup> Tii heka wowydyna rare. Tii heka Wanyrỹ ni-wesekemy naderi. Wowydyna rare Deuxu Iòlòna. Kai Iòlòna kanakre. Wyhyrarò biu-txi kodoholakre.

<sup>39</sup> Ijõ fariseu mahãdu rarybere Jesuisi-ò: –Marybeke aerydỹna mahãdu-ò tiiboho riyrykemy. <sup>40</sup> Jesuisi tamy rirawyònyre: –Tiiboho riyrykeki, manale wowydynamy ryryke.

<sup>41</sup> Jesuisi Jerusalẽ hãwã-ò iòhòmy rehemynyreu, rahinyre. <sup>42</sup> Tii rarybere: –Kaiboho ywinatyhy teeryòte. Inatyhymy teeryte wana wadee awire, tahe aòkõre. <sup>43</sup> Ijõ txu kanakre. Ahãwã ibutumy rirurawonykre aòbina mahãdu, aòludu. <sup>44</sup> Ibutumy hãwã ituekre. Iny iwo-ki tule rurukre. Mana ibutumy kedesekre. Rierykõre dori tiubo jiarỹ ahedỹrenymy nanade.

<sup>45</sup> Tahe Jesuisi dohodỹna hetowo-ò ralore. Tahe kia-ribi aõna aõna-di rohonomyhỹre mahãdu, õbradu mahãdu diteònyde. <sup>46</sup> Rierynanomyhỹre tahe tamy rarybere:

–Raridỹõlemy aõbo rỹireri: –Waheto kõaõboka inatyhymy ixitòedỹna hetomy rỹirakre. Idi kaiboho tewinytenyte wasidu hetowesele.

<sup>47</sup> Txu ibutumy Jesuisi dohodỹna heto-ki ròbedeerydỹmyhỹ. Xiwe wedu mahãdu, Deuxu aõmysdỹdu wedu mahãdu roholarenyreu, ròhòtinyrenyre: –Timybo inyboho Jesuisi rubudỹmy rikiwisỹnyrenykre. <sup>48</sup> Tiiboho tahe aòkõhykyre iny sòwemy dori bede riòtiinomyhỹ ibedeerynadỹna-ki.



## 20

1 Ijõ txu tahe Jesuisi ròbedeerydỹmy, Ijyy Tỹmyra Wihikỹ wahe. Ririranymyhỹrenyreu dohodỹna hetowo-ki, bede ywina erydỹna mahãdu, Deuxu xiwena wahidỹdu mahãdu wedu, tule matuari mahãdu tamy doide. 2 Tiiboho tamy rỹraxyrenyre: –Mowe ateòdỹdure kia aõna aõnamy tatỹnymyhỹtemy. 3 Jesuisi dirawyõnyde: –Adeereny tule arãraxykre. Kaiboho bidiwawyõnykeki, tahe jiarỹ akoreny yrxina ariwyõkre aõrudibo aõna aõna rewinymyhỹre. 4 Tahe Jesuisi ritỹraxyre: –Mobo Joaõ ratisebedỹmy riteranyre? Deuxu aõbo ada iny aõbo? 5 Tiiboho widee rarybera: –Deuxu riteranyremy inyboho rakaryberenykeki, tai tii rarybekre: –Aõherekibo tahe tii tetyhynytenyõte. 6 Inyõ riteranyremy rakaryberenykeki, iny aruberuwỹhỹrenykre. Ibutumy iny dori Joaõ rityhynyre tii Deuxu rybe-di rybedumy. Ijõ ijoi mahãdu urile inyreny kidihetenykre. 7 Tai tahe tiiboho raryberenyre: –Jiarỹboho reeryõrenyre. Tai tahe Jesuisi rarybere: 8 –Hebo, jiarỹ adeereny iximy ararybeõtyhy modeòdỹnamy jiarỹ tuu watxirerimy.

9 Iribi tahe Jesuisi tamyreny ijyy-di rierynanymyhỹre: –Hãbu uva oworuõ wese ròbròre. Tahe riòtitynyre. Tahe hãloo riare oworu ubetya-ki, ruỹdỹnomy. Tahe utò riwinyre. Idi tahe rityhere hãbu mahãdu-ò. Tahe rexitare tasỹ-ribi ijõ bede-ò. 10 Tahe bederaty siredemy bededỹnana rehemynyreu, iwedu teòdu riteònyre bederaty ritakemy. Tahe oworu-di itxeredu

oworu wedu deòdu rimyrenyrene, rihetenyrenyrene idi riteònyrenyrene ixihyylemy. <sup>11</sup> Ixityre oworu wedu teòduõ riteònyrene. Kia heka irati rihetenyrene ta tamy rawobinarybenyrene. <sup>12</sup> Ijõ riteònyrene. Kia heka rirubunyrenyrene. <sup>13</sup> Iwedu iki dee rarybere: —Aõhebo arotỹỹnykre. Tahe oworu wedu iriõre sohojilere, wariõre kie kie sohojile ariteònykre. Tai tiiboho rityhynyrenykre. <sup>14</sup> Kia oworu-di itxeredu mahãdu widee raryberenyrene: —Kia heka wedu aõna aõna tarasadu rare. Rurukre, iki tahe iaõna aõna inydeerenykre. <sup>15</sup> Tahe rimyrenyrene idi rirubunyrenyrene tahe idi rehurennyrene oworu-ribi. Jesuisi rityỹỹraxinyrene: —Aõhebo tahe oworu wedu rotỹỹnykre. Tai Jesuisi ixityre narybede: <sup>16</sup> —Tii kanakre oworu-di itxeredu mahãdu hudumy, tai tahe oworu rityhekrene iny witxiraõ-ò. Kia-ò tiiboho roholareu, tahe raryberenyrene. Timyki tukõna. <sup>17</sup> Jesuisi iki reny retehemy tahe rarybere: —Ritina-di aõbo tariaõletenyte kia ryberiti: —Mana-di hetowidỹỹdu rehura. Kia mana heka hetohãtxi-ki heridu rare.

<sup>18</sup> Inyõ kia manatyrene resekeki, kia urile raoroorokrene. Mana tahe inytyrene resekeki, kia urile risyrisyrenyrene.

<sup>19</sup> Bede ywina erydỹỹna mahãdu, tule xiwena wahidỹỹna mahãdu wedu rimykeny riwisỹnyrene ki-aule. Brebumy ta turennykõre. <sup>20</sup> Tiiboho hãbubinaõ riõwynyrene tamy imynamy irybe-ki. Tai tahe Din-odu-ò riwahinykeny aõsirakõmy timykibo iru-taõmy rirybewitxiranyrenykeny. <sup>21</sup> Tiiboho rarybere Jesuisi-ò: —Erydỹỹdu, jiarỹboho araerymy adi watximahãrenyrene kai inatyhy hãbu tate. Iny ibutumy adee wiwese wiweselere. Inatyhymy

iny-ò Deuxurymy teerynanymahâte. Tahe ti-  
 iboho ritÿÿraxirenyre: <sup>22</sup> –Awire aõbo ada ib-  
 inare aõbo nieru rawahinymyhÿre bede dinodu-ò.  
 Timybo tahe, imposto raõwymy aõbo ada aõkõre  
 aõbo. <sup>23</sup> Jesuisi rierymyhÿre tõhõtinanareny, tahe  
 ritÿÿraxinyra: –Aõherekibo kaiboho tiwaurihiteny-  
 teri. <sup>24</sup> Wadee womati nieruõ bidiwy waitxere-  
 namy. –Kawe moõ tyytarasana rare, katahe moõ  
 tyyritina rare. Tiiboho dirawyõnyde: –Kiahe bede  
 dinodu hõrõ rare. <sup>25</sup> Jesuisi rarybere: –Hÿdebo,  
 bede dinodu hõrõ tahe tamy biwahinybeny, tule  
 tahe Deuxu aõna aõnahõrõ Deuxu-ò biwahiny-  
 beny. <sup>26</sup> Tiiboho aõkõre. Irybe-ki rimynamy aõkõ.  
 Urile ribedeòtiinyre.

<sup>27</sup> Saduseu mahãdu tamy nade. Kia heka iny  
 rubu-ribi rexixamy aõkõre-riki rierynanymyhÿre.  
 Tiiboho ritÿÿraxinyre Jesuisi: <sup>28</sup> –Erydÿÿdu, Moi-  
 sesi raritinyre bede ywina-ò, kaimy:

–Hãbuõ rurukeki, tahãwyw iriõre ijõdiõkeki, tahe  
 kia hãwyw tahãbu seriõre-wana roike.  
 Iriõredikre taseriõre rubuõwymy roikre.

<sup>29</sup> Seriõre debòinatxi reurõmy raremyhÿ. Juhuu  
 ijõ roire hãwyw-wana. Tahe tii rurure iriõreõlemy.

<sup>30</sup> Tahe ihewoludu iseriõre wytese-wana roire.  
 Tii rurure iriõreõlemy. <sup>31</sup> Ihewoludutyhy tule

ibutumy roire wytese-wana, tahe ituerenyre  
 iriõreõlemy. <sup>32</sup> Iròõbymy tahe hãwyw tule rurure.

<sup>33</sup> Ixixanau tahe mohãbubo tii-wana rarekre.  
 Ibutumy dori wytese-wana roire. <sup>34</sup> Jesuisi

rirawyõnyre: –Kabede-ki hãwywmy iny roimyhÿre.

<sup>35</sup> Ixixanabedeu heka moõ roiõtyhy, inyõ dori bede  
 kia riòbynykreu. <sup>36</sup> Ibutumy iny ÿju wese rarekre

biu bede-txi. <sup>37</sup> Moisesi tatyryiti itỹnyhỹkỹlemy rarybere: —Iny rubu-ribi kedexixakremy. Tai ta heòty òwòru sòmo riworonymyhỹki ixybylesỹ rarybera:

—Deuxu heka Abraõ, Ijai, Ijaò kia Deuxu rare.

<sup>38</sup> Tai Deuxu inyru mahãdu Deuxu dori rare. Iny rubu mahãdu ta aõkõre. <sup>39</sup> Inyõ rarybere: —Arawyõnakyhyna, Wanyrỹ Tate. Bede ywina tabohe teerytyhyte! <sup>40</sup> Tai tahe ixyby rỹraxyiõhyrenyre.

<sup>41</sup> Jesuisi rarybere: —Timybo bede ywina erydỹdu mahãdu rarybemyhỹre Kristu Davi riõre raremy. <sup>42</sup> Davi rarybere aõmybo Deuxu Tyytybytyhy tamy narybedemy iwiuna-ki:

—Wanyrỹ rarybere Wanyrỹ-ò:

—Bodony warurunawe-ribi.

<sup>43</sup> Txiõhe inihe, aòludu awarawo-txi aritidikre.

<sup>44</sup> Tahe Davile tanyrỹmy rininire. Timyki tahe Davi itybymykre.

<sup>45</sup> Tii taerydỹna mahãdu rierynamyhỹreu. <sup>46</sup> Tii rarybera: —Bexiemyhỹbeny bede ywina erydỹdu mahãdu lau. Tiiboho heka tyyrehetyhywidihikỹle rexitynymyhỹrenyre. Tiiboho heka ixi rybedỹlluurenyre hãwã riraki. Dohodỹna heto-ki ryananawi luurenyre. Tule ta anarỹ rỹi-wana, tyhytyrekile ryanana tamynyre awire. <sup>47</sup> Tiiboho tule wytese aõ aõkõ mahãdu aõna aõna ritamymyhỹrenyre. Ixitòedỹna rehehekỹ rexitòenymyhỹrenyre. Tiiboho heka aõnihikỹmy aõhõkỹmy dỹnanamy rotỹnyrenykre.

## 21

<sup>1</sup> Jesuisi retehemy r̄ĩmyh̄ȳ dohod̄ȳna heto nieruhyna-txi. Tii retehere tibo iny tanieru-di rehumyh̄ȳdi. Tai inieru s̄owe mah̄adu nieru s̄owemy ritidimyh̄ȳ. <sup>2</sup> Tule tahe nade wytese āo āok̄o mah̄adu. Tii inatxi nieru s̄omo-di rehure. <sup>3</sup> Tai Jesuisi rarybere: –Kowa heka wytese nieru-di rehure ibutumy iny witxira ratyre. <sup>4</sup> Ij̄o mah̄adu tanieru uhedile rehumyh̄ȳ. Tahe wytese idi rehure ibutumy tanieru-di rexihumy taumy-ribi idi rehure. <sup>5</sup> Dohod̄ȳna hetomy ieryd̄ȳna tamy rarybere: –Eryd̄ȳdu, beteheke mana wihik̄ȳ ruxera ruxera-di eryna heto riruxeranyreridi. <sup>6</sup> Jesuisi rirawyònyre: –Kaiboho betehebennykre hetonihik̄ȳ-ò. Kia heka mana ij̄o wityre-ki r̄ȳiòtyhy, ibutumy heka kedejuxunykre. <sup>7</sup> Tiiboho rit̄ȳraxyre. Tiubohe ibutumy kidiixixãwidid̄ȳnykre. Tiiboho ibutumy bede konanad̄ȳnamy reakre. Timybohe arieryrenykre, āoma bede ibutumy rexihukre. <sup>8</sup> Jesuisi tamyreny rarybere: –Kaiboho anaitxenanydenyheny lau bexiebennyke. S̄owemy dori r̄ȳikre wanimy rarybemy rarekre: –Jiar̄ȳ dori Kristu rare. Tahe iny s̄owemy itxenad̄ȳmy reakre. <sup>9</sup> Kaiboho wounarybe-ò, āobina rybe-ò, boholakreu, breburenyõmykre. Kia heka kanakremy ratximyh̄ȳre. Urile beded̄ȳnana ikonanatyhy āok̄o rare.

<sup>10</sup> Tii tamyreny rarybere: –Uritere iny lahinareny, ij̄o lahinareny widee kanaaõbinanykre. Tule iòlòna mah̄adu, ij̄o iòlòna mah̄adu-wana widee kanaaõbinanykre. <sup>11</sup> Bede bedesu ij̄o h̄awã-ki kanamytatakre. Tahe āok̄ore rama kedekre. Kia heka juhu

aõhõkỹmydỹñnana rarekre. Aõbrebuna brebuna kỹnyikre. Idi biu-ki aõwitzira kỹnyikre. <sup>12</sup> Tiiboho arawahinyrenykre aõludu wedu-ò, iòlò-ò. Kaiboho heka aõhõkỹmy iu botỹñnybenykre, watyhydỹ òraru-ki. Tiiboho arahatenyrenykre dohodỹña hetowo-ki. Kiabohoko-txi wadee kaiboho kedelyykre inatyhymy aõna aõna rỹiremy. <sup>13</sup> Rybewihikỹmy ibutumy bede bede hãwã hãwã-ò belyybenykre. <sup>14</sup> Tiubo aradyrenykeu, urile nohõtĩõmy aõmybo kaiboho marybebenykre. <sup>15</sup> Kiautyhyle aõmybo marybebenykre my bierykre. Kia tahe marybekre. Kai aõkõ dori marybekre, Deuxu Tyytybytyhy tahe rybedukre. <sup>16</sup> Asỹreny dori ròtenawo-ò araròtenyrenykre. Seriòre seriòrele wii kidirubunykre. Tyby heka tariòre kidirubunykre. Uladule tadi, tyby kidirubunykre. <sup>17</sup> Ibutumy heka iny iy kedeakre wani òraru-ki adeereny. <sup>18</sup> Ibedeu araderenytiõ reseõtyhy. <sup>19</sup> Bexityhymy ta tai ixiery dori biu-ò mahenybenykre. <sup>20</sup> Ijõ tahe Jesuisi rarybere: — Woudu mahãdu Jerusalẽ rirurawonykreu heka bierybenykre aõhuluhudunamy bede rỹirerimy. <sup>21</sup> Judeia hãwã hãwã-ki ratxikeki, mahenybenykre bederatòhòkỹ-ò. Inyõ Judeia hãwãkikeki, iribi òlò rỹikre. Idi inyõ bederokeki ixyby Jerusalẽ-ò ròteõmykre. <sup>22</sup> Kia txuu heka òwynatxumy rare. Ibutumy rybe tyyriti myna heka bede rỹikre. <sup>23</sup> Kobexe heny hãwyy bõtõmy rỹira, tule hãwyy tariòre ritõnymy rỹira. Aõhõkỹmydỹñnana kanakre tiu heka tuuõre. Debure nihikỹ heka kanake kia iny tyre-ki. Tiu heka kiamy bede roiõtyhy aõhõkỹmydỹñnanamy. <sup>24</sup> Sõwemy iny rurukre

mayrehe-di. Iny sōwemy radykre ijō bede-ò aōhōkỹmy tai rotỹnykremy. Ityhydỹdukōdu mahādu rasỹnykre Jerusalē hāwā-ki iu.

<sup>25</sup> Ixityre tahe Jesuisi rarybere: —Idi webòhòna rỹira txuu, aōhōkỹmydỹnana itue-di, txuu heka rurunykre. Ahādu tule rurunykre, tule taina. Beòbò lau iwodỹỹ lau ibutumy iny ruberukre ini-hikỹ òraru-ki. <sup>26</sup> Iu bede bede iny mahādu aōhebo rotỹnymy, tatōhōtibre-di tiiboho reserenyre sutyre-ki tai. <sup>27</sup> Iny retehekre

Deuxu Riòre, Hābutyhyhykỹ dehemynyna-di. Biurawetyky-ribi kodobehekre tatyhy-di.

<sup>28</sup> Tahe kia aōmydỹnana rỹikreu, ywinamy bòibenykeu, iòhòlereri.

<sup>29-30</sup> Tai tahe Jesuisi figueiraò-wana tahe bede ròkewesenanyre: —Figueiraò-di ini bexinohōtinybenyke. Tii heka tairu-txi, tanoiròsò ritỹmyranymyhỹreu, tai tahe bierybenykre wyra iòhòlereri. <sup>31</sup> Tule kia aōna aōnamy bobibenykre, tii iòhòlereri. Ijò-ki iòhòwesele rỹire. <sup>32</sup> Inatyhymy adee ararybekre, kia wjinabòdu itueōtyhy aōna aōna rỹikre hārele. <sup>33</sup> Biu, bede-wana ituekre, tahe warybe itueōtyhy.

<sup>34</sup> Tahe Jesuisi tarybe rihumy rarybere: —Kaiboho bexiebenyke, betehebennykre ixinohōtidỹrenythykōmy. Roxina worana bedehesi-di timybo kaiboho atximyhỹtenytedi. Mona juberere biōbenykemy mohōtinyōke. Kaiboho dori teeryōtenyete tiubedemybo adòòsekre. <sup>35</sup> Kiatxu kanakre tahe iwese nawii mynyna wese aōwesele rimykre ibutumy bede iny mahādu rimykre. <sup>36</sup> Biebenyke tahe,

Deuxu-ò bexitòenybenyke. Kia tahe aõhebo rotỹnykre-ribi mahenyke. Bityhynyke Deuxu Riòre, Hãbutyhyhykỹ, jiarỹ wahe.

<sup>37</sup> Txuõ txuõlemy tii Dohodỹỹna heto-ki ribedeerynyre ihãre tahe rummy Oliveira hãwãlò-ò rara. <sup>38</sup> Rudile tahe sõwemy iny dohodỹỹna heto-ò rehemynymyhỹre Jesuisi rybe-ò ijohomy.

## 22

<sup>1</sup> Iòhòmy ratxireri Pascoa worana bedehesi kodohònykremy. Kia anarỹỹ wehityhynamy heka iny ratya-di reare. Tule orotxu anarỹỹ kia ròhònyre. <sup>2</sup> Deuxu aõmysỹdỹỹdu wedu mahãdu, tule bede erydỹỹdu mahãdu Jesuisi rymykemy ratxireri idi rirubunykemy. <sup>3</sup> Satanasi heka Judasi Isariòwo-ki ralore, tii Jesuisi erydỹỹnaõ ihỹre. <sup>4</sup> Juda Isariò heka Deuxu aõmysỹdỹỹdu-ò rara Jesuisi riwahinykemy. <sup>5</sup> Tiiboho tamy roholarenyreu, reysare. Tahe tamy nieru riwahinykemy riurenanyre. <sup>6</sup> Tahe Juda rijemyhỹre aõu aõu bedewihikỹ tamyreny riwahinykemy. Wasimy riwahinykemy tii roholare.

<sup>7</sup> Juhu orotxu anarỹỹtxure budoeni xiweloo rirubuny rahudi tahe Jesuisi erydỹỹna mahãdu tamy rarybere: –Titxibo anarỹỹ rỹsỹnamy biroxikemy atxiteri. <sup>8</sup> Tahe Jesuisi heka Pedro, Joaõ-wana riteònyre: –Kaiboho boike iny rỹsỹnareny ywidỹỹmy. <sup>9</sup> Tiiboho rỹỹraxire. Titxibo ariywinyrenykre? <sup>10</sup> Jesuisi tamy rarybere: –Kaiboho boikre hãwãhãkỹ-ò. Tahe hãbu-wana wii biòbynykre butxi-di retyyreriò. Tahe tii biheludunybeny. Titxibo heto-txi ralokreò, kaiboho tule bironybenymy bitỹỹraxinybenykre



heto wedu: <sup>11</sup> –Wawedureny rarybera: – Titxiwexe anarỹ rỹsỹna arirỹsỹkre waerydỹỹna mahãdu-wana. <sup>12</sup> Tii heka adee kiditeòsinykre hetowoõ-txi biu-ki. Ibutumy rexihumy rỹire inydeereny. Tai rỹsỹna inydeereny biywinybenykre. <sup>13</sup> Tahe ierydỹỹna rexitare. Roire hãwãhãkỹ-ò. Tahe rotỹỹnyrenyre Jesuisi rybe myna. Tahe ibutumy rexihurenyre anarỹỹ-ò.

<sup>14</sup> Kia txu rimyre tahe Jesuisi nade taerydỹỹna waòinatxi reurò-wana byremy ronyrenykremy. <sup>15</sup> Tii tamyreny rarybere: –Jiarỹ awanareny ariroxikemy watxiwãhãre. Karibi dori warubuna-ò arakre. <sup>16</sup> Inatyhymy ararybekre: –Jiarỹ konanamy ayreny-ki ariroxikre. Ixyby ta Deuxu Iòlònakile tahe rikiroxirenykre. <sup>17</sup> Tahe vĩ mona hyna rimyre, rexitòenyre, tahe tamyreny riwahinyre. Ibutumy ibute bute iribi tuu riòreny. <sup>18</sup> Inatyhymy ararybekre: –Tiu ixyby tuu ariòòtyhy Deuxu Iòlòna-ki kotyre. <sup>19</sup> Tiiboho riroxireriu, Jesuisi orotxu rimyre, raorore, rexitòenyre, tahe tamyreny riwahinyre. Rarybere: –Ahãxe, kia heka waumy wese rare. Iu biroxikey, warubuna-di mohòtynybenykemy. <sup>20</sup> Biòbenyke! Kaa dori wahãlubu wesemy ratxireri. Tahe tamy riwahinyre riòrenykemy. Tai sòwemy iny ròhònyke biu-ò hena-ò ibutumy òraruna ixãwididỹỹmy. Tuu ròhònyra. Kia heka wadeewimy iny Deuxu-wana ratxiinyhỹre, wahãlubu òraru-ki. <sup>21</sup> Boholabeny inihe watyhedỹỹdu inykyrenykile ronyre. <sup>22</sup> Iwese tyyriti-ki roire wese heka arurukremy, Deuxu Riòre, Hãbutyhyhykỹ, jiarỹ wahe. Kobe làhàxe watyhedỹỹdu. <sup>23</sup> Tiiboho tahe

widee rarybere: —Mobo tahe rare? Mobo Jesuisi riwahinykre.

<sup>24</sup> Iribi tahe widee raryberenyre, mobo wiratyreremy? <sup>25</sup> Tahe Jesuisi tamyreny rarybere: —Kabede iòlò mahāduy-ki iruru dire. Bede dinodu tahe iny rininire: Iny biòwa. <sup>26</sup> Tahe ayreny-ki kawese aōkō ihÿre. Inihikÿtyhy inyō ratxikeki, tii inyuhe deòdumy ratxikre. <sup>27</sup> Tibo inytyhy rare? Roxidu mahādu ada deòdu mahādu? Roxidu mahādu, aōhe inatyhy? Jiarÿ tahe ayreny-ki deòdu wesemy jiarÿ rare. <sup>28</sup> Kaiboho heka wawanahyy atxitenyte aōhōkÿmy ratÿÿnymyhÿreu. <sup>29</sup> Tai tahe adee ruruna ariwahinykre. Iwese Waha wadee riwahinyre wese, adee ariwahinykre. <sup>30</sup> Waiòlòna-ki kaiboho wawana biroxibenykre, biōbenykre. Tule rynana wiwihikÿ tyre-ki rÿdu mahādumy bonybenyke. Israeli iny mahādu heka kaiboho biòbitinybenykre, ibutumy judeu mahādu wahe.

<sup>31</sup> Jesuisi ijō rarybere: —Simaō, Simaō, wadee bohولاتyhyke. Satanasi araurihirenykemy wadee rexitòenyre. Tahe adeereny kanake araurihidÿÿmy. <sup>32</sup> Dori rexitòenymyhÿre, Simaō, kai bityhynyhykemy. Wadee bòdòòsekeu, abiòwa mahādu biwiòhenanyke. <sup>33</sup> Tahe Pedro diwyònyde: —Awanahyy arakre, wanyrÿ, arurukre hāre, ròtenawo-ò arakre hāre. <sup>34</sup> Jesuisi tamy rarybere: —Pedro, kai biwatxiōnyke, hānie hābu ryrykōule biwatxiōnyke inataōmy.

<sup>35</sup> Jesuisi tamyreny rÿÿraxire: —Juhu arateònyrenyreu anieruhynakōmy, asaurenkōmy, awarenyōmy, adeereny aōbo aō rasiranyre? Tiiboho dirawyòmy: —Aōkō, aō rasiranyōhyre.

<sup>36</sup> Tahe Jesuisi narybere: —Wiji tahe txibo inyõ inieruhynadikeki, saudikeki, biwykre. Txibo inyõ imayrehedikõkeki tayhyitxena-di rohonykre iõwy-di tahe tii riõbranykremy. <sup>37</sup> Kamy dori Deuxu rybe tyyrity-ki roire:

—Òbitikõmy nodu mahãdu-wana tii rỹire. Ibutumy timybo tyyrity wamy rarybere heka rỹikre. <sup>38</sup> Tamy ierydỹna mahãdu rarybere: —Wanyrỹ, kaa inatxi mayrehe rỹire. Tahe Jesuisi rỹire rarybere: —Awire kia.

<sup>39</sup> Tahe Oliveira hãwãlò-ò roirenyre, taerydỹna mahãdu-wana. <sup>40</sup> Tiiboho kowa-ò rehe-mynyreu, Jesuisi rarybere: Bexitòenyke! Tai tahe òraruna-txi beseõke. <sup>41</sup> Tahe iko-txi uri-himyò rareu, taowotimy resemu. Rexitòenyre: <sup>42</sup> —Waha, adee arexitòenykre. Adee awikeki, aõhõkỹmy dỹnana waribi biixãwidỹnyke. Tahe adeewikomykre, wadeewi ta aõkõre. <sup>43</sup> Yjuõ tamy nade biu-ribi tamy ruru riwahinyre. <sup>44</sup> Sõwemy tahe rexitòenyre, iõsana-ribi resere bee wahe. Hãlubu wese heka ihỹre resereri bede-ò. <sup>45</sup> Tii rehemynyre tai rahare rõrõrenymy roireriò. Tiiboho ele risarenymy sõwemy rabadeworenyreki. <sup>46</sup> Tamyreny rarybere: —Aõherekibo tarõtenyteri? Biijebenykre, bexitòenykre.

<sup>47</sup> Tii rarybereriu, aõwesele Judasi nade. Tii-wana doide hãbu mahãdu. <sup>48</sup> Jesuisi rarybere Judasi-ò: —Judasi, Deuxu Riòre bityhenykre aõbo, jiarỹ hãbutyhyhykỹ wahe? Waõbuò-di aõbo biwatyhenykre? <sup>49</sup> Jesuisi erydỹna mahãdu tuu robireu, tamy rarybere: —Iny mayrehe-di araaõbinanyrenykre, Wanyrỹ. <sup>50</sup> Kia ijoioõ mayrehe

ritare tahe Deuxu aõmysỹdỹũdu wedu deòdu nohõti riorore. <sup>51</sup> Tahe Jesuisi rarybere: — Ixãwike. Tahe hãbu nohõti riteytenyre. <sup>52</sup> Tahe Jesuisi dirawyõnyde tamyreny, Xiwe wahidỹũdu mahãdu-ò, dohodỹũna heto itxedu wedu-ò, matuari mahãdu-ò: —Kaiboho mayrehe-di, òhòte-di tiwaòrytenyteri jiarỹ wasiduòrysya wese. <sup>53</sup> Jiarỹ tahe dohodỹũna heto-ki watximyhỹ txuõ txuõlemy adeereny anaerynanymahãdenyde. Kowa-ki heka tiwamyõlemyhỹtenyte. Kia heka bededỹũnana rexihure. Bede luru ruru roirerimy. Tahe aõbo iritina-ki rỹireri, kia heka kỹnyikremy.

<sup>54</sup> Xiwena wahidỹũdu mahãdu dinodutyhy-ò wedu-ò tiiboho Jesuisi ridyrenyre. Pedro rihe-ludunyre ireheriòremy. <sup>55</sup> Rehemynyreu tai Pedro ixitòteenymy heòtywera-ò ronyre heto itxeredu mahãdu-wana. <sup>56</sup> Pedro ratximyhỹ-ò tahe deòduõ rehemynyre, ijadõma wahe. Pedro-di ijadõma retehemy ta rarybere: —Tii tule Jesuisi Nazareludu-wana ratximyhỹre. <sup>57</sup> Tahe tii rexitxiõnyre: — Jiarỹ reeryõre aõmyboho kai tarybeteri. <sup>58</sup> Ixybyle kowa ijoioõ Pedro-ò rarybera: —Inatyhymy kai ijõ mahãduõ tate. Tii inatyhytyhyrybemy rarybera: —Jiarỹ reerykõre hãbumy tarybetenyteri. <sup>59</sup> Ijõ òrau tahe ijõ rarybere: —Inatyhy rare kai Jesuisi-wana ahãte, Kalileia mahãduõreki. <sup>60</sup> Tahe Pedro rarybere: —Hãbu, reeryõre aõmybo tarybeteri! Tahe hãnie hãbu robura. <sup>61</sup> Jesuisi heka Pedro-ò retehere. Tahe Jesuisi rybe-txi Pedro tõhõti reare. Iwese Jesuisi rarybere: —Hãnie inataõmy robukre myna, kai waheludumy bedexitxiõnykre. <sup>62</sup> Pedro tahe iribi rexitareu, ixidee iky reamy rahinyre.

<sup>63</sup> Tahe hãbu mahãdu Jesuisi rihetenymy, rilahirenymyhÿre. <sup>64-65</sup> Tiiboho riruehetynymy rihetenymy idi ritÿÿraxinymyhÿre: —Mowe arahãtenyra. Idi tahe sÿwemy idi risinymyhÿreny.

<sup>66</sup> Rudile tahe judeu wedu mahãdu ributunyre xiwena wahidÿÿna mahãdu-wana. Jesuisi ridyrenykemy raryberenyre dohodÿÿna mahãdu-ò. <sup>67</sup> Tamy ritÿÿraxinyre: —Kai aõbo Kristu tate, Deuxu Riòretyhy. Jesuisi rarybera: —Jiarÿ heka kohemy ararybekeki, kaiboho biwatyhynyõtyhy. <sup>68</sup> Adeereny arÿÿraxikeki, kaiboho biwawyònybenyõtyhy. <sup>69</sup> Kaiboho bierybenykre

Deuxu Riòre heka jiarÿ rare. Idi Waha rurunaw-eribi-ò aronykremy.

<sup>70</sup> Ibutumy tahe tamy rarybere: —Kai aõbo Deuxu Riòre tate? Tii rirawyònyre: —Iwese kaiboho tarybetenyteri wese jiarÿ inatyhy rare. <sup>71</sup> Tahe tiiboho raryberenyre: —Inyõ irybe-ò ijohoke heka aõkõre, inybohole dori tuu roholarenyre.

## 23

<sup>1</sup> Kia iny ka ibutumy Jesuisi ridyrenyre Pilato-ò, bede dinodu-ò wahe. <sup>2</sup> Idi tahe aõbina binahakÿmy tuu raryberenyre: —Kahãbu heka bede rijeijeinyreri iòlòmÿ ijoi radònykemy. Iribi iòlò-ò òwydÿÿ rÿiõmyhÿkemy rarybere. Ihãreta Deuxu Deòdÿÿnamy raremy idi iòlòmÿ rexininimyhÿre. <sup>3</sup> Tahe Pilato rÿÿraxire Jesuisi-ò: —Inatyhywe kai Deuxu mahãdu iòlòtyhy tate? Tai tahe Jesuisi riwyònyre: —Kai tuu tarybeteri, Wanyrÿ. <sup>4</sup> Tai tahe Pilato rarybere xiwe wahidÿÿdu mahãdu dinodu-ò, tule inysõwe mahãdu-ò: —Timyki kahãbu

aõhõkỹmy wasỹdỹõna, aõõ bina dori riwinyõlere. <sup>5</sup>Tai ixyby idi risỹnyrenyre: —Kahãbu heka Kalileia bede-ribi bede rijeijeinymy rareri, idi Judeia bede-di tule katahe kakile tuu rotỹnyre. <sup>6</sup>Taita Pilato rỹraxyre: —Tii aõbohe Kalileia mahãduõ ratxireri? <sup>7</sup>—Tii Kalileia mahãdu rare. Kia Pilato rieryreu, Herodi-ò riteònykemy rexinohõtinyre. Tii kia dinodureki. Ihãreta Herodi Jerusalẽ hãwã-ki iu ratximyhỹ.

<sup>8</sup>Herodi Jesuisi robireu heka reysare. Jesuisimy robikemy riwisỹnymyhỹre sõwemy. Idi tahe tuu robireke, reòsare. Tai tahe reysare. Ini-ò roholahyymyhỹre. Tule aõwihikỹ wixira riwinykemy idi riwisỹnymyhỹre. <sup>9</sup>Idi tahe Herodi sõwemy rỹraxyimyhỹre. Jesuisi tahe rirawyònyõhyre. <sup>10</sup>Aõbo xiwena wahidỹydu mahãdu wedu, tule bede ywina erỹdỹydu mahãdu sõwemy aõna aõna binamy tuu raryberenyre. <sup>11</sup>Herodi tasoldado-wana tuu raòhòtemy idi risinymyhỹreny. Tyywihikỹ-di rirahananyrenyre. Iribi riòkesedỹnyre Pilato-ò. <sup>12</sup>Juhuu heka Herodi Pilato òludumy widi raremyhỹ. Kia txule tahe widee rowoixirenyre.

<sup>13</sup>Idi tahe Pilato tahe ibutumy xiwena wahidỹydu wedu, tule matuari mahãdu tule ijõ iny mahãdu ributunyre. <sup>14</sup>Tamyreny rarybere: —Kaiboho heka wadee tedytenyteri bede jei jeiwidỹydummy tuu tarybetenye tebutenyteri heka. Jiarỹ akoreny-ò retỹraxyinyre idi aõhe tai ibinamy rahaõhyre. <sup>15</sup>Tule iòlò Herodi tai ibinamy rahaõhyre. Tai diòkesedỹnyde. Tai iurenana ta aõhereki timyki irubuõna. <sup>16</sup>Urile raòhòtedỹykemy

bede reywinyre idi ta ixinamy rakre. <sup>17</sup> Kiemy dori worana bedehesiu, ròtena-ribi inyõ heka rònònymyhỹke. <sup>18-19</sup> Sõwemy iny heka rirajuare: —Aõkõre uritere ta Baraba biteònyke. Kia hãbu urile ruruke. (Baraba inyrubudỹỹdure. Bede jei jeidỹỹ-ki heka ròtena-ò ralore.) <sup>20</sup> Tai Pilato Jesuisi òlòdỹỹmy riwisỹnymyhỹ tai ixyby rarybere: —Aõkõre Jesusile ariteònykre. <sup>21</sup> Sõwemy iny ixyby ryryre: —Aõkõre, itxeò-ki bitamadỹỹnyke! <sup>22</sup> Tahe Pilato tainatãõnamy narybede: —Aõherewe, aõwe tii ibinamy riwinyre. Aõheka tai ibinaõhyreri rubu-ò rawahikemy. Òhòteòle ta arawahinykre idi ariteònykre. <sup>23</sup> Ihãre ta iny sõwe mahãdu ire rirajuamyhỹreny itxeò nihikỹ-ò rurukemy. Ixierya iryreny-ò roholare idi tukremy. <sup>24</sup> Iu Pilato heka Jesuisi riwahinyre rubu-ò tumyna rexitòenymyhỹrenymy. <sup>25</sup> Ijõ hãbuõ ta ròtenawo-ribi riòlòdỹỹnyre, iixitòedỹỹreny myna wahe. Tii hãbu aleerydu rare, tahe bede jei jeidỹỹdu tule. Iwana ta Jesuisi rawahire irybemynarenymy aõhebo rotỹỹnykremy.

<sup>26</sup> Tahe Jesuisi ridyreny. Ryki tahe hãbuõ iutedereny-ò nade, Simaõ inire, Sireni hãwã ludu wahe. Nohòtiòlemy ta ityre itxeò nihikỹ ritidirenyre, iherenymy idi kanakremy.

<sup>27</sup> Sõwemy ihemy nodu sõwe. Iy-ki hãwy mahãdu Jesuisi-di robumyhỹreny. <sup>28</sup> Tii tahe tamyreny rexiòkesemy narybede: —Jerusalē hãwã ludu hãwy mahãdu! Ixirahi bobubenyke ariòre rahi tule warahi ta aõkõre. <sup>29</sup> Tiutxumybo bexirybenybenykre: —Hãwyky bedekòby heka raritxòrenykõre mahãdu rare, tohokuã ritònykõre

mahãdu tiku kuladu-di tarukikõre mahãdu.  
<sup>30</sup> Tiutxumybo

bexirybenybenykre hãwãlò-ò: –Watyrereny be-  
 deseke  
 tule hãwãlò riòre-ò bexirybenybenykre: –  
 Biwawòbenykre.

<sup>31</sup> Wiji kawesemyhỹre hee itukure hãre.  
 Timykrebo tahe hee irubukreu.

<sup>32</sup> Ihãre tasỹse iny inatxi hãbu òbitimy nodu aõkõ  
 ridyrenyre Jesuisi-wana rururenykremy.

<sup>33</sup> Tahe hãwãlò riòre-ò ratitybymy ninadu-ò rite-  
 hemynyrenyre. Tahe tii-wana inatxi wasidu itxeò  
 nihikỹ-ò rilamadỹnyrenyre. Ijõ ruruweribi-ò ijõ  
 hyweweribi-ò. <sup>34</sup> –Waha, idireny bexiruxetòenyke  
 rieryõhyrenyleri dori aõmybo rotodỹnyleri.

Tai tahe ityy wimy ritxuatxuakremy dado-di re-  
 humyhỹreny tibo iwyydydukremy.

<sup>35</sup> Iny retehemy rỹimyhỹ taile wahe. Judeu  
 wedu mahãdu tule Jesusimy rarybere: –Tii iny  
 sõwemy rihedỹnyre, kia aõherekibo tii rexitaõreri  
 rubu-ribi, tii Deuxu deòdỹna rarehãre. <sup>36</sup> Tule  
 soldado mahãdu rarybere aõbina binahakỹlemy.  
 Diwyde tii aõna ta iny kremy rirahòreny tamy idi  
 reare rijeny: <sup>37</sup> –Kai inatyhymy judeu mahãdu  
 iòlòmý atxiteri wana heka kaa bexitakre iribi.

<sup>38</sup> Itxeò ratya-ki tahe aõma timy roire tyiritidỹna.  
 –Kaa Heka judeu Mahãdu Iòlò Rare.

<sup>39</sup> Ijõ heka rarybereri Jesusibire-ki roireriõle  
 tamy rarybereri: –Deuxu deòdỹna tateki, bex-  
 itake tule biwatabenyke. <sup>40</sup> –Wy, Deuxu lau  
 taberuõlemahãte aõbo tule dori iny aõhõkỹmy  
 rokotỹnykrelemy iny roireri. <sup>41</sup> Lòwudu tamy rary-  
 bereri: –Iny heka rurureri, aõbina binahakỹ iny



riwinyre òraru-ki. Iny rurureri. Kaa hãbu rỹire tiu aõbina riwinyõhykyre. <sup>42</sup> Jesuisi-ò rarybere: —Jesuisi, watxi õhõti beakre Iòlòmý bonykreu. <sup>43</sup> Jesuisi tamy rarybere: —Wijile heka biu-ò heka rakakre.

<sup>44-45</sup> Txutyemy bedede roronyre idi txioro txu re-hehekỹ-ò bedede tuu rỹire. Inataõ òramy bedede ry-bynyre, rỹire. Heto-ki rahanaheridu urile raykare templo-ki wahe. <sup>46</sup> Tahe Jesuisi rirajuare: —Waha, watyatyby adee rawahinyreri. Iu irybe rexihureu rurure. <sup>47</sup> Soldado mahãdu wedu tuu robire kia aõhebo rotỹynara tuu rarybere: —Kia inatyhymy hãbu õbitityhy rare. <sup>48</sup> Ibutumy iny kia robire Jesuisi rubu-ò rahinymy ròðsere rexihetenymy tabreti-ò. <sup>49</sup> Ibutumy tii mahãdumy ratximyhỹre iribi ireheriòremy rexijemyhỹ.

<sup>50-51</sup> Tii judeu bedede mahãduõ rare. Jyjemy inire. Tahe Kristu rubuna-ki awimy rahaõhỹỹre taijoi mahãdu-ribi. Tii dori Deuxu Iòlòna riraðmyhỹre. Ihãwã Arimatea inire. <sup>52</sup> Tai ta rare ixitòedỹỹmy Pilato-ò, Jesuisi umy kidiwahinykremy. <sup>53-54</sup> Tai tahe ritare itxeð-ribi tyy ura nihikỹ-di tyy-di ritỹtetỹtenyrene. Manawabedewo-ò ritidire. Tai tiu iny rahãloonaõmyhỹre. Aõma judeu mahãdu elehyna txu wahe ixiywidỹỹnatxumy txu rỹireu heka aõma worana bedehesi txu. <sup>55</sup> Hãwyy mahãdu Kalileia-ribi Jesuisi-wana. Tiiboho doide Jyje-wana Jesuisi hãloo-ò itxeremy. <sup>56</sup> Tahe timybo roimyhỹ riòtudunyrenyrene. Dòòsedenyde iribi aderòna lỹnyre ywidỹỹmy iumy tỹnyrenamy.

Kia rexielehynyrenyrene sabado txu bedede ywidỹỹna myna-di.

## 24

<sup>1</sup> Juhu txu semana bededỹnanau txuu deadeu hãwyy roire wabede-ò. Tiiboho riwyyre lỹnyrena. <sup>2-3</sup> Rehemynyrenyreu, mana nihikỹ tahe ijò-ribi ratamy rỹire. Tahe ralòrenyreu, Jesuisiumy ihoõhyyre. <sup>4</sup> Wabede-ò rirònyrenyreu, robirenyre inatxi hãbu. Ityy urahakỹmy rononymhỹre tai. <sup>5</sup> Tahe tiiboho bede riòtiinyrenyre idi tabrebu-di suò reserenyre. Ýjyõ tamyreny rarybere: <sup>6</sup> – Iny irumy kaiboho teijeteri kaki wabede-ki aõbo? Tii kaki ratxireri. Tii rexixara rubu-ribi adeereny rarybere wese Kalileia bede-ki: <sup>7</sup> – Inyõ riwawahinykre inybina-ò Deuxu Riòre Hãbutyhyhykỹ. Itxeòtyre-ki arỹikre tai arurukre. Inataõ txu-di tahe rubu-ribi arexixakre. <sup>8</sup> Tahe hãwyy irybe-di røhõtinyrenyre. <sup>9</sup> Wabede-ribi raijaranyrenyre Jesuisi erydỹña mahãdu-ò ijyymy. <sup>10</sup> Kia tiibohore: –Marie Madalena, Joana, Marie Txiause. Ijõ hãwyy tule tii-wana roirenyre. <sup>11</sup> Iu tamy relyyreu, rityhynyòlerenyre. <sup>12</sup> Pedro tahe rỹimy reare idi raijaranyre wabede-ò. Urile tykylemy robire tahe dòòsede, rexiòtiinyre.

<sup>13</sup> Itxuleu ta iny inatxi hãbu Jesuisi tyhydỹñdu mahãdu tahe roirenyre Emau hãwã-ò. Jerusalẽ hãwã-ribi txibo 10 km wese irehere. <sup>14</sup> Ibutumy aõhebo rotỹñnyramy wiko relyymy ròimyhỹre. <sup>15</sup> Iuleta Jesuisi tamyreny dehemynyde idi tiiboho-wana roire. <sup>16</sup> Tiiboho tuu robirehãre timykibo rierykøhykyrenyre. <sup>17</sup> Tahe Jesuisi ròtỹñraxire: –Aõmywe widee tarybetenyteri. <sup>18</sup> Iijõreny Klopamy nidu narybede: –Kai sohojilewe Jerusalẽ-ki aõhebo bede rỹira teerykøte. <sup>19</sup> Tii dotỹñraxide: –Aõherabo ta. Tiiboho tuu

relyyre: —Jesuisi Nazare ludu kie. Tii Deuxumy rybedu nihikỹ heka rare, Deuxu-ò dori ibutu iny-ò heka rybe-ki aõni heka aõmywidỹỹ-ki heka ihỹỹna rare. <sup>20</sup> Waxiwenareny wahidỹỹdu wedu tahe wadinodureny itxeò nihikỹ-ò rurukremy riwahinyreny. <sup>21</sup> Tule judeu mahãdu tarasadukresỹna raholareny. Ihãreta tukõlemyta inataõ txumy rubu-ki bede idi rỹira. <sup>22</sup> Bederarasò-di waijoireny hãwyyõ ihãloo-ò roire. <sup>23</sup> Tai itxi rekoaõhyyre. Dòòsedenydeki tahe Ỹjummy riki robirenyremy delyydenyde. Tii Jesuisi rubu-ribi rexixamy tamyreny rarybere riki. <sup>24</sup> Waijoirenyõ tule ihãloo-ò roirenyre. Inatyhy rikihe rare. Urileta riki Jesuisimy robiõreny. <sup>25</sup> Tahe Jesuisi tyhy Klopaboho-ò narybede: —Aõherewexe Deuxu Rybedu mahãdu rybe awo-ki teximytenyteri tetyhynykõtenyteriki wahe. <sup>26</sup> Kialemy dori Kristu dori aõna aõnamy rotỹỹnykremy tai Deuxu riwowydynykremy. <sup>27</sup> Tahe Jesuisi rexidelenyre aõbo rybe ritina roiremy. Moisesi ryberiti juhuumy ritỹnynynyre. Timybo Deuxu rybe ritidỹỹdu raremy. Tiiemy heka iximyhyyle rarybere. <sup>28</sup> Ibutumy tamy relyyhyyre ramyhỹrehyy tahe ritehemyny Emau hãwã-ò, tai inatxi hãbu rarikreò wahe. Tahe Jesuisi rarybere: —Aõkõ arexinoranykre. <sup>29</sup> Tai ta tamy ihãrele rarybemyhỹre: —Txioinihe bodonyke kakile. Aõma bede ratxinyra ratxioronytyhyra. Taile tiiboho-wana rare ihetoreny-ò. <sup>30</sup> Rorukurenyre riroxirenykremy. Tahe Jesuisi orotxu rimyre rexitõenyre Deuxu-ò. Tahe orotxu riororiorore imynareny. <sup>31</sup> Iu tahe

aõwesele rierymy reare Jesuisi. Tai iruereny raraymy rierenyre. Tahe aõwesele iõmy iribi reny reare. <sup>32</sup>Tai widee raryberenyre kiamy. Iu tii Ryberitimy inydeereny rydi relyyreu, urile wawo ratooteemy. Kai tahe. Ijõ diwyõnyde: — Kohe jiarỹ tulere. <sup>33</sup>Iribi tahe ritamanyrenyre. Diòòsedenyde ixyby Jerusalẽ hãwã-ò. Tiu waòsohoji reurò erydỹna itxi rekoarenyre. Tai tiiboho narybedenyde: <sup>34</sup>Inynyrỹrenyhe rexixara. Pedro heka tuu robira: <sup>35</sup>—Jiarỹboho tulerenyra wawanale ròirenrya rydi. Tule wadeereny orotxu riyreyrenrya. Taile reeryrenyre.

<sup>36</sup>Iu kiamy relyymyhỹrele, Jesuisi dehemynymy deade ityareny-txi. Riryberenyre ibutumy: — Ywina heka akirenyke! <sup>37</sup>Ibutumy ruberurenryre ilau. Urile raresỹny tamy raholarenryre. <sup>38</sup>Jesuisi rarybere: —Aõhebo taberutenyteri. Breburenỹomyke hewa biwatyhynybenyke. <sup>39</sup>Jiarỹle ratxireri. Wadebò-di bedetehebedenyke, wawa-ò tule. Jiarỹ karare wadee inihe bideribedeny. Jiarỹ uni aõkõ watxireri. Uni dori idedire aõkõ wawese aõkõre bedetehebedeny inihe. <sup>40</sup>Tai tahe tebò wotõ mona, tawa wotõmona, riteòsinyre tamyreny. <sup>41</sup>Ihãrele tahe rityhynyrenyõre, ibedesamy bede riòtiinymyhỹreny. Jesuisi tahe rexitðenyre tamyreny aõ rirỹsỹkemy. <sup>42</sup>Tamy riwahinyrenyre utura wòsi deyreõ. <sup>43</sup>Rirasỹre ikorenyòle.

<sup>44</sup>Idi tamyreny rarybere: —Aõma wawanale ratximahãre, õhõtireny itxi reara. Aõma wawana atximahãtenyete juhUU. Ibutumy heka adeereny retỹnynymy rarybere aõmybo wamy rybe

roimyhÿremy. Ibutumy heka Moisesi rybedu ritidÿÿnaki iritina-ki roimyhÿre. Wiuna tule wamy riritinyre. <sup>45</sup> Tai tahe ritÿnynyre òbitimy irakyreny riraynyre. <sup>46</sup> Ihetxiu rybe wãhã aõma Deuxu Deòdÿÿna rurukre heka aõhõkÿmy rotÿÿnykremy. Ruru-ribi inataõ txu-di rexixakremy bederoire. <sup>47</sup> Kaa rybe wihikÿ ritidÿÿna heka kaa Jerusalẽ bedeki robÿtÿkre ihãreta ibutumy iny iny kõkõmy bededemy robÿtÿkre. Kiamy heka ibutumy inydee marybebenykre. Iny riwatyhynymy rÿirakre heka ibutumy iòraru-ribi ariixãwididÿÿnyke. <sup>48</sup> Tule terytenyteri ibutumy aõhebo rotÿÿnykremy. <sup>49</sup> Tahe adee ariwahinykre iwese Deuxu rarybere wesemy heka adee ariwahinykre. Kaki hewa matxibenykre hãwã-ki. Tahe kanakre heka adee ruruõ biu-ribi. Iribi tahe bõhõnykre karibi.

<sup>50</sup> Iribi tahe Jesuisi ridyreny Betÿniary-ò. Tai tahe rilàhànanyreny tuu tamy rexitònyreny ibutumy tamyreny. Tamy rexitòenyreu heka ilàhànamy tamy rexitòenyre biutxile ire rexidymy ramyhÿre ryanamy ramyhÿre. <sup>51</sup> Iu rilàhànanyhÿreny, biu-ò rare. <sup>52</sup> Tamy rexitòenyra aõma làhànamy, wowodynamy rexitòenymyhÿre Deuxu-ò. Tai riwowodynamyhÿreny. Teysa-di diòkesedenyde Jerusalẽ-ò ixyby. <sup>53</sup> Tai tahe Deuxu dohodÿÿna heto-ki ixyby ixyby rowodynamyhÿreny.

## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 21 Feb 2024 from source files  
dated 29 Jan 2022

55ce0bcd-101e-52a3-984e-847027efe150